

يكون

سؤال ... إن أجبتك؛ فأنت هالك

وإن هبتك، فأنت ناج

اسم الكتاب: يكون

النوع: رواية

تأليف: إسلام حمودة

إصدار: 2024

تحت إشراف: أسماء أبو عطا

تصميم الغلاف: أحمد هشام

تحقيق لغوي وإخراج فني: عبدالعليم منا

رقم الإيداع: 2024-2689

الترقيم الدولي I.S.B.N: 978-977-87113-7-0



9 شارع مسجد المغفرة المتفرع من شارع العشرين
بجوار مدارس حسام الدين الخاصة – فيصل – الجيزة

موبايل: 01113079741 &&01007136897

جميع الحقوق محفوظة للناشر ©

وأي اقتباس أو تقليد أو إعادة طبع أو نشر دون موافقة كتابية، يُعرض صاحبه للمسائلة القانونية.
أما الحقوق الملكية الفكرية والآراء، والمادة الواردة في الكتاب فهذه خاصة بالناشر فقط لا غير.

إسلام عمودة

يكون

سؤال ... إن أجبتة؛ فأنت هالك
وان هبتة، فأنت ناج

رواية

كاريزما
للنشر والتوزيع

إهداء

إلى أمي وأبي وأخي وأختي وزوجتي وحماتي وعائلي الذين هم
سندي وكل دنيائي.

إلى أصدقائي الأعزاء وأخص بالذكر منهم: أحمد هشام ومحمود
رضا وأحمد فتحي الذين ساعدوا على إخراج العمل بهذا الشكل.

إلى كل عالمٍ أراد أن ينفع بعلمه وطننا الحبيب مصر؛ فراح
ضحية مؤامرات دنيئة.

إلى أبطالٍ لا يُعرفون بأسمائهم؛ ولكن أفعالهم آثارها لم ولن
تُنسى

إلى من كان ويكون وسوف يكون حريصًا على ان ينفع الناس
بما فضله الله.

مقدمة

يولد الإنسان في هذه الدنيا ضعيفاً، لا يعلم شيئاً ولا يملك شيئاً، وبمضي الوقت؛ يزداد في القوة والعلم والمال بما قَسَمَهُ الله له. ويرزق الله الناس من فضله، ولكنه تعالى في نفس الوقت يَفْتِنُهُمْ وَيَبْتَلِيهِمْ؛ فيظهر كل انسان على حقيقته، فمن كان مُتَجَبِّراً أو رُوؤفًا لن تظهر حقيقته إلا إذا أُوتِيَ القوة، ومن كان متكبرًا أو متواضعًا لن تظهر حقيقته إلا إذا أُوتِيَ العلم، ومن كان شحيحًا أو مُنْفَقًا في سبيل الله لن تظهر حقيقته إلا إذا أُوتِيَ المال.

فليعلم من أُوتِيَ بسطةً في القوة أو العلم أو المال أنه لم يُؤْتَهُ على علم عنده؛ إنما هو فضلٌ من الله لِتُعِينُوا بعضكم بعضًا.

العقرة الأزلية

الدنيا ليل، الناس كلهم قاعدين في أوضة - فيها لمبة واحدة
صفراء- حوالين ترابيزة مدورة كبيرة ... اللي حاطة إيديها على خدها
واللي باصص من الشباك ... واللي عمال يخبط بظفره على الترابيزة.

-إحنا هنفضل مستنيينه لحد إمته؟

-هانت .. هو يحيى مش موجود ليه؟

-تقريباً بعتلنا كلنا ونسي بيعت ليحيى.

دخل عليهم من الباب شاب، لبسه كله مليون طين، وشكله مرهق
جداً، واحد من الموجودين قال بحماس: دلوقتي ممكن نبدأ.

واحدة قالت بلهفة: هنبدأ بالدور؟

رد عليها واحد تاني بهدوء: من الأقدم للأحدث.

تليفون عمال بيرن ومش مبطل.

الي قاعد جنب الشباك قال بتوتر للشاب: التليفون ده ليك.

الشاب بعصبية: ألو... بتقول إيه؟! ... عرف مكانا ازاي!! ..

حالا، حالا.

وفجأة،

"دب دب دب"، صوت هبد على باب الأوضة اللي بيفتح ونادية بتدخل وقالت بخنقة وصوت عالي: دكتور ياسين! صباح الخير، المنبه بتاعك عمال بيرن من الصبح، ناوي تروح الكلية انهاردة سيادتك؟
ياسين بفزع: يا ماما يا حبيبتي؛ النوم ده موت أصغر؛ لكن باللي انتي بتعمله معايا والله هيبقى أكبر، وبعدين؛ دكتور ايه بس! دي كلية علوم.

نادية باستنكار: ومالها يا بيه كلية العلوم؟

ياسين باستياء: كلية اللي ملحقش كلية عدلة، من الآخر كلية الفشة بتوع علمي في الثانوية العامة.

نادية بغضب: فشلة إيه يا حته بهيم، أنصف عقول على مستوى العالم متخرجين من كلية علوم، ومنهم علماء مصريين شرفونا؛ ده أنا مخصصة حيطة كاملة لصورهم هنا في البيت وانت عارف، تيجي انت يا تافه تقول على الكلية كدة.

ياسين بعد ما جاب ورا: يا ماما ليه التهزيئ ده طيب عالصبح؟

نادية بعصبية: مانت حرقت دمي بكلامك، قوم يلا عشان تروح على كُليتك، أدليك يومين مبتروحش.

ياسين وهو بينفخ وبيقوم من على السرير قال: قمت أهو.

وكمل بصوت واطي "هو انتي جوزك طفش من شوية".

نادية: بتبرطم بتقول إيه يا زفت البرك؟

ياسين بصوت عالي وهو رايح على الحمام ويبعد: بقول أذكار الصباح.

نادية بنهكم: اللهم قوي إيمانك ياخويا.

ياسين طالب في كلية العلوم قسم فيزياء وكيمياء جامعة القاهرة -على حسب التنسيق الداخلي للكلية، كان نفسه يدخل هندسة بتول، لكن مجموعه حتى محصلش هندسة، مع إنه كان عبقرى، بس للأسف نظام الامتحانات اللي اتشقلب بسبب الوباء (كورونا)، زائد ضعفه في المواد الأدبية؛ كانوا هما سبب نزول مجموعه.

أبوه الدكتور صبرى، أستاذ دكتور في كلية الآداب جامعة القاهرة. وياسين في تانية إعدادي؛ صبرى اتجوز المعيدة اللي بيشرف على رسالتها، و خدها وسافر على الإمارات، لكنه ببيعت مبلغ محترم كل شهر لنادية، الراجل عداه العيب الصراحة!

نادية -أم ياسين- دكتورة صيدلانية بس ست بيت، عايشة على مبلغ شهري ببطلعلها من صيدلية بإسمها والنفقة اللي ببيعتها صبرى ... قامت بدور الأب والأم لحد ما ياسين دخل كلية العلوم، وهما الإثنين عايشين في شقتهم في الدقي.

ياسين كان بيروح الجامعة مش عشان يحضر المحاضرات في كليته؛ لا، كان بيقعد مع أصحابه اللي دخلوا هندسة في كليتهم.

فضل ياسين عالجال ده الترم الأول كله، وفي الإمتحانات، أخذ كورس ليلة الإمتحان في مادتين مع دكاترة المادة وكانوا ماشيين كالتالي:

الدكتور "بصوا يا حبايبي، الملزمة الي معاكم دي فيها عشر مسائل، المسألة الثانية انا مينفعش أقول إنها مهمة، يلاً نحلها كدة مع بعض"، وبعد الحل الدكتور قال "المسألة الرابعة والخامسة؛ برضو مينفعش أقول إنهم مهمين، يلا نحلهم"، ياسين سأل واحد من زميله في الكورس: هو إيه حوار مش هقول انها مهمة ده؟ زميله: يعني تحفظ المسائل دي زي إسمك.

تاني يوم دخل الامتحان، فوجئ ان فيه خمس مسائل منهم الثلاثة الي الدكتور قال عليهم في الكورس.

المادة الثانية كانت نفس نظام المادة الأولى، أما الباقيين؛ فمكانش قدام ياسين غير إنه يذاكرهم. المادة الثالثة والرابعة راح معرفش يحل أي حاجة، والورق كان زي البفته البيضاء.

ياسين مكتئب من الكلية والعك الي بيعكه في الامتحانات، فقال "لازم اذاكر واركنز في آخر مادة دي"، قعد على سريره وفرش الورق بتاع المادة كله قدامه، فضل يبص للورق ساعة كاملة، حس ان مفيش فايده، أكيد مش هيلحق يعمل حاجة، زاح الورق يمين وشمال على السرير وفرد جسمه في النص؛ وراح في النوم وهو حزين.

يوم يُكْرَمُ المرءُ أو يُهَانُ

نادية مسكت موبايلها ورننت على موظفة في الكنترول بتاع كلية ياسين "ألو..إزيك يا نوال، عاملة إيه يا حبيبيتي...أنا الحمد لله كويسة، طمئيني النتيجة طلعت؟ مم....مم....مم"

وبصوت مكسور ردت "ماشي يا نوال شكراً يا حبيبيتي...أنا عارفة....الحمد لله على كل حال، مع السلامة".

دخلت أوضة ياسين لاقته في سابع نومة، رفعت أقرب حاجة ليها عشان ترميها عليه تصحيه من النوم؛ بس خافت عليه يتعور، راحت منزلها تاني، وقفلت الباب وطلعت وهي في منتهى الحزن.

بعد ساعة ياسين صحي من النوم، طلع من أوضته على الصلاة، وبعين شبه مغمضة قال لأمه اللي قاعدة قدام التلفزيون على الكنبه مسهمة: صباح الفل يا ست الكل.

نادية مردتش عليه ولا حتى رمشت، وغصب عنها عينها دمعت. ياسين أول ما شاف كدة؛ راح قعد جمبها على الكنبه وحط إيده على كتفها وقال: إيه يا حبيبيتي مالك؟ إيه اللي مدايقك؟

نادية قالت بمنتهى الحزن وهي في نفس الوضع ومن غير ما تبص لياسين: طول عمري وأنا شايلة البيت ده على كتفي، وأبوك لما كان موجود كان شايل إيده من كل حاجة، ولما كنت أتكلم معاه؛ كان

يقولي: "أنا كفاية عليا شغلي، ومش مقصر معاكي في مصاريف البيت"، كنت بسكت وأقول معلش، ربنا هيعدلها من عنده، بس حتى وهو رافع إيده من كل حاجة؛ كنت دايما أهددك بيه، وإنك كنت بتعمله حساب.

نادية أخذت نفس عميق وكملت: بعد ما باعنا وعمل اللي عملته؛ لقيت نفسي لوحدي، ست سنين من أصعب سنين حياتي، لأنك كنت في سن التمرد، والسنة لازم يكون فيه وجود لأب في حياة ولاده، وربنا قدرني ولعبت الدورين؛ عشانك مش عشان نفسي، والموضوع مش تربية بس؛ لأ، أنا كنت بحاول أعوضك عن الأب اللي خسرتة كمان، بس يا خسارة؛ كنت فاكرة إنني نجحت.

اتلفتت لياسين وكملت بعتاب: ليه يا ياسين تعمل فيا وفي نفسك كدة؟ ليه تضيع تعبي ومجهودك السنين اللي فاتت؟ ياسين صعبت عليه أمه وقال: يا ماما والله إنني ما قصرتي، بالعكس، واللي يقول غير كدة يبقى غلطان.

بص ياسين في الأرض وكمل: واضح ان النتيجة ظهرت وهو ده اللي عمل فيكي كدة، بس أنا برضو معذور، الكلية دي أنا مش فاهمها حاجة، ودخلتها تنسيق مش أكثر.

رفع راسه ياسين وبص لأمه تاني: ماما أنا عايز أحول من الكلية.

نادية اتصدمت وبعدين قالت بتهكم: تحول تروح فين ان شاء الله؟

ياسين قام من على الكنبه وقال: آداب، وانا كنت اتكلمت مع بابا في الاقتراح ده؛ قالي شوف الي انت عايزه، وكمان وعدني إنه هيظبطني هناك.

إختفى الوش الحزين والمسكين من على وش ناديه وظهر بداله وش الرجل الأخضر، وقامت من على الكنبه هي كمان، ياسين رجع كام خطوة لورا بعد ما حس ان فيه خطورة على حياته لو قرب من أمه في الحالة دي.

نادية بغضب: عاوز تسيب كلية العلوم وتروح كلية الآداب! طيب اقنعني، لا انت نجيب محفوظ ولا طه حسين ولا العقاد، بالعكس؛ دي المواد الأدبية هي اللي نزلت مجموعك، ولا نسيت؟! ده غير إنك وعلى مدار السنين كنت متميز جدا في العلوم والرياضيات.

ياسين بخنقة: يا ماما ولا تميز ولا حاجة، أديني سقطت أهو، ولسة الي جاي، عايزاني أكمل لحد ما اتفصل منها، وساعتها غضب عني هحول أي كلية انتساب؟! معلش يا ماما انا مش هينفع أضيع مستقبلي.

نادية بمنتهى الحزم: هتكمل يا ياسين في علوم وهتشد حيك وهتنجح.

ياسين بتحدي: ماما أنا هحول يعني هحول، وده مستقبلي وأنا
حر فيه.

نادية بعصبية: إفهم يابني، أنا عارفة مصلحتك أكثر منك، اللي
انت بتعمله ده اسمه هروب، مخك بيستسهل وبتقنع نفسك ان آداب
سهلة، وده مش حقيقي.

ياسين برضو بتحدي: ماما! أنا هحولل، متحاوليش.

نادية بضعف وبداية انهيار: مش هتحول.

ياسين بحزم: هحول.

نادية: مش هتحول يا ياسين.

حست انها مش قادرة على ياسين، والولد واضح انه متشبث
برأيه، وده أدى لانهارها عصبياً، وفضلت تبكي بهستيريا وصويت.

ياسين كان أول مرة في حياته يشوف أمه في الحالة دي، إتهز
ياسين جداً، قلبه وجعه على أمه، وحس بغضب شديد تجاه نفسه ...
مكانش عارف يعمل إيه ... فجأة نادية سكتت ووقعت على الأرض،
ياسين بفزع ورعب وقلق سندها وهي بتقع على الأرض لحد ما
استقرت ... فضل يهز أمه ويقولها بصوت بيترعش "ماما! ماما!
ماما!"، دموعه نزلت بغزارة وكمل "قومي يا ماما، والله ما هزعلك،
هكمل يا ماما في الكلية، قومي يا حبيبتي، ماما!!!!!!!!!!!!!!".

استفزاز

"إيه اللي حصل؟! " نادية قالت بعد ما فتحت عينيها، ولقت نفسها نائمة على السرير في أوضة نومها، الكانيولا في إيديها، ومتوصلة بمحلول متعلق على ظهر السرير من فوق.

ياسين بفرحة غامرة مسك إيد أمه اللي متعلق فيها المحلول وفضل يبكي ويبوس فيها،

قال: الحمد لله على سلامتك يا حبيبتي، سامحيني يا أمي بالله عليك، أنا غلطان، مش هعمل كدة تاني، بس انتي متزعليش نفسك يا ست الكل.

نادية حطت إيدها الثانية على راس ياسين اللي حاطط خده على إيديها وعمال يبكي وقالت وعينيها بتدمع: متخافش يا حبيبي، أنا كويسة الحمد لله.

وكملت: يابني أنا بدعي ربنا يمد في عمري عشان خاطرك، عشان مسيبكش لوحداك، كفاية أبوك.

ياسين: طيب بالله عليك ده كلام واحدة لسه في أول الأربعين؟ ربنا يديكي الصحة وطولة العمر، ان شالله مرات أبويا ولا انتي.

نادية: يا واد حرام عليك، إدعي للناس بالهداية أحسن من الدعاء عليهم.

اتعدلت نادية وياسين ساعدها تقعد على السرير،

نادية: إحكي لي إيه اللي حصل بقى؟

ياسين بضيق وخزي: بعد جدالي معاكي امبارح، جالك انهيار عصبي وأغم عليك، شيلتك على هنا وكلمت دكتور زكريا جارنا، جالك هو ومراته على طول كتر خيرهم.

نادية: وقال إيه؟

ياسين بارتياح: طمنا الحمد لله وادالك حقنة مهدئة وعلقك المحلول ده، وقال ان حالتك استقرت وانك هتفوقي ان شاء الله خلال ساعات، وقد كان.

نادية بامتنان: ناس محترمين قوي، ربنا يكرمهم.

ياسين بابتسامة حب: إيه رأيك تخليكي مرتاحة، وأنا هعملك فطار ملوكي.

قام عمل ياسين الفطار والشاي بلبن لنادية، كانت هي طلعت من الحمام وقعدوا على الترابيزة برا في الصالة يفطروا.

ياسين قاعد باصص لأمه وبيتأمل فيها، وعلى وشه ابتسامة فرحة مفارقتش وشه، الخوف والقلق اللي عاشهم طول الليل على أمه وإحساسه إنه كان ممكن يخسرها؛ خلوه يحس بفرحة غير عادية لما فاقت.

كثير النعمة بتكون في إيدينا ومش شايفنها، لكن لما بنحس إنها هتزل؛ ناس بتلحق تفوق، وناس مبتلحقش، ونعمة الأب والأم هي أعظم نعمة بعد نعمة الإسلام، وياسين كان بذرة طيبة وأدرك الكلام ده وراح قايل جوا نفسه "اللهم لك الحمد على نعمة الإسلام وكفى بها نعمة، ولك الحمد على نعمة الأم الصالحة؛ فاللهم ديمهم نعمة".

نادية بابتسامة: مالك يا واد باصصلي ليه كدة؟

ياسين طلع من سرحانه وقال: ولا حاجة يا حبيبتي.

سكت شوية وقال: ماما! انا فكرت كويس في كلامك ورد فعلي، لقيت ان معاكي حق في كل حاجة، وبناءً عليه انا ان شاء الله هكمل والله المستعان.

نادية فرحت جدا وقالت: ربنا يكملك بعقلك يا بني ويعينك.

عدى الترم الثاني والسنة خلصت والنتيجة طلعت، ياسين شال مواد تاني برضو مع المواد اللي كان شايلها من الترم الأول.

ياسين بخزي قال لنادية بعد ظهور النتيجة: معلش يا ماما، والله أنا حاولت بس ان شاء الله هاخذ سمر كورس والسنة الجاية تتعوض.

نادية بهدوء والمرادي هي مش زعلانة قالت: بص يا ياسين؛ أنا عارفة انك إجتهدت وحاولت، بس المشكلة انك كملت عشان خاطري، مش عشان دي حاجة انت عايزها.

نادية مسكت إيد ياسين وكملت: أنا مش زعلانة منك يا حبيبي،
ومش هضغط عليك أكثر من كدة، إيه رأيك تدخل هندسة خاص؟
ياسين باستغراب: لا يا ماما، مش ده اللي انتي عايزاه، وبعدين
هنجيب فلوسها منين؟

نادية بابتسامة: يا حبيبي انا مش عايزة غير سعادتك وان ربنا
يصلح حالك، وإذا كان على الفلوس ربنا هيدبرها من عنده.
ياسين فرح بالفكرة، أخيرا هيدخل حاجة كان عايزها، قال: أيوه
برضو هتجيبني فلوس منين؟

نادية: قولتلك ملكش دعوة، أنا هتصرف.
نادية كلمت أبو ياسين عشان موضوع الكلية الخاصة، أبوه
رفض وبشدة؛ بحجة ان مش معاه فلوس للخاص، وكفاية الفلوس
الي بيبيعتها كل شهر.

نادية قررت انها تبيع جزء من ذهبها مع حته أرض كانت
ورثاها عن المرحوم أبوها وسايباها للزمن، عشان تسد مصاريف
الكلية.

السنة الجديدة ابتدت، دخل ياسين هندسة والفرحة مكانتش
سايغاه.

ياسين حضر أول محاضرة له، والثانية والثالثة و.... عدى ثلاث أسابيع.

ياسين فرحته اتطفت، حاسس إنه تايه، هو ده اللي كان بيعمل عشانه طول ثانوية عامة، ليه بقى تايه؟ ليه مش فرحان؟

ياسين نايم على السرير وباصص في السقف ودماغه مش مبطله تفكير، أصله وقع في فخ للأسف كتير مننا بيقع فيه؛ فخ المنظره والأسماء البراقة.

"نفسك تطلع إيه يا حبيبي لما تكبر؟"، "نفسك تدخل إيه يا حبيبي لما تكبري؟"، "أنا عاوز أطلع دكتور"، "أنا عايزة أكون مهندسة".

أسئلة سخيفة وإجاباتها مجرد كلمات بنردها، عشان طول ما إحنا صغيرين الناس وأهالينا بيشحنوا فينا مصطلح (كليات القمة) واحنا بنردد وراهم من غير ما نفهم إمكانياتنا ومواهبنا ونقط قوتنا وتميزنا.

ياسين إكتشف ده، وفهم إن مش هندسة هي الحاجة اللي هيتميز فيها.

وسط ما هو عمال يفكر، راح في النوم.

ياسين ماشي وعلى ظهره شنطة ثقيلة في شارع طوييييل وفي آخره نهر، الجو حار جدًا والشمس مولعة ... ياسين عمال بيشر عرق.... عطشان جدا وعاوز يوصل النهر عشان يشرب، فضل ماشي

النواة

رجع ياسين كلية العلوم بفكر تاني، وروح ثانية،

مكانش بيسيب محاضرة ولا سكشن، اشتغل شغل من نار في الكلية، الغربية إنه قبل كدة مكانش فاهم المواد وحاسس انها طلاس، لكن الحقيقة اللي وصلها؛ إنه كان قافل على مخه ورافض المحاولة حتى، ده غير إنه حاسس إن مداركه وسعت وقادر يستوعب كم أكبر من المعلومات ومبقاش حاسس انها غريبة زي الأول.

عدت السنة الثانية ليه في علوم وجاب معدل تراكمي 3، وفي الصيف كمل باقي الساعات اللي كانت نقصاه وجاب فيها معدل عالي برضو.

السنة الثالثة بدأت وياسين مخلص كل الساعات اللي كانت عليه في السنتين اللي فاتوا.

ياسين كان بيحب جدًا محاضرات كيمياء الكم والنانو تكنولوجي والنسبية الخاصة، ولذلك كان بيستزيد بالمعلومات حتى اللي برا المنهج، كان بيروح المكتبة ويقرأ كتب في مواضيع كثير، ويروح يتناقش مع الدكاترة بتوع قسمه، والموضوع وصل انه كان بيتناقش مع دكاترة أقسام ثانية غير قسمه، لدرجة ان الدكاترة والطلاب كانوا

بيعتروا ياسين عبقرينو الكلية؛ بسبب تفكيره المتقدم جدًا والغير مألوف.

أثناء رحلته في الكلية؛ ياسين كَوَّن صداقات كثير، مع طلبة ييحبوا العلم زيه، عندهم فكر نقدي بِنَاء، مبيطلعوش من الأوائل لكن عقولهم فذَّة بالنسبة لسنهم لدرجة ان لما حد بيكون عاوز يفهم حاجة من أوائل الدفعات بتاعتهم كان بيروحلهم يشرحوله، وهما دول الشلة اللي بقى بيخرج معاهم في أغلب أوقات فراغه.

كريم طالب في قسم كيمياء ... متطلع ... وطول عمره بيحلم إنه يكون حاجة كبيرة ومشهورة في المستقبل القريب ... أهله بيتثقوا فيه جدًا وفي قراراته.

سارة قسم كيمياء وفيزياء مع ياسين ... بتحب العلم للعلم ... نفسها تعمل نظريات جديدة وتنجح في مجال التطبيق ... أهلها بيخافوا عليها جدًا وخصوصًا من ساعة ما اتعرضت لمحاولة سرقة بالإكراه في الشارع وهي في ثانوي؛ ومن ساعتها وهي ماشية بصاعق كهرباء في شنطتها ... هتموت وتجربه على حد؛ لكن تقريبًا الحرامية والمتحرشين بيشموا ريحة الصاعق في شنطتها ومبيقربولهاش.

لينا قسم علوم الفضاء ... بنت بميت راجل ... ليها دماغها اللي مبركشب مع أي حد بسهولة ... طبعها حاد شوية وعندها استعداد لو حد عملها حاجة دايققتها - سواء ولد أو بنت - انها تضربه حتى لو في الشارع، وفي الغالب ده بسبب تربيتها وسط اربع اخوات وولاد

سنهم قريب من سنها ... طول عمرها بتعلم تعيش في محطة الفضاء الدولية.

أحمد قسم علوم حاسب ... طالع في بيت كله توتر ولوم، أبوه وأمه من الناس اللي عايزة كل حاجة بالمسطرة ... بيهرب من أي موقف يتحط فيه ... بارع في استخدام الكمبيوتر والبرمجة ... حلمه يعمل أليكيكيشن فريد من نوعه وغير قابل للتقليد؛ إيه هو؟ الله أعلم.

وأخيراً محمود قسم حيوان ... بيحب التهريج كتير ودمه تقيل أغلب الوقت ومع كدة محبوب ... محدش يعرف تفاصيل كتيرة عنه أو عن أهله.

لكن الأكيد إن كلهم بيجمع بينهم صفة الذكاء في العلوم وحب العلم، وعدم إدمان السوشيال ميديا، لكن للأسف مش بيقروا حاجة غير في العلوم، لا أخبار ولا أدبيات ولا تاريخ؛ حالهم حال كتير من جيلهم - إلا من رحم ربي؛ ثقافتهم مقتصرة على اللي ببيجي قدامهم عالموبايل وبس.

في يوم، كان فيه محاضرة مجمعة لعدة أقسام - مادة رياضيات - وقبل بداية المحاضرة؛ واحد من الطلاب راح راسم نجمة داوود بالأزرق على ورقة بيضاء وحطها على باب المدرج، وفضل يضحك هو وباقي شلته عشان مستنيين يشوفوا رد فعل الدكتور إيه، وباقي الطلبة؛ منهم اللي ضحك ومنهم اللي مهتمش ومنهم اللي فاتح موبايله

وعمال ينزل ستوريز والي بتعمل ستريكات، ودول كانوا أغلبية، لحد الدكتور ما دخل، والكل بدأوا ينتبهوا.

الدكتور حط شنتطه، ولسة هيتكلم؛ لمح الرسمة، وراح قايل بمنتهى الاستنكار: إيه ده!!!

بعض الولاد كانوا بيضحكوا، وواحد منهم قال: أكيد حد بيهزر يا دكتور.

الدكتور بصلهم بضيق، لكنه أدرك إن الجيل ده ميعرفش ومشافش حاجة، كان ممكن يشيل الرسمة ويهزقهم بكلمتين، أو يعدي الموقف، أو يتصرف بعنف، لكنه قرر إنه لازم يديهم درس؛ يمكن ساعتها يعرفوا ويفهموا الحقيقة، الدكتور وقف قدام الكل وبصلهم في عينيهم وسط ترقب الطلاب لرد فعله وقال: متى تم إعلان قيام دولة الاحتلال في الأراضي الفلسطينية؟

وبص حواليه، مفيش غير خمسة ستة اللي رافعين إيديهم من أصل 300 طالب،

كمل الدكتور: طيب كيف قامت هذه الدولة؟

عدد اللي رافعين إيديهم زاد، فرح الدكتور وشاور لطالبة منهم عشان تجاوب: يا دكتور الفلسطينيين هما اللي باعوا أرضهم من البداية.

الدكتور امتعض وحزن وسكت شوية وقال: كام واحد موافق على الإجابة بتاعة زميلتكم؟

كثير رفعوا أيديهم.

كمل الدكتور من غير ما يبين أي تعبير على وشه: كام واحد فيكم
يعرف محمد الدرّة؟

ولا واحد رفع إيده،

كمل: علم أمريكا فيه كام نجمة؟

عدد مش قليل رفعوا أيديهم،

كمل: النسر في علم مصر باصص يمين ولا شمال؟

ثلاثة رفعوا أيديهم.

المرج كان بيخيم عليه صمت رهيب، والطلاب كانوا كلهم
منتبهين ومصدومين،

الدكتور بابتسامة كمل: أولا تم إعلان دولة إسرائيل سنة 1948،
قبلها معظم الأراضي التي حصل عليها المحتلين؛ كانت بالإحتيال
ووضع اليد*، وكل ما أُخِذَ بهذه الطريقة من أراضي لا يتجاوز 5.1%
من مساحة فلسطين، والباقي تم الإستيلاء عليه بالترهيب والترويع
والمذابح التي من أشهرها مذبحه دير ياسين، وغيرها كتبيبيير. ومحمد
الدرّة ده مهمما حكيت؛ لن يكون كالمشاهدة. أما عن النسر فهو باصص
يمين من التيمن.

الدكتور بص في السقف وأخذ نفس عميق، رجع بص تاني
للطلاب وقال وهو متأثر: أنا مش عايز أقول كم الإحباط اللي انا فيه؛

لكني لا ألوم عليكم، فأنتم لم تجدوا من يعلمكم، ووقعتم في فخ الإعلام الغربي والأفلام التي من خلالها يحاولون دائماً ترسيخ كم هم أقوياء؛ لا يقهرون ووطنيين وديمقراطيين وأحرار و"أصحاب أصول عريقة" في عقولنا، وللأسف نجحوا في ذلك، حتى لغتنا العربية استبدلناها بالفرانكو وجعلنا نستبدل كلمات عربية بأخرى إنجليزية وبتكلم لغة مكس، وها أنا أمامكم أتحدث اللغة العربية وكلي فخر رغم أنني أستاذ دكتور في كلية العلوم وآخر مرة درست فيها اللغة العربية كان سني أصغر من سنكم، لكني لم أتخلى عنها.¹

سكت شوية وحط عينه في عندهم بالتبادل وكمل بمنتهى الحزم: ولذلك قررت ان امتحان الميد تيرم سيكون في الأسئلة التي سألتها آنفاً وعليها 70% زائد المادة العلمية التي ندرسها وعليها 30% من درجة الامتحان.

الولاد طلغوا من المحاضرة محدش فيهم بيتكلم ... مصدومين ... والشئ الإيجابي في الموضوع؛ إنهم كانوا متأثرين بكلام الدكتور جداً؛ لدرجة ان بعد الامتحان؛ درجات الولاد كانت من أعلى الدرجات اللي شافتها امتحانات الميد تيرم في كلية العلوم على مر السنين، وربنا يبارك لكل شخص بينشر الوعي وسط الشباب.

¹ * الأراضي تسربت لليهود عن طريق منح حكومية بريطانية لأراضي فلسطين الأميرية "أراضي الدولة"، أو عن طريق ملاك إقطاعيين كبار غير فلسطينيين كانوا يقيمون في الخارج، ومنعوا عملياً ورسمياً من الدخول إلى هذه المنطقة (تحت الاحتلال البريطاني) لاستثمار أرضهم إن كانوا يرغبون بذلك فعلاً.

ياسين وشلته عندهم فتحت على حاجات مكانوش شايفنها قبل كدة، وكل واحد فيهم من جواه حس إن عليه مسئولية كبيرة تجاه القضية وتجاه بلده، والمسئولية ليها أشكال كتير، من ضمنها ... التفوق العلمي، ولكن معه يجب معرفة التاريخ وزيادة ثقافتهم العامة، ومتابعة الأخبار من مصادر موثوقة، وترسخت بداخلهم حقيقة واحدة:

من أجل تزييف التاريخ، أو طمسه، عليك أن تمحينا من الوجود، ولكن طالما حيينا، سَيَسْلَمُ كل جيل مَن بعده الراية؛ الراية المزيينة بدماء ضحاياكم الزكية، فهي الشاهد على مؤامراتكم الدنيئة على مر العصور، وكما قال بن جوريون

"الكبار يموتون ... والصغار ينسون"

فكان الرد عملياً أن "كبارنا خالدين ... وصغارنا ذاكرين".

الفكرة

في مرة وجزء من الشلة قاعدين مع بعض؛ كريم كان ماسك القلم
في إيدته وعمال يبصله بتركيز شديد،

محمود بتهكم وهو مبتسم قال: مالك يا كريم؟ أنت كويس يا
حبيبي؟

كريم من غير ما يفقد تركيزه رد: انهاردة سمعت معلومة فعلا
حسستني ان انا غبي فحت.

سارة: إيه ياسطى؟

ياسين بصلها بقرف وقال: ياسطى؟! انتوا بنات انتوا!

محمود: الله يباركله صاحب التيك توك.

سارة بصتلهم هما الاتنين بغضب وعينيها بتطق شرار.

كريم بنرفزة: هو تقريبا انا كنت بتكلم في موضوع مهم؟!

كلهم اتنحنحو واعتذروا،

كريم كمل بهدوء: الدكتور كان بيتكلم معنا عن طبيعة الأجسام

وسأل سؤال عادي جداً، طبعاً كلنا استنفهنا السؤال وحسينا بإهانة،

"ياترى أي حاجة بتتكون من إيه؟".

فضل كريم باصصلهم وساكت مستني حد يرد، وهما باصين
ومش عارفين ايه المطلوب،

محمود اتعدل بحدة شوية وقال: هو احنا المفروض نرد
والحديث يكون رايح جاي وكدة؟

كريم بابتسامة تهكمية: يعني أكون شاكر أفضالكم.
محمود بجدية: بتتكون من ذرات.

كريم بابتسامة: جميل جداً، طيب والذرات دي بتتكون من إيه؟
سارة بنوع من الزهق: من إلكترونز وبروتونز ونيوترونز.

كريم بحماس: إثبت بقى منك ليها، طيب الإلكترونات شحنتها
إيه؟

محمود بعد ما اتخض من حماس كريم الزيادة قال: سالبة.

كريم رفع حاجب واحد وقال: طيب هي مش الإلكترونات بتلف
حوالين النواة وبينهم بيكون فراغ، يبقى ازاي احنا بنقدر نمسك
الأشياء في حين ان سطح إيدينا وسطح الأشياء عبارة عن إلكترونات
والسالب والسالب بيتنافرووا؟

كلهم بصوا لبعض وحسوا نفس إحساس كريم؛ بالغباء، إزاي
مفكروش في حاجة زي دي قبل كدة، ياسين عينه نورت وقال: يبقى
معنى كدة ان في الحقيقة احنا مش بنمسك حاجة فعليا والإحساس

والدة كريم ووالده بقلق وصلوا أوضة كريم بسرعة بعد صوت الزعيق
بتاعه،

كريم وهو بينهج ومرعوب: أنا كويس يا جماعة متقلقوش،
شكله كان كابوس.

كريم شرب شوية مياه وكمل نوم بس المرادي والنور مفتوح.

تاني يوم ف الكلية وفي وقت البريك اتجمعت الشلة كالعادة،
أحمد قال لسارة: مالك يا بنتي عينك منفخة ليه؟ انتي منمتيش
من امبارح؟

سارة بإرهاق: اسكت يا أحمد يا أخي، ده أنا اتفلقت امبارح،
طول الليل كوابيس.

وبصت لياسين بغيظ وكملت: ده غير ان كان فيه حد عمال يكتم
في نفسي لما كنت هموت.

كريم بص لسارة باستغراب وقال: إنتي بتتكلمي جد؟! أصل ده
نفس اللي حصل معايا امبارح بالظبط، طيب سمعته بيقول حاجة؟

سارة باستغراب: آه، قال كلمة كدة مفهمتهاش، وحاولت
افتكرها؛ مجتش سكة معايا خالص، وانت كمان؟!

كريم بخيبة أمل: للأسف آه.

لينا: النظرية النسبية بتقول ان أي شيء تزداد سرعته؛ يحدث
ليه تباطؤ في الزمن، ولما يوصل لسرعة الضوء الزمن بتاعه بيوقف، ولو
زادت سرعته عن سرعة الضوء بيتدي يمشي بالعكس، يعني يرجع في
الزمن.

محمود راح داخل في الحوار وقال بابتسامة: يا جدعان! عارفين
لو واحد لف حوالين شجرة بسرعة الضوء هيحصل إيه؟ هيشوف
حلمة ودنه، هههههههههه.

ياسين بص لكريم وقال وهو بيجز على سنانه: يا كريم! فاكر
آخر مرة لعبنا فيها ومحمود طلع الشايب؛ الحكم عليه اتنفذ؟

وراح باصص على إزاة المياه اللي قدام كريم،

كريم وهو بيتناول الإزاة في الخباثة قال بابتسامة: لا متنفذش.

محمود حس بغدر، لكن قبل ما يلحق ياخذ حذره؛ كان كريم
دالِق إزاة المياه على دماغ محمود اللي اتنفض وفتح بقه، وراسه نزلها
لتحت وطلعها قدام والمياه عمالة تنقط منه وقال بدهشة غلبها الغيظ
والصوت العالي: أآآآآآح، ليه الغباوة دي ياسطى؟! سارة بفرحة مليانة
بالتشفي: تستاهل.

محمود بغضب: ماشي يا جدعان براحتكم، بس افكروها.

وراح لامم حاجته وماشى،

لينا قالت بتهكم: متزعلش يا محمود، أصل أحكام الشايب
مبتكونش مع إيقاف التنفيذ.

وكلهم فضلوا يضحكوا، إلا أحمد كان ساكت وسرحان،

كريم قال لأحمد: مالك يا بوب؟

أحمد: مش عارف، بس حاسس بحاجة غريبة بتقول اني شوفت
الموقف ده قبل كدة.

لينا: فعلا، احنا ياما محمود خنق علينا وياما انتقمنا منه.

سارة: ياما دي جافو.

ياسين قاطعهم وكمل الحديث: طيب نكمل كلامنا؛ ليه يا سارة

انتي وكريم مش مؤيدين للفكرة؟

سارة: ازاى ارجع في الزمن وانا أصلا مكنتش جزء منه؟ بمعنى؛

لو مثلاً الجمعة اللي فاتت، احنا متقابلناش، صح؟

ياسين: تمام.

سارة: انا رجعت في الزمن ليوم الجمعة اللي فاتت؛ هل ممكن

اقابلك؟ من منظور المؤيدين للنظرية ينفع، لكن فعليا طالما انت

مشوفتنيش يوم الجمعة في الزمن الفعلي، يبقى مينفعش تشوفني في

الماضي.

كريم كمل: مش بس كدة؛ لو اعتبرنا ان عندي شارع مستقيم،

وانا مشيت فيه من أوله لآخره، ولما وصلت رجعت في الزمن وخلت

النسخة القديمة مني متمشيش للآخر؛ يبقى هنا انا رجعت في الزمن لما نسختي القديمة مشيت لآخر الشارع، ده ترتب عليه رجوعي في الزمن، يعني لو الحدث محصلش المفروض المترتب عليه برضو محصلش.

أحمد: يا جدعان بس في نظرية بتقول ان اللي بيرجع في الماضي بيخلق خط زمني جديد موازي.

ياسين: أهو انا بقى مش قادر أقتنع بالكلام ده، يعني انا رجعت في الزمن مرة هكون سبب في تكوين خط زمني مختلف، ولو رجعت 100 مرة هبقى سببت وجود 100 خط زمني؟!، طيب الخط القديم راح فين؟ ومعنى كدة اني اختفيت منه وعمري ما هقدر ارجعله.

لينا: دي كلها نظريات وهفضل نظريات لحد ما حد يقدر يختبرها.

سارة: مختلفناش ان كلها نظريات بس للأسف بتفتقر للمنطق في رأيي المتواضع، ولما تيجي تكلمهم في ده يقولك أصل دي "مفارقة".

أحمد بص للينا وقال: وبعدين يا لينا انتي بتقولي عشان نرجع في الماضي لازم سرعتنا تزيد عن سرعة الضوء؛ في حين ان ده عمليا مستحيل، لأن عند سرعة الضوء كتلة الجسم المتحرك هتفضل تزيد لحد مالانهاية.

لينا هزت راسها بعلامة إقتناع، وبصت لياسين وقالت: طيب انت سمعت رأينا، انت رأيك ايه؟ ياسين سرح شوية وقال: لا انا الموضوع

بالنسبالي رايح في حته تانية خالص، بس انا لسة في مرحلة تجميع المعلومات.

أحمد باستغراب: معلومات لإيه؟

ياسين بابتسامة وعين لامعة: نظرية هتقلب الدنيا لو قدرت أثبتها.

وبصلهم وكمل بحماس: وانتم معايا طبعًا.

هو قال الكلمة من هنا وكلهم أجسامهم اقشعرت واتحمسوا جدا.

بخار

ياسين قاعد في أوضته قدام اللاب بتاعه بيذاكر بالليل ومركز
جداً، أصل الإمتحانات على الأبواب، شوية والنوم غلب عليه، قال ينام
ساعتين ويقوم يكمل على الفجر، ونام ياسين.

"إيه ده أنا بطير" ياسين فرحان جدا انه بيطير، أصله مكانش
عارف إنه يقدر، فضل يطير ل فوق والمباني عمالة تصغر، بيعدي من
فوق بحار وأراضي خضرة ... ياسين فجأة لقي نفسه جوا بيته، بس
البيت مبهدل، وفي راجل مريب ياسين فاكر انه شافه قبل كدة،

ياسين باستغراب: هو ليه البيت مبهدل كدة؟!

الراجل بهدوء: لازم يفضل مبهدل.

ياسين بصله باستغراب وبدأ يشتغل في توضيب البيت،

الراجل بغضب: قولتلك متوضبش حاجة.

ياسين حس بخطر ... لازم يكلمه يحذره ... جري على التلفون

وكلمه وقال: ركز في اللي انت جاي عشانه، وخلي بالك؛ هو هنا.

الراجل راح مطلع مسدس وضرب ياسين في صدره.

ياسين صرخ "آآآه" ... صحي من النوم وبص حواليه في زعر،

صوت نفسه كان عالي وسريع، حط إيده على صدره يطمئن على نفسه،

ملقاش طلق نار ولا غيره، بس صدره بيتألم مكان الضربة، قام شرب مياه وإطمنن على أمه في أوضتها وهي نائمة وتوضأ وصلّى الفجر وكمل مذاكرة.

الإمتحانات دخلت والطلبة متوترين كالعادة، إلا الشلة، لأن أمتع أيام عندهم هي أيام الإمتحانات،

مذاكرة صبح ومذاكرة ليل مع شوية هزار لما بيذاكروا مع بعض، وبالرغم ان فيه بعض المواد غير مشتركة بينهم لكن بسبب إطلاعهم وحبهم للعلم؛ كان فيه كيمياء بينهم وبين بعض اثناء المذاكرة الجماعية، خصوصا ياسين، كان مُلم بكثير من علوم الفضاء والكيمياء والفيزياء والبعض من علوم الأحياء والحاسب الآلي.

خلصت الإمتحانات وطلعت النتيجة وكلهم جابوا امتياز.

خرجوا يوم النتيجة يحتفلوا مع بعض ومعاهم أهاليهم، الأهالي اتعرفوا على بعض وتجاذبوا أطراف الحديث وسابوا الولاد يقعدوا مع بعض.

لينا: يا جدعان انا مبسوفة جدا بصحبتنا دي والله.

أحمد بتأييد: فعلا إحنا ربنا كرمنا ببعض عشان كل واحد فينا يعلي التانيين.

محمود: أنا عايز أقولكم ان الناس بتحقد علينا.

سارة: إشمعنا؟

محمود: لأننا بنخرج وبنهزر وفي نفس الوقت بنذاكر وبنجيب تقديرات.

سارة: عندك حق يا محمود، للأسف ناس كتير فاكرة إنك لو بطلت مذاكرة لحظة، يبقى انت مقصر، ولازم أفضل عالكتاب 24 ساعة.

كريم: يا بنتي دول في الغالب بتلاقيهم بعد ما بيتعينوا بيكونوا أكثر ناس معقدين، وبيطلعوا عقدهم على الطلبة، ويا ويك لو وقعتي مع حد منهم وحس انك من اللي بيخرجوا ويتفسحوا وبيجيبو تقديرات؛ تلاقيه حطك في دماغه وينزلك في الدرجات.

أحمد: إنت بتقول فيها، ما ده حاصل معانا كلنا، آمال إحنا مش بنرتب ليه.

لينا: بس على النقيض؛ فيه دكاترة تانيين تلاقيهم في ظهرك ويدولك حقك وبيجنبوا أي إختلافات وبيعاملك بما يرضي الله، ودول الغالبية من دكاترتنا.

سارة: الحمد لله، أي مكان فيه الحلو وفيه الوحش، وفي الآخر؛ ربنا مش بيضيع مجهود حد.

كلهم قالوا "ونعم بالله"،

كريم باستغراب: انت باباك ومامتك مجوش ليه يا محمود؟

أحمد: صحيح يا محمود؛ إحنا عمرنا مشوفناهم.
محمود بتوتر: لا أصل بابا على طول مشغول ، وماما ملهاش في
أجواء الحفلات ده.
محمود بص لياسين اللي قاعد ساكت ومسهم باستغراب وقال
للباقيين بتهكم: يا جدعان حد فيكم شاف ياسين انهاردة؟
كريم بابتسامة شريرة بص على ياسين بطرف عينه وقال: يا عم
الحمد لله انه مجاش، مش طالبة بواخة.
وقعدوا يضحكوا وحتى ياسين ضحك بس بغيظ، سارة: مالك يا
ياسو مش معنا ليه؟
ياسين: دماغي هتثت مني.
كريم: عشان الحوار الي انت مش راضي تقولنا عليه؟
ياسين: هو ده.
سارة: طيب إيه؟ أما أن الأوان.
ياسين: شوفوا في أي وقت نتجمع في الأكاديمية بتاعة ماما لينا
عشان هنحتاج قاعة وسمارت بورد. لينا: تمام، ممكن يوم الجمعة
الجاية، عشان تبقى الأكاديمي أجاهه.
محمود: معلش يا لينا لو سمحتيلي يعني، الراجل لما أتكلم قال
(أكاديمية)، ممكن أعرف ليه حضرتك بتقوليها (أكاديمي).

لينا عينها طقت شرار وقالت لكريم وهي بتجزّ على سنانها
ومبرقة لمحمود: كريم! هو آخر مرة لعبنا فيها الشايب، كان مين اللي
عليه الحكم؟

محمود راح ناطط من وسطهم وهو بيقول: لااا مش كل مرة،
والموضوع ده لو اتكرر تاني؛ أنا مش هحلف لكن آآآآآآآح.

والكل وقع على روحه من الضحك، أصل محمود وهو بيرجع لورا
خبط في الويتر بتاع الكافيه، وكوباية عصير كامله اتدلقت عليه.

ياسين وسط ما هو بيضحك شايف راجل ببدلة واقف برا
الكافيه وباصص عليهم من الواجهة الإزاز بتركيز، عينه في عين ياسين
من غير ما حتى ترمش، ياسين قلبه اتقبض،

ياسين اتلفت لكريم وقال: كريم! انت تعرف الراجل اللي واقف
برا ده؟

كريم بص وقال: مين فين؟!

ياسين رجع بص تاني ناحية الراجل وقال: الراجل اللي

سكت ياسين، وعينه برقت، أصل الراجل إتبخر.

العبقرية

يوم الجمعة قاعدين الولاد كلهم في الأكاديمية.

ياسين حط اللاب بتاعه على التراييزة ووصله بالسمارت بورد.

ياسين بمنتهى الحماس والجدية: قبل ما أبدأ عندي طلب؛ ركزوا

معايا قوي، ومحمود؛ بعد إذتك بلاش هزار خالص دلوقتي.

محمود بابتسامة: هحاول امسك نفسي.

ياسين بمنتهى الحماس: طيب كله يركز معايا من فضلكم.

وقف ياسين قدام الكل وبدأ يؤدي ولا كانه واقف على مسرح

وقال: الموضوع كله بدأ من الانفجار العظيم، أياً ما كان موجود؛ من

قوة الانفجار فضلت سرعته في تزايد، وده اللي خلى الكون بيتمدد،

وسرعة الكون عدت سرعة الضوء بمراحل.

لينا: كلام منطقي، وفيه نظريات بالفعل بتقول كدة.

ياسين كامل: طيب مش المفروض فيه علاقة عكسية بين الزمن

والسرعة؟

سارة: مظبوط، كل السرعة ما زادت؛ الزمن يتباطأ.

ياسين: طيب تخيلوا معايا كدة ان الكون سرعته بتقرب من

سرعة الضوء، إيه اللي هيجصل؟

محمود: الزمن هيكون أبطأ.

كريم: ولما نوصل لسرعة الضوء الزمن يتوقف.

أحمد: ولما تزيد السرعة عن سرعة الضوء الزمن يمشي بالعكس،
يروح الماضي.

ياسين: يبقى كده عند سرعة صفر هنقول ان الزمن حاضر،
وعند سرعة الضوء الزمن هيكون صفر، وعند سرعة أعلى من سرعة
الضوء الزمن هيكون ماضي.

ياسين أخذ نفس عميق وهو باصص عليهم وكلهم الحيرة
مرسومة على وشوشهم، وبابتسامة ياسين كمل: احنا اتكلمنا قبل كدة
على موضوع السفر عبر الزمن، وسألتوني عن رأيي، ورأيي هو ان
عشان ارجع للماضي لازم سرعتي تعدي سرعة الضوء، لكن إنني أقف
في زمن معين؛ ده مستحيل، لإن وبمنتهى البساطة لو سرعتنا قلّت
الزمن هيرجع يمشي للحاضر، ولو وقفنا هنرجع للنقطة الزمنية اللي
اتحركنا منها بالفعل، وده بيقول ان عمرنا ما نقدر نساfer عبر الزمن
ونغير حاجة لأن شرط العودة في الزمن هو البقاء متحركا، مش كدة
وبس، ده لازم سرعتنا تفضل في تزايد.

محمود: عايز تقنعني ان كل النظريات والأفلام اللي اتبنت عليها

غلط في غلط؟

ياسين: فعلاً.

كريم: يعني انت بتقول إيه كدة؟

ياسين: الكون لما فضل يتسارع وتخطى سرعة الضوء وفضل في تسارع دام كثير، عند لحظة معينة التسارع ابتدئ يقل، وهنا الرجوع في الزمن تحوّل من الإتجاه للخلف إلى الاتجاه للأمام، وتمدد الكون ابتدئ يقل.

أحمد: انا مش فاهم حاجة؛ يعني ايه تسارع بيقل وتمدد بيقل؟! إما بيتسارع أو لأ، وإما بيتمدد أو لأ.

ياسين: هبسطها لك، أبوك وانت في ابتدائي عملك مصروف اسبوعي 25 جنيه، وجه السنة اللي بعدها خلاه 50 جنيه، يبقى كدة هو زودك ولا لأ؟

أحمد: زودني 25 جنيه.

ياسين: تمام، طيب السنة اللي بعدها مصروفك بقى 80 جنيه في الأسبوع، يبقى كدة الزيادة كام؟

كريم: 30 جنيه.

أحمد: يعني كدة الزيادة المفروض 25 جنيه، هو راح مزود الزيادة وخلاها 30 جنيه.

ياسين: الله ينور عليك، طيب جه السنة اللي بعدها مصروفك زاد من 80 أصبح 100 جنيه.

لينا: يعني كدة الزيادة بقت 20 جنيه بس، يعني الزيادة نفسها قلت.

ياسين: تماااااااا، يبقى معنى الكلام ان فيه زيادة في السرعة، لكن مش زي الي قبلها، فيه زيادة في التمدد لكن مش زي الي قبلها.
سارة: انت كدة كلامك رايح في سكة ان زمن الكون ماشي عكس زماننا.

ياسين بابتسامة قال: لا يا سارة، مش عكسنا ولا حاجة، بل على العكس تماما احنا ماشيين على حسب الكون ما هو ماشي.

لينا: النظرية بتقول ان لو حد قاعد جوا قطر مثلا؛ المفروض إنه مش بيتحرك، بس ده بالنسبة للي معاه في نفس القطر، لكنه بالفعل بيتحرك بسرعة القطر بالنسبة لواحد واقف على المحطة والقطر معدي من قدامه، والدليل على كدة، انك لو راكب عربية وماشى بسرعة 100 كم/س وعربية تانية ماشية بنفس السرعة جمبك؛ بالنسبالك هتكون عربيته مش بتتحرك، وبالنسباله عربيتك مش بتتحرك.

ياسين: كل حاجة في الكون بتتحرك من أكبر لأصغر حاجة، الأرض بتلف حوالين نفسها بسرعة معينة، وبتلف حوالين الشمس، والشمس بالكواكب بتلف حوالين مركز المجرة، والمجرة بتلف حوالين مركز الكون، والكون نفسه بيتحرك، واحنا جزء من النظام ده كله، يبقى احنا بنتحرك بنفس سرعة كل الي فات ده.

أحمد "والإستنتاج؟"،

ياسين بصلهم بابتسامة نصر ورسم على السبورة الذكية رسم بياني توضيحي وعلاقة بين الخط الزمني وسرعة الكون وبصلهم

وقال: يا دكاترة كدة الكون بدأ في نقطة؛ فضل منها يرجع في الماضي، وقبل التسارع ما يقل، كان الكون وصل لأبعد نقطة في الماضي، ولما التسارع ابتدى يقل، كدة الكون مشي ناحية الحاضر، والموضوع ده خلق عالمين ماشيين عكس بعض؛ العالم بحياتنا اللي عيشناها بالفعل؛ وعالم هو عبارة عن الإعادة لحياتنا اللي عيشناها، من الآخر كدة، مستقبلنا الفعلى هو الماضي بتاعنا والمستقبل بتاعنا هو الماضي الفعلي.

الصمت خيم على المكان وصوت صرصور الحقل كان شغال في دماغ كل واحد وعلامات الذهول على وشوشهم لمدة دقيقتين عدوا كأنهم ساعتين.

كريم قطع الصمت وقال: لو كلامك ده صحيح، ده معناه اننا عيشنا حياتنا دي قبل كدة، ودي تاني مرة!

سؤال كريم كان صدمة للكل،

ياسين: لو نظريتي صح، يبقى اللي بتقوله حقيقي، أو حاجة تانية، إحنا مش عايشنها تاني؛ إحنا بنتفرج عليها.

أحمد عقد حواجه وقال: بس ده مستحيل.

ياسين: فيه شواهد يا أحمد، زي الديقاقو اللي بيحصل كتير اننا نشوف موقف نحس إنه متكرر.

وسكت ياسين وبصلهم وقال: والموضوع الأهم واللي مبني عليه فكرتي "الأحلام"؛ كلها لحظات بنتجرد فيها من عامل الزمان

والمكان، وهي الي ممكن يكون فيها مفتاح الحقيقة؛ الي بتفسر المعنى الحقيقي للزمان والمكان.

كريم: طيب وده اشمعنا بيحصل في النوم؟

ياسين: انا أعتقد ان في النوم عقولنا بتتحرر من قيود الأبعاد زي الزمان والمكان، وبتنتقل لبعد آخر، البوابة بينهم بتكون في اللحظات الي بين النوم والصحيان، عارفينها اللحظات دي؟

كريم وسارة بصوا لبعض ورد كريم وقال: آه دي اللحظات الي تقريبا العفاريت بتيجي تطبق على نفسنا وبتقول فيها حاجات غريبة.

ياسين: بالظبط كدة، أنا قرئت أبحاث كتير في الموضوع ده، واللي وصلته كالتالي...الموضوع كله موجات كهرومغناطيسية وحالة طاقة معينة المخ بيدخل فيها، لو احنا بقى قدرنا نوصل لتردد الموجات دي ووصلناها بمخنا وبجهاز كمبيوتر؛ هنقدر نعرف الحقيقة.

محمود بذهول: طيب واحنا هنستفيد إيه، ما اليابانيين قدروا يحولوا حلم بني آدم لصور؟!

ياسين بابتسامة: الفكرة اننا هنقدر نسبق اليابانيين في موضوع تصوير الأحلام، ونعمل زي انسبشن؛ وتدخل أحلامك وتستكشف العالم الخفي بتاع كل واحد فينا، وده أكيد هيخلينا نتعلم كتير عن المخ البشري.

سارة: طيب وبالنسبة ان احنا ساعات بنحلم بناس عمرنا ما شفناهم قبل كدة، ونكتشف انهم ناس حقيقيين؟

ياسين: أعتقد إنك بتكوني شوفتيهم قبل كدة في صورة أو سمعتي عنهم ومش فاكرة، أو تكوني شوفتيهم في حياتك "الفعلية"؛ لكن عقلك الباطن ببسجل كل حاجة، وبما انك محبوسة في الإعادة "اللي هي الحياه الي احنا فيها دلوقتي" فمش فكراهم.

سارة بلّمت وياسين مقدرش يمك نفسة من الضحك على شكلها ... وده خلى سارة استشاطت من الغيظ من ياسين اللي كمل: ده غير ان ممكن يكون فيه إمكانية انك تتفرجي على حياتك من أول ما اتولدت لحد ربنا يديكي طولة العمر بقى.

لينا بعنين بتلمع: يعني ممكن الواحد يقدر يتحرك في الزمن بتاعه براحتة، وساعتها قانون زيادة الكتلة بزيادة السرعة حتى تصل للملانهاية مش هيكون ليه أي تأثير.

محمود بابتسامة: انا ليه حاسس انك شمتانة في أينشتاين؟

ولأول مرة محمود يقول حاجة أصحابه يضحكوا عليها بجد، وبعد ما خلصوا ضحك، الحماس غلب عليهم كلهم وهمّتهم زادت، وانفقوا انهم بابتدوا أبحاث وشغل على الموضوع ده من لحظة خروجهم، وفي منتهى السرية، لأن المشروع ده مش بس تذكرة دخول للأماكن المحظورة في مخنا؛ ده ممكن يخليك تشوف ماضيك وحاضرک ومستقبلک.

استقطاب

مع بداية شهر أغسطس؛ الولاد كل واحد فيهم اختار مادة ياخذها سمر كورس؛ تقلل من عليهم الضغط في سنة رابعة، وفي نفس الوقت تكون حجة لمرواحهم الكلية في الصيف، لأنهم كانوا محتاجين معمل يعملوا فيه تجاربهم الخاصة بالمشروع بتاعهم، فقرروا يستعينوا بدكتور عزام - معيد في قسم الفيزياء وصاحب أخو كريم الكبير - وكان بيكن كل الإحترام لياسين وباقي زملائه اللي سمعتهم بين الدكاترة والمعيدين طيبة ويحبوهم، وهما كانوا بيعتبروه أخوهم الكبير اللي دايمًا يلجؤوله في الشدائد، أقنعوه يستخدموا المعمل وموارده في غير أوقات السكاشن، وعرضوا عليه جزء من الفكرة بتاعتهم وطلبوا منه يكون معاهم، لكنه إعتذر بشياكة وشجعهم إنهم يشتغلوا لوحدهم من غير أي حد من الدكاترة، وأي حد يسألهم؛ يقولوا انهم شغالين على مشروع التخرج، ولو احتاجوا حاجة هو مش هيتأخر عنهم.

ترددهم على المعمل كان بصفة شبه يومية، بعد ما بيخلصوا محاضراتهم وسكاشنهم.

في يوم، الأستاذ الدكتور عصام بقسم الفيزياء والمعروف إنه
واصل وعلاقاته كثير جوا وبراً مصر، طلبهم عنده في المكتب، دخلوا
كلهم وهو شاورلهم يقعدوا،

أ.د عصام بابتسامة: ها؛ تشربوا إيه يا شباب؟

سارة بصت لزملائها وبعدين للدكتور وقالت بريبة: شكرا يا
دكتور لسة شاربين من الكافيتيريا.

عصام بجدية: على راحتكم، ندخل في الموضوع.

سكت ثواني وبنظرات ثاقبة وابتسامه بصلهم وقال: إحكولي
بقى على المشروع بتاعكم اللي بقالكم تقريباً شهر شغالين عليه.

كلهم سكتوا وبصوا لبعض ولياسين، مش عارفين يردوا يقولوا
إيه، ياسين بابتسامة مصطنعة: ده مشروع عادي خالص يا دكتور.

د عصام: ياسين! انا مش عبيط عشان مبقاش فاهم اللي
بيحصل، والي انتو بتعملوه أو شغالين عليه ده حاجة مختلفة، مش
مجرد مشروع تخرج.

كلهم بصوا لبعض بقلق..

د عصام كمل: والقلق اللي واضح على وشوشكم يؤكد إنكم
مخبين حاجة.

كمل د عصام: بصوا يا ولاد إنتم زي ولادي بالظبط، وماشاء الله
عليكم دماغكم ذرية، إنتم عمركم شفتوا مني حاجة وحشة قبل كدة؟

سارة: أبدأ يا دكتور.

د عصام: طيب امال ليه خايفين مني؟ بالعكس انا أقدر أوفرلكم كل حاجة انتو عايزنها وفي أي وقت، ها بقى، إيه الموضوع؟

ياسين سمع كلام الدكتور وفكر فيه، فعلا د عصام دايمًا معروف عنه إنه صديق الطلبة، ولما كان بيشفوف في حد الموهبة كان بيوقف جمبه ومش بيسييه، ده غير إن كل الطلبة اللي كان بييساعدهم شغالين في جامعات عالمية وأبحاثهم مكسرة الدنيا.

ياسين بص لزمائله وبعدين للدكتور عصام وشرح النظرية بتاعته بس بدون الخوض في تفاصيل وباختصار شديد.

د عصام بعد ما سمع منهم سكت شوية، مظهرش عليه أي حاجة تدل على انبهاره بالفكرة؛ وده سبب إحساس مزعج لياسين.

لينا بتوتر: يعني مقولتلناش رأي حضرتك يا دكتور.

د عصام: عشان اللي بتقولوه ده حاجة من اتنين، إما تخريف، أو إنه حاجة في منتهى الخطورة، وأنا - من غير زعل - أعتقد إنه حماس شباب زايد حبتين.

الكل بصوا لبعض وبصوا للدكتور بإحباط.

د عصام كمل: على كل حال سيبوني أفكر وأرد عليكم... إنفضلوا

انتوا دلوقتي.

مشيت الشلة وهما محبطين وروحوا من غير ما حد فيهم ينطق
أي كلمة.

ياسين لحد ثاني يوم وهو قاعد في الأوضة بتاعته، مش بيكلم حد
ولا حتى بيرد على أصحابه، وقافل النت، ده غير رقم غريب عمال بيرن
عليه من الصباح، بالليل تليفون ياسين رن ثاني، نفس الرقم الغريب،
ياسين نفض ومردش....التليفون رن ثاني وتالت من نفس النمرة؛
وأخيرا ياسين رد.

ياسين: ألو.... د عصام! أهلا أهلا.... آه يا دكتور انا موجود في
البيت..... تشرف طبعاً..... في انتظار حضرتك.....طيب مش هتاخذ
العنوان.....تمام.

ياسين: يا ترى عاوزني ف إيه؟ هو مش قال "حماس شباب"،
وعرف عنواني مين؟!
وقام راح لمامته،

ياسين: ماما! في ضيف جايلنا دلوقتي.

نادية: ضيف مين ده؟!

ياسين: دكتور عصام من الكلية عندي.

نادية استغربت وارتبكت: د عصام مين، وإيه سبب الزيارة

يعني؟

مفيش خمس دقائق وياسين بيحكى لمامته وجرس البيت فجأة
رن وصوت خبطة مهذبة على الباب. ياسين بص لنادية باستغراب
وقال: يا ترى مين جابلنا دلوقتي؟

نادية: إلبس إنت بسرعة عشان لما الدكتور ده بييجي تكون في
استقباله، وانا هروح أشوف مين، ممكن يكون المكوجي.

نادية من ورا الباب شافت راجل ببدلة، ارتبكت لما شافت جزء
من وشه، رجعت لياسين في أوضته جري وقالت: واد يا ياسين! قوم
شوف مين الراجل أبو بدلة اللي بيخبط عالبااب ده.

ياسين باستغراب: ياترى مين ده؟ أكيد د عصام مش هبيجي
بالسرعة دي، ممكن يكون جايلك عريس؟ نادية زغرت لياسين بالرغم
من كسوفها وقالت: طيب قوم يا أبو العروسة شوف مين.

ياسين إبتسم لأول مرة من ساعة ما رجع من الكلية وقام فتح
البااب.

ياسين باستغراب: د عصام!! يا أهلا يا دكتور، إتفضل.

د عصام: إزيك يا ياسين يا إبني، معلش بقى أنا جبت عنوانك
من شئون الطلبة، وكنت في ميدان المساحة هنا جمبكم بعمل مشوار
لما انت رديت عليا.

ياسين: ولا يهكم يا دكتور، حضرتك نورتنا.

د عصام: طيب أنا عاوز أتكلم معاك شوية، تحب نتكلم هنا ولا نتكلم برا في أي حته؟

ياسين: لو يريح حضرتك خرينا هنا.

ودخلوا الصالون وقعدوا.

ياسين بقلق: خير يا دكتور؟

د عصام: خير إن شاء الله، طبعا انا عارف انك متدايق من ساعة ما اتكلمنا في المكتب، وعاييز أقولك إنني مكانش ينفع أقول كلام غير اللي انا قولته، وده حفاظا عليك.

ياسين بصله باستغراب.

د عصام كمل: اللي انت قولته ده كلام خطير جدا ومينفعش أبدا تقوله قدام حد وخصوصا أصحابك دول، أنا مش بقول إنهم وحشين لا سمح الله؛ لكن انت متضمنش مين فيهم ممكن يحكي إيه ولين.

ياسين بحماس: يعني حضرتك مقتنع بالفكرة؟

د عصام: طبعا، دي فكرة عبقرية، حتى لو في تطبيقها مطلعتش صح؛ لكنها منطقية جدا.

ياسين فرح جدا بالكلام ده وقال: بس أنا اشتغلت ع الموضوع ده أنا وزمايلي، وأنا أثق فيهم جدا ومينفعش أخليهم برا الحوار.

د عصام: يا ياسين أنا عارف و إنت عارف إن إنت أكيد صاحب الفكرة، وكونك حبيت توزع أدوار على أصحابك عشان يكونوا جزء

من الحدث فده مش عيب، بالعكس دي جدعنة وأصل منك، بس العرض اللي انا جايبهولك مينفعش غير ليك وبس.

ياسين باستغراب: عرض إيه؟!!

د عصام: جامعة هارفارد منحة كاملة هتكمل فيها سنة رابعة، زائد الماجستير والدكتوراه من بعدها، غير مرتب شهري مش هتصرف منه حاجة، لأنهم هيوفروك كل حاجة؛ سكن ومواصلات وأكل وشرب، حتى الفُسْح عليهم.

ياسين فتح بقه من الدهول بالعرض.

د عصام كمل: ومتناساش ان لو المجتمع العلمي قِبَل البحث بتاعك؛ جايزة نوبل هتكون من نصيبك.

ياسين عينه برقت أكثر من الفرحة.

"تيك تيك تيك" صوت خبط رقيق على الباب، ياسين استغرب وقام يشوف مين، فتح لقي نادية واقفة بصينية عليها عصير، ولابسة ومتشبكة.

نادية إدت الصينية لياسين اللي مستغرب جدا؛ مش من شياكة نادية الزيادة بس، لكن من طريققتها في التخبيط على الباب وقالت: يا أهلا وسهلا.

د عصام عمل نفسه متفاجيء وقام من مكانه وقال بانبهار: يا أهلا بحضرتك، حضرتك تقربي لياسين؟

نادية ابتسمت ابتسامة خفيفة وقالت: أنا مامته.

د عصام باستغراب مصطنع قال: مستحيل يا فندم، أكيد
بتهزري، انا قولت حضرتك أخته الكبيرة مثلاً.

ياسين واقف باصصلهم بمنتهى القرف والغیظ في نفس الوقت
وقال بصوت عالي: العصير يا دكتور.

د عصام: آآآ...متشكر جدا.

نادية بتهكم: مش تعرّفني يا ياسين.

د عصام بابتسامة خبيثة: أستاذ دكتور عصام عبد رب النبي،
قسم الفيزياء كلية العلوم، وحضرتك؟

نادية: دكتورة سيدلانية نادية والدة ياسين.

د عصام: أنا اتشرفت بحضرتك جدا يا فندم.

نادية: ميري.

ياسين بعصبية قال: انا بقول ننزل نكمل كلامنا في أي حته برا
يا دكتور.

د عصام بارتباك: لا مفيش داعي، أنا هديك مهلة يومين وترد
عليا عشان ألحق أظبلك الدنيا.

وراح شارب العصير على بق واحد، ووقف وقال بابتسامة
عريضة: أنا اتشرفت بحضرتك جدًّا يا دكتورة نادية، وأتمنى نلتقي
تاني على خير ان شاء الله.

نادية بخجل: إن شاء الله أكيد.

ياسين بغیظ: مع ألف سلامة يا دكتور... مع السلامة.

وقفل وراه الباب، ورجع لأمه في الصالون.

ياسين قال بغیرة: هو إيه اللي حصل دلوقتي ده! ومن إمته وانتي

بتخبطي بالرقعة دي!! وميرسي؟! واضح انك صدقتي إنه عريس فعلا.

نادية بمنتهى الحزم: إتلم يا زفت، المهم د عصام كان عايزك في

إيه؟

ياسين بتهكم: أيوا ياختي غيري الموضوع.

ياسين كمل بمنتهى الحماس: د عصام جايبلي منحة في جامعة

هارفرد وبعد ما أخلص أكمل ماجستير ودكتوراه، وكل حاجة عليهم.

نادية بمنتهى الفرحة: الله أكبر...الله أكبر، إبنی هيبقى زي

زويل.

وحضنته جامد.

ياسين: بس في مشكلة دلوقتي؛ أصحابي مش هيكونوا معايا،

مع إنهم تعبوا معايا في مشروع كلنا شغالين عليه، وهو ده سبب المنحة

أصلا.

نادية: أصحابك دول دورهم كبير؟

ياسين: أنا كنت موزع عليهم أدوار عشان أشركهم معايا، وبالمرّة أوفر وقت ومجهود، وحاولت أوصل ده للدكتور عصام؛ لكنه مقتنعش.

نادية: خلاص محلولة، إنت تفهمهم الحقيقة، وتعاهدهم إنك تبذل كل ما في وسعك عشان يكونوا معاك في الفريق البحثي بتاعك، واللي ميقدرش منهم يكون موجود؛ تكتب إسمه في البحث ومساهمته كانت إيه، لازم يا ياسو، دي أمانة.

ياسين: كلامك صح يا أمي، أنا هعمل كدة إن شاء الله.

وبعدين بص لأمه وقال: طيب وانتي يا حبيبتى؟

نادية: متقلقش عليا يا واد، أنا بميت راجل.

ياسين: أنا عارف يا ست الكل، بس برضو أنا مستغناش عنك، ومش هسافر إلا وانتي معايا.

نادية عنيتها دمعت وقالت: ولا انا يا حبيبي أستغنى عنك أبدا.

وكملوا أحضان ودموع، وبعدها ياسين دخل ينام.

ياسين ماشي فوق كوبري روض الفرج وعمال يتفرج من الزجاج اللي في الأرضية على المراكب وهي معدية في النيل ... ويرفع عينه شاف شاب واقف باستسلام على نفس الصف وقدامه ثعبان كبير حاطط شفاطة في دماغ الشاب وعمال يشرب ... ياسين شاف راجل بييجري

بسرعة عشان ينقذ الشاب ده ... ياسين كان حاسس بغضب شديد ...
نط الراجل على الثعبان وكتَّفه ووقعوا هما الاتنين على الطريق ...
ياسين جري عشان يكتف الثعبان مع الراجل وقيل الثعبان ما يفهم
ايه اللي حصل بوووووم، عربية نقل دهست ياسين والراجل
والثعبان.

"أأأأأأأأأأأه" ياسين قام من النوم بيصرخ وبيتظمن على جسمه انه
سليم شرب شوية مياه واستعاذ بالله من الشيطان ورجع نام
تاني.



اللي بيروح ببيرجيش

ياسين تاني يوم قعد مع أصحابه وحكالهم على العرض وإن دي فرصة كبيرة ليه وليهم برضو، وعاهدهم باللي اتفق عليه مع مامته. أصحابه كانوا متفهمين جدا، وشجعوه إنه يعمل كدة لما حسوا منه بشوية تردد.

سارة بفرحة يشوبها حزن: أنا بجد فرحانة قوي بالخبر ده، بالرغم إنني كان نفسي نكون كلنا مع بعض.

كريم: يابن المحظوظة، لعبت معاك يا عم، بس انت وعدت إننا هنكون مع بعض، ولا إيه؟

ياسين: طبعا يا عم والله ما تقلق.

أحمد: هتسافر إمتي؟

ياسين: د عصام قالي في خلال أسبوعين الأمور كلها هتكون خلصانة.

كريم: هي الحاجات دي بتخلص بسرعة قوي كدة؟!

ياسين رفع كتفه لفوق في إشارة لاستغرابه هو كمان.

محمود: هتوحشنا والله يا أخي.

والولاد حضنوا بعض حضن رجالي من اللي فيه خبط جامد على

الضهر.

نادية قاعدة على سرير ياسين وعينها كلها مليانه دموع.
ياسين مسك أمه من كتفها: إيبويه... آمال هنعمل إيه بكرة في
المطار لما دلوقتي بتعملي كدة؟

نادية بحزن مخلوط بفرحة: هتوحشني يا ياسين.
ياسين حط راسه على كتفها: والله وانتي يا ست الكل، بكرة إن
شاء الله تجيلي هناك وتبقي أم الراجل اللي عمل أهم إكتشاف للبشرية،
واللي هيكون أداة تحكّم غير عادية.

نادية دموعها وقفت وبصت لياسين بمنتهى الجدية والقلق
وقالت: إكتشاف إيه ده؟!

ياسين بابتسامة فخر: أنا وبلا فخر ماشي في سكة اللي يروح
ببرجع عادي، "السفر عبر الزمن" بس زمن الشخص الواحد.

نادية: أنا بتكلم جد يا ياسين.
ياسين: والله وأنا كمان بتكلم جد.
نادية برقت بعنيها في منتهى الذعر وقالت: يا مصيبيتي السوداء.

ياسين اتنفض وقال: إيه اللي حصل!!?
نادية قامت من على السرير في حركة حادة وقالت: ياسين مفيش
سفر، والبحث بتاعك ده لازم يقف.

ياسين بعصية: إيه الكلام ده!!?

نادية: إنت مش متخيل حجم وخطورة حاجة زي دي، إنت وكل اللي حواليك والعالم كله هيكون في خطر كبير جدا لو حد وصل للي انت عاوز تعمله ده.

ياسين بتوتر: يا ماما إيه الأثورة دي، بالعكس؛ الموضوع هيبقى سبق، وأنا بمجرد ما الموضوع ينجح هرجع على مصر واشتغل من هنا.

نادية: إيه السذاجة اللي انت فيها دي! إنتوا أصلكم لو بتقروا تاريخ؛ كنتوا عرفتوا ان الناس اللي انت رايلهم دول بيحتكروا أي حاجة ليهم ولمصلحتهم، وأي حد بيعارضهم أو يسيبهم بيتخلصوا منه بعد ما ياخدوا اللي هما عايزينه، والي بيمتنع بيتعاملوا معاه بمبدأ "لا أنا ولا غيري".

وراحت عند الحيطه اللي متعلق عليها صور العلماء وقالت: وأظن دول أكبر شاهد عالي بقوله.

ياسين: يا حبيبتي الكلام ده كان زمان، الدنيا دلوقتي اتغيرت، يا ماما حرام تضيعي عليا فرصة زي دي.

نادية بمنتهى الإصرار: لأ يعني لأ، أنا مش مستغنية عنك.

ياسين بمنتهى الإصرار برضو: يا ماما لو سمحتي ده مستقبلي والفرصة دي مبتجيش غير واحد في ال 10 مليون، بعد إذتك أنا مسافر.

نادية: روح يابني، بس أنا مش راضية عن اللي انت هتعمله،
ومش هاجي معاك المطار ولا حتى هجيلك هناك، وإنسى ان ليك أم من
أساسه.

مشيت نادية وسابت ياسين في زهول، بعدها بص على الصور
وسرح في ذكرى من الماضي القريب.

- ماما! هي صور مين دي اللي على الحيطه؟
- بص يا ياسين يا حبيبي؛ دي صور ناس كانوا نفسهم مصر
تبقى أحسن بلد في الدنيا.

- طيب ومصر بقت أحسن بلد في الدنيا؟
- مصر في يوم من الأيام كانت أعظم بلد، وان شاء الله هترجع
تاني.

- طيب هما الناس دول راحوا فين؟
- في ناس يا سينو مش بيحبوا ان احنا نكون كويسين،
وعايزين هما بس اللي يكونوا كويسين، والناس دي قتلوا كل اللي في
الصور دول قبل ما يعملوا الحاجات الحلوة لمصر.
- أنا لما أكبر هنقذ الناس دول وهحارب كل الشريرين وهنتصر
عليهم.

- هههههههههه ... حبيبي يا ياسو ربنا يكرمك وينصرك على
الأشرار الوحشين دول، بس دائماً افتكّر " حرب المخ أقوى بكتيبيير

من حرب العضلات " ويللا بقى عشان ألع اعمل الأكل عشان بابا
زمانه جاي.

تاني يوم ياسين في المطار، نادية مجاتش معاه، أصحابه حواليه،
و د عصام.

ياسين بحزن: ماما مجاتش برضو؟

سارة: معلش يا ياسين، هتزعل شوية، وبعدين هتروق، هي بس
خايفة عليك.

د عصام وعلى وشه إبتسامة: يللا يا بطل، عاوزينك ترفع راسنا،
إمسك الباسبور والتذكرة بتوعك.

ياسين بص للتذكرة وقلبه وجعه، الخوف جواه بيكبر مع كل
نداء لطيارة بيتردد في المكان.

كريم بضحكة: يللا يا شبح عشان الراجل هَيَدَوَّر ويطلع.

ياسين مش قادر يتحرك، بطنه وجعاه.

ياسين بخوف: أنا مش عايز أسافر.

د عصام بغضب: إيه شغل العيال ده، إنت عارف الفرصة اللي
جاتك دي؛ أنا تعبت قد إيه عشان أوفرها لك وأمشي في إجراءاتها؟ إنت
مدرك يعنى إيه الجرين كارديطلعك بالسرعة دي؟

محمود بصوت حاد: إنت عبيط يا ياسين، حد يرفس النعمة.

لينا: انت كدة هتضيع الفرصة علينا كلنا مش عليك لوحك.
ياسين فكر ولقى كلامهم صح، بس هو مش قادر، لكنه استسلم
لكلامهم وابتدى يتحرك ناحية البوابة،

أحمد: هي رحلتك خطوط إيه ورقمها كام؟

ياسين بص في التذكرة وقال: مصر للطيران، طيارة رقم 990.

سلم عليهم ياسين وسابهم عشان يطلع الطائرة، وهو طالع
السلم في صالة المسافرين شايف ناس كتير ماشيين، بس من ضمن
الناس واحد بس واقف وباصص عليه ومبتسم، ياسين قلبه إتقبض،
هو فاكراً إنه شاف الشخص ده قبل كدة، بس مش فاكراً فين.

دخل ياسين الطائرة لقاها زحمة، الكل كان قاعد في مكانه، وهو
الوحيد اللي داخل الطائرة متأخر، اللي راكبين كان فيهم ظباط جيش
كتير والباقي مدنيين، فضل ياسين ماشي في الممر عشان يوصل الكرسي
بتاعه، وطول ما هو ماشي كل اللي في الطائرة عمال يبخلقه
باستغراب، ياسين استغرابه بيزيد برضو أكثر وأكثر، لحد ما وصل
عند كرسي قاعدة عليه واحدة وأول ماشافته قالت: ياسين! انت إيه اللي
جايك هنا؟! هما وصلوك انت كمان؟

ياسين فتح بقه وبلم لأنه مش فاهم حاجة، ومفيش 3 ثواني
صمت وكان الراجل اللي قاعد جنبها قايل: مش هو يا دكتورة.

الست رجعت طبيعية تاني وعلى وشها علامة ارتياح.

ياسين كمل مشي في الممر لحد ما وصل للكرسي بتاعه وقعد عليه،
وكان جمبه اتنين رجالة، الأول سلم على ياسين وقال: ربنا يوفك يا
ياسين.

والتاني قال: إن شاء الله الحق هيرجع بس متبقاش تنسى تدعي
د يحيى المَشَد.

وابتسم الراجل وبص قدامه، ياسين حس بإحساس غريب
وحيرة شديدة من كلام الناس ونظراتهم، مَحْرَجُوش من اللي هو فيه
غير صوت صفارة في سماعات الطائرة وبعدها الكابتن قال من
خلالها: السادة المسافرين، مرحبا بكم على متن تحتمس الثالث، برجاء
ارتداء حزام الأمان، ونتمنى لكم رحلة سعيدة.

وارتفعت الطائرة في الجو، وياسين باصص من الشباك، نسي كل
الخوف والقلق اللي كان فيهم، ودلوقتي مش بي فكر غير في المستقبل
الباهر اللي مستنيه وفضل سرحان فيه لحد الطائرة ما بقت فوق
خالص، وفجأة... الطائرة بتقع ... صوت انذار الطائرة شغال وصوت
مساعد الطيار اللي كله زعر في السماعات عمال يقول: توكلت على
الله... توكلت على الله... توكلت على الله.

الطيار بعصبية وتوتر: قفلت المحركات؟

المساعد: مقفولة.

الطيار: شد... شد معايا... شد معايا.

بووووووووم....الطيارة انفجر جزء منها في الجو والباقي فضل
يقع لحد ما استقر على الأرض.

الدنيا ضلّمة كحل، ياسين بيحاول يقوم، مش قادر، نفسه رايح،
جسمه مشلول، وواحد ملامحه مش باينه قرب بوشه من وش ياسين
وبصوت غريب وواطي قال "ششرفاستم".

بس فيه مشكلة؛ الدكتور عصام وتعبه لحد ما جاب المنحة والجرين
كارد وباقي الإجراءات، وكمان

فجأة نادية خطفت التليفون من إيد ياسين وردت على د عصام
بحزم: أيوة يا د عصام، ياسين مش مسافر.... من غير أسباب وطبعا
إحنا مقدرين تعبك ومجهودك.....والله شوف حضرتك ممكن تقولهم
إيه لكن إبني هيفضل في بلده ووسط أهله..... مع السلامة.

وقفلت السكة وبصت لياسين بتحدي ... الغريب إن ياسين
متحركش ولا حاول يعترض، كإنه كان مستني حد يخرججه من حيرته
وياخد القرار مكانه.

ياسين قاعد وسط أصحابه في الكلية وعلامات الإحباط مالية
وشه، وأصحابه محدش فيهم بينطق بكلمة لكن كلهم مستغربين من
موقف أم ياسين.

سارة بفرحة مخفية: معلش يا ياسين تتعوض ان شاء الله،
وبعدين هي أكيد خايفة عليك وخصوصا إنك إبنها الوحيد.
محمود راح قايل بهزار: انتي مكسوفة تقولي حيليتها.

أحمد زغر لمحمود وقال: مش وقت سخافة يا محمود، أنا مش
قادر أفهم؛ دي طنط أول ما سمعت الموضوع كانت هتطير من الفرح،
إيه اللي شقلب حالها فجأة؟!!!

كريم بغضب: يا جدعان إيه الهبل ده؟ وانت يا ياسين ازاي متصممش، انا لو مكانك كنت سافرت والي يحصل يحصل، بقولكم إيه؛ أنا ماشي.

سارة: رايح فين يا كريم؟ وإيه اللي بتعمله ده!

كريم: رايح لدكتور عزام أديله حاجة أخويا باعتاله، وبعدين أروّح.

لينا بصت لكريم بصة عتاب وهو ماشي وقالت لياسين: هو فيه حاجة حصلت يا ياسين بينكم انت وطنط طيب؟

ياسين سرحان ومش عارف يتكلم، آه هو ريح أمه وسمع كلامها؛ لكنه متدايق جدا وخصوصا من موقف الدكتور عصام اللي قلب الدنيا عليه وعلى زميله -بالرغم انهم مالهمش ذنب- ومنعهم من دخول المعمل عند د عزام، بس معاه حق أكيد؛ مفيش حد يعمل اللي ياسين عمله ده.

أحمد: يا عم بص لنص الكباية المليان؛ الحمد لله البحث الي كنا شغالين عليه صح، والدليل على كدة إن المنحة جتلك في وقت قياسي وده مستحيل كان يحصل.

لينا: كلام أحمد صح، ده غير ان التسهيلات والامتيازات الي جاتلك يا ياسين برضو محصلتش قبل كدة، يعني أكيد إنت كنت قريب جدا.

ياسين سامع كلامهم لكن النفسية برضو بعافية.

سارة: طيب انت عارف يا ياسين؛ فعلا طنط عندها حق، تخيل
الفرضية بتاعتك دي لو طلعت صح؛ الموضوع كان حقيقي هيكون
خطر عليك.

محمود: يعني كان ممكن تروح هناك بيعتوك دعوة تشوف
معاملهم وفي الطريق تعمل حادثة موت، ولا حد يطلع عليك ويكسرلك
الجمجمة زي الدكتور يحيى المَشْد.
أحمد: أعوذ بالله من أمثلتك يا أخي.

ياسين فجأة انتبه وبص لمحمود في حركة فجائية وقال: انت
قولت يحيى المشد؟! جبت الإسم ده منين؟ ومين هو أصلا؟

محمود بارتباك: والله ما اعرفه، أبويا كان حكالي زمان ان فيه
علماء كتير تم اغتيالهم ومن ضمن الناس دي دكتور اسمه يحيى
المَشْد، لقوا جثته في الأوضة بتاعته في الفندق في فرنسا وراسه متهشمه،
والموساد أعلن مسئوليته عن الحادثة.

أحمد باستغراب: مالك الموضوع شكك ليه قوي كدة؟!؟

ياسين بعصبية: معلش يا جدعان حد يطلعلي صورته عالنت
كده عشان الباقة معايا خلصانة.

لينا عملت سيرش وقالت: هو ده.

وهنا ياسين برق بعينه من الدهول.

سارة: إيه يا عم إنت شوفت عفريت ولا إيه؟!؟

ياسين بصلهم وقال بذهول: يا جدعان أنا شوفت الراجل ده قبل
كدة واتكلمت معاه كمان.

أحمد: إيه ياسطى الهذيان ده.

ياسين: والله ما بهذي أنا متأكد من اللي بقوله.

سارة: يا عم عادي تلاقي صورته من ضمن الصور اللي طنط
معلقاهم عندكم في البيت، المهم؛ سيبك من الكلام ده دلوقتي، إحنا لازم
نكمل اللي انت بدأتاه.

أحمد: فعلا لازم نكمل عشان إحنا لو نجحنا هيكون النجاح
لأهلنا وبلدنا ويكون عندنا سبق غير عادي.

ياسين موضوع المَشْد والصورة ده شغل تفكيره، وخصوصًا إنه
مش من ضمن صور العلماء اللي مامته معلقاها في البيت عندهم، لكن
كلام زمايله خلاه ينسى الموضوع بسرعة، وكان حافز ليه إنه يكمل ...
بس لازم يتكلم مع الدكتور عصام ويحاول يصلحها عشان مفيش
غيره ممكن يساعدهم.

كريم رجع وكان هدي شوية وقال: معلش يا جدعان، سامحني
يا ياسين أنا مقصدتش حاجة، بس فعلا اتدايقت عشانك يا أخي.
ياسين بابتسامه: أنا عارف يا صاحبي، وان شاء الله هنكمل
وهنجح.

كريم بابتسامه قال: وأنا في زهرك يا صاحبي لحد ما نخلص
ونجح.

وحطوا إيديهم في إيدين بعض.

اختفاء

ياسين راح للدكتور عصام في آخر اليوم في مكتبه وأخذ معاه كريم صاحبه اللي اتطوع يروح معاه عشان يحاول يهدي الجو، د عصام مكانش طايق ياسين، وعمال يبصله وعينه كلها غيظ، ياسين كان هيموت من الإحراج والخوف

د عصام بصوت جاف: خير؟

ياسين قال بارتباك: يا د عصام آآ..أنا عارف إني مهما قولت مش همسح اللي حصل، وأنا بجد آسف إن ده حصل، بس والله مش بإيدي.

د عصام: أمال بإيد مين؟!؟

ياسين: أمي رفضت رفض تام فجأة، وهي ملهاش غيري، وخافت لحسن يحصلي حاجة، وخصوصا لما عرفت موضوع النظرية بتاعتي.

د عصام بعتاب: طيب ماقولتليش ليه الكلام ده وانا كنت أقنعها، وعلى فكرة إحنا لسة فيها.

ياسين: يا دكتور الحمد لله إن أنا مطلعتش، حضرتك شوفت اللي حصل في فلسطين بعد المعاد اللي كان المفروض اسافر فيه بثلاثة أيام، وانا بصراحة مكنتش هستحمل أكون وسط ناس بتشجع الاحتلال وبتدين أي حد يقول كلمة الحق.

كريم: معلش يا دكتور، إحنا نبتدي صفحة جديدة بس هنا في مصر، وياسين عاوز يكمل اللي بدأناه إحنا وزمايلنا، وكنا طمعانيين في كرم حضرتك إنك تساعدنا فيه.

د عصام بص لكريم وياسين ببرود شديد وقال: إسمع يا بني انت وهو؛ عاوزين تعملوا حاجة وتكونوا حاجة، يبقى لازم ياسين يوافق على العرض، غير كدة؛ سييكوا بقى من الموضوع بتاعكم ده وخلصوا كليتكم وإطلعوا إشتغلوا في أي شغلانة تجيبلكم مرتب يادوب تعيشوا بيه لحد نص الشهر، وبيلا اتفضلوا عشان عندي حاجات مهمة بعملها.

ياسين اتصدم من الكلام اللي بيسمعه ده، وأخذ كريم ومشى وهو حزين، لكن الحزن مقعدش كتير وجه بداله الإصرار والعزيمة إنه برضو يكمل.

د عصام طلع تليفونه بعد الولدين ما مشيو وطلب حد وقال: ألو... ياسين لسة ماشي من عندي، وكان معاه واحد من زمايله.... آه، أعتقد إن كلامي معاه هيكون محفز ليه إنه يكمل، ولما ياخذ القرار ويبدأ؛ الأمور كلها هتكون تحت السيطرة.... مفيش داعي من القلق، المشروع ده والولاد دول مش هيخرجوا برانا.... آه عملت اتصالاتي والكل جاهز لأي حركة... أهم حاجة زي ما اتفقنا؛ أنا برا الصورة تمامًا... مع السلامة.

ياسين وكريم راحوا لأصحابهم وحكولهم عالي دار بينهم وبين
الدكتور.

كريم: سيبك من كلامه يا ياسين، هو بس مخنوق عشان الحركة،
وعموما احنا نشتغل من غيره.

سارة: ده الكلام المعقول.

ياسين: طيب هنجيب منين الأجهزة؟

أحمد: شوفوا إيه الطلبات اللي ممكن نحتاجلها وانا بابا ممكن
يجيبهالنا من الحاجات اللي بتتكهن تبع الحكومة.

سارة: فكرة جميلة يا أحمد، ها يا سي ياسين اتحلت أهي، افرد
وشك بقى.

محمود: بقولكم إيه يا جدعان؛ إيه رأيكم ندونالذ إنهاردة.

كريم: يابني انت معرفتش اللي عملوه، الدنيا مقلوبة من امبارح
وأول امبارح عليهم.

محمود باستغراب: لأ، الأكونت بتاعي عليه حظر من امبارح
عشان نزلت بوست "بيدعم الإرهاب"، عملوا إيه!

لينا طلعت موبايلها وقالت لمحمود: اتفضل شوف اللي فلوسنا
كلها صارفينها عليهم؛ بيعملوا بيها وجبات لجيش الاحتلال مجاناً،
ده غير الدعم العلني.

محمود اتخفق جدا من اللي شافه، واتفقوا كلهم إنهم يكونوا جزء فعال في حملة المقاطعة.

الولاد عملوا تجهيزاتهم وعملوا جمعيات مع أهاليهم واتفقوا ان الجمعيات دي هتتصرف على شراء المستلزمات اللي مش هيقدررو هما يلاقوا زيها في الحاجة اللي كان أحمد بيمدهم بيها، وسبحان الله كل اللي كانوا بيحتاجوه كان بيبقى موجود، لدرجة ان فيه حاجات بتكون جديدة متفتحتش قبل كدة، ده غير اتفاقم على سرية الموضوع ومدى خطورة معرفة حد غيرهم بيه.

على مدار السنة الدراسية كانوا الولاد شغالين مابين الكلية والمحاضرات والسكاشن وبين الشغل في البيت عند محمود اللي أقنع أبوه واتبرع ببدروم البيت عنده عشان يعملوا فيه المعمل بتاعهم؛ وده كان كل دور محمود في الموضوع أصلاً، أما الباقي فكان كل واحد فيهم ليه دور في المشروع، وده بحكم ان مجال دراستهم متشابه على عكس مجال دراسة محمود، بس هو مكانش متدايق؛ بالعكس الموضوع كان على هواه.

الشغل في المعمل كان مجهد جداً لدرجة انهم كانوا بيقسموها ورديات، شغل لحام وشاشات وكمبيوترات وأسلاك في كل مكان.

عدت شهور والشغل كان ماشي زي النار، وفي يوم ياسين قال:
هانت يا جدعان، إن شاء الله قربنا.

لينا: يا رب تعبنا ما يروح على الفاضي.

أحمد: يا رب، كدة إحنا إيه اللي فاضلنا؟

سارة: أه بس بسرعة عاوزين نتكلم كلمتين من غير محمود ما
يكون موجود ويقعد يسأل في كل حاجة وهو مش فاهم حاجة أصلا.
والكل فضل يضحك، بس ياسين قاطعهم وقال: يا جدعان حرام
عليكم، من ساعة ما ابتدينا هنا وهو مبطل غلاسة، وبعدين كفايه
الراجل مستضيفنا في بيته بقاله شهور، ده غير الأكل والشرب طول
ماحنا هنا.

كريم: معاك حق.

ياسين: المهم طيب، إحنا كدة عملنا السوفت وير والهارد وير اللي
هنحتاجلهم في شغلنا، ودخلنا كل البيانات بما فيهم الترددات اللي
وصلنالها من خلال النظريات، والخوذة - اللي استخدموا فيها خوذة
موتوسيكل شالوا البطانة الداخلية بتاعتها وحطوا تحتها هيكل
معدني متوصل بيه كل المكثفات والدواير الكهربائية، مش باقي غير
التجارب الحيوانية.

سكت ياسين شوية أخذ فيهم نفس عميق وبابتسامة سعادة
وعينه بتلمع كمل: وبعد كدة التجارب البشرية.

الكل هلل من الفرحة وهاي فايث للصبح.
محمود في اللحظات دي وصل وشكله كان متدايق.
كريم: إيه يا بومة مالك؟
محمود بص لكريم بعصبية وقال: لا مفيش حاجة أصلي لسة
دابب خناقة مع أبويا.
ياسين: إوعى تقول بسبب المعمل أبوس إيدك.
محمود: لا لأ، بسبب حوار تافه كدة، متشغلوش بالكم، المهم؛
فيه جديد؟
ياسين حط إيده على كتف محمود وقال بابتسامة: هانت يا حودة
يا غسل.
لينا: طيب يا جماعة بابا وصل برا، أشوفكم بكرة، يللا يا سارة.
سارة: باي، أشوفكم بكرة إن شاء الله.
كريم: يللا احنا كمان يا رجالة، عاوز حاجة يا محمود.
محمود: حبيبي.
مشي ياسين وأحمد وكريم وبعد ربع ساعة مشي، كريم وقف
فجأة وحط إيده على جيوبه وقال: أوبيااا، انا نسيت تليفوني.
ياسين: وانت جاي تفكر دلوقتي.

كريم: بصوا طيب؛ روحوا انتوا، انا هرجع وهطلب عربية تجيلي
على هناك تروحنى، انت عارف انا كدة كدة بمشي معاكم لحد ما تركبوا
انتوا الاتنين وانا باخد تاكسي.

أحمد طلع موبايله وقال: طيب استنى أرنك على الواد محمود.

كريم: لا استنى، انا عاوز اروح على غفلة اخبط يمكن أبوه اللي
يفتحلي، بقالنا أكثر من ثلاث شهور رايعين جاينين؛ مفيش مرة نشوفه
فيها.

رجع كريم ... ياسين وأحمد كملوا مشي.

أحمد: تصدق فعلا حاجة غريبة؛ ولا مرة نزل بص علينا بنعمل
ايه ولا سلم علينا حتى.

ياسين: ولما نسأل محمود عليه يقولنا أصله طول اليوم في
الشغل، وفي الأجازات بيكون نايم.

أحمد: بس سيبك انت، عليهم شوية أكل؛ هلاااك، بغض النظر
برضو ان الأكل كان بيتبع مع محمود؛ ومشفناش مامته ولا مرة.

ياسين: ياخي انا مكسوف جدا من الموضوع ده، كل يوم أكل
وشرب على حسابهم.

أحمد: محمود اللي عرض وأصرّ على كدة، بس ما شاء الله شكلهم
أغنياء.

ياسين: مع إن محمود مكانش باين عليه، حتى الثيلا بتاعتهم
دي مكانش نعرف عنها حاجة وطول عمري فاكر محمود قاعد في
شقة عادية.

أحمد بابتسامة: ربنا يزيدو ويزيدنا.

ياسين عقد حواجبه وقال: بس محمود متغير، وأستلته بقت
كثير، مع إنه في البداية مكانش مهتم قوي، ودايما فيه حاجة شغلها.
أحمد أوماً براسه، وكمل الإيتين مشي لحد ما ركبوا وروحوا.

تاني يوم راحوا كلهم البيت عند محمود بعد صلاة الجمعة.
ياسين بحماس: يلا يا جدعان عشان نبتدي التجارب الحيوانية.
وبص لمحمود وقال: جبت يا محمود الأرناب؟
محمود شاور بإيده: أه موجودين في القفص هناك أهم.
أحمد: يا جدعان هو حد كلم كريم انهاردة؟! أصله مش بيرد
عليا من الصبح.

الكل بصوا لبعضهم وهزوا راسهم بعلامة النفي.
سارة: هرن عليه أهو برضو مش بيرد.
ياسين: هو كان نسي تليفونه عندك هنا يا محمود ورجع عشان
ياخده بعد ما مشينا امبارح على طول.
محمود بارتباك: لا مفيش حد جه، ومكانش فيه موبايلات هنا.

أحمد باستغراب: يعني إيه؟!

لينا في محاولة للتغلب على حالة التوتر اللي ابدتت تظهر قالت: ممكن يكون وهو راجع إكتشف ان تليفونه معاه فَرَوَّح على طول، وممكن يكون راحت عليه نومة ... مع إنها مش عادته.

ياسين ابتدى يحس بقلق غريب، وراح مطلع تليفونه، وجدد الباقة على النوتة، ورن على كريم تاني وتالت، مفيش رد برضو، وبعد ما قفل رسايل كتير جاتله، أصل الباقة كانت خلصانة معاه من امبارح الظهر، من ضمن الرسايل؛ رسالة صوتية من كريم امبارح بالليل بعد ما سابوا بعض بساعة إلا ربع، ياسين شغلها وحط التليفون على ودانه، صوت كريم بييجري وعمال بينهج ومذعور بيقول: ياسين! لازم بكرة تجيب الهارد والخوذة وشيلهم عندك في البيت، مصيبة يا ياسين، أنا اكتشفت مص... أع.. دب.

خلصت الرسالة على صوت مكتوم وحد وقع على الأرض.

ياسين اتربع، ومش عارف يعمل إيه.

سارة اللي رجليها عمالة تتهز غضب عنها: طيب ما حد يرن على مامته.

أحمد راح مطلع النمرة ورن عليها على طول.

أحمد: أيوة يا طنط...أخبار حضرتك إيه.

أم كريم: إزيك يا أحمد...عامل إيه انت....وأخبار شغلكم إيه اللي بيخليكوا تباتوا برا بيوتكم ده؟

أحمد اتصدم من الكلمة، لإن عمرهم ما باتوا برا البيت من ساعة ما بدأوا شغل على المشروع، رد أحمد بارتباك: آه ماهو حضرتك عارفة آخر سنة ولازم نخلص المشروع عشان نسلمه، بقول لحضرتك طيب؛ هو كريم في البيت؟

أم كريم بقلق: لا يا أحمد كريم من امبارح مجاش، انتو مش كنتم بايتين مع بعض؟!!

أحمد: آه آه بس هو راح يجيب فطار ونسي موبايله، ولما آخر شوية قولنا يمكن يكون رجع البيت يغير ولا حاجة.

أم كريم: لا يا بني مجاش، طيب لما يجي أمانة عليك خليه يطمني.

أحمد: ضروري طبعا حاضر ياطنط، مع السلامة.

بص أحمد لزمايله اللي كانوا في منتهى القلق وقال: كريم مروحش من امبارح.

والكل قلبه وقع في رجليه.

الزهب

السكون عم المكان، محدش بيبيص لحد، الكل باصص في الأرض
ومبلم.

ياسين: يا جماعة إحنا هنفضل ساكتين كدة؟!!

لينا: إحنا لازم نبليغ البوليس، ونبليغ أهالينا.

أحمد بعصبية: طيب هو إيه اللي ممكن يكون حصل؟!!

سارة بصت لياسين وعينها فيها بوادر دموع وقالت: تفكروا

ممكن يكون حصله حاجة؟ بسبب اللي احنا شغالين عليه؟

ياسين بص لمحمود وقال بحدة: ساكت ليه يا محمود؟

محمود بارتباك: هقول إيه يعني يا ياسين؟

ياسين بغضب: قول أي حاجة يا أخي، مش ممكن يكون جه

وحد غيرك فتحله، مسمعتش حاجة غريبة برا البيت؟

محمود بارتباك شديد: ولا أي حاجة، أنا متأكد إنه مجاش.

ياسين: لينا كلمي بباكي بييجي ياخذك انتي وسارة يروحكو،

ويللا بينا احنا يا احمد.

سارة قالت: استني يا لينا أنا بابا قريب من هنا هبعثله وعشر

دقايق يكون برا ونروح سوا.

أحمد قال باستغراب لياسين: على فين؟!

ياسين: نروح نشوف هنعمل إيه.

ياسين راح عند الجهاز وابتدى يفكه.

محمود برّق بعينه وقال: بتعمل إيه؟!

ياسين: هاخذ الهارد معايا.

محمود راح ماسك إيد ياسين وقال: مفيش حاجة ينفع تطلع من

هنا.

ياسين بص لمحمود بدهشة وقال: إيه اللي انت بتقوله؟! وشيل

إيدك دي من عليا.

أحمد مسك محمود من إيده اللي ماسك بيها ياسين وقال

بحواجب معقودة: محمود! إنت اتجننت ولا إيه.

محمود شال إيده من إيد أحمد بقوة وساب ياسين واتحرك لورا

خطوتين وقال وسط ذهول من الكل وقال بعصبية: يا جدعان مفيش

حاجة هتطلع من هنا، ولا حد هيطلع من هنا غير والمشروع خلصان.

ياسين مصدوم وأفكار كثير عمالة تيجي في راسه،

لينا راحت مزعقة وقايلة: يعني إيه محدش هيطلع! وراحت

رايحة ناحية السلم عشان تطلع، محمود جري وراها وشدها بقوة

لدرجة إنها وقعت على الأرض وقال: متجرونيش استعمل العنف مع

حد.

وراح ساحب سيخ حديد كان مرمي على أرضية البدروم ...
 ياسين وأحمد بدأوا يستعدوا انهم ينقضوا على محمود ... في اللحظة
 دي سارة مدت إيديها في شنطتها من غير ما حد يحس، وجريت هي
 كمان ناحية السلم، محمود إعترض طريقها ولسة هيشدها راحت
 مكهرباه بالصاعق الكهربائي.

وقع محمود في الأرض وأغم عليه.

أحمد: هو إيه اللي حصل ده!!

ياسين: مش مهم دلوقتي، المهم نخرج من هنا بسرعة لأن أكيد
 محمود مش لوحده، وواضح جدًا إنه كان بيستغلنا المدة دي كلها،
 أنا متأكد إنه ليه علاقة باختفاء كريم، برافو عليك يا سارة.

لينا بعد ما قامت ونقضت هدموها ... ضربت محمود اللي واقع
 على الأرض مغمي عليه برجلها في بطنه ووشها كله غضب قالت: طيب
 وهنطلع ازاي؟! مفيش مخرج غير باب البدروم.

ياسين: ان شاء الله هتظبط.

أحمد مسك الخوذة وياسين فك الهارد وشاله في جيبه وسط
 اسفنج قوي وأخذ الصاعق من سارة وتقدم المسيرة، طلعاو كلهم ورا
 بعض علي السلم، ياسين فتح الباب بالراحة وبص بعينه، السكة
 فاضية ... فتح الباب بالراحة وطلعاو كلهم ... مشيوا في الريسبشن
 لحد ما وصلوا لباب الثيلا ... وفجأة...لقوا خيال حد ورا الباب بيفتح
 من برا ... أحمد شاورلهم على كنبه متغطية بكسوة لحد الأرض وهو

حاطط صباعه السبابة قدام شفايفه، جريوا كلهم على أطراف صوابعهم واستخبوا ورا الكنبه ... الكل قلبه كان بيتنفض، والراجل اللي دخل ماسك تليفونه وبيرن على حد قال "مش بيرد ليه الواد ده؟!" ياسين بص بطرف عينه من ورا الكنبه شاف الراجل وهو رايح ناحية السلم اللي بيطلع على الدور الثاني ... ياسين مستني أول الراجل ما يطلع؛ يهربوا على طول، وفجأة ... تليفون سارة رن، سارة طلعت التليفون من جيبيها بسرعة وعملته صامت، بس بعد إيه ... سارة وشها إصفر حالها حال الباقيين، صوت خطوات الراجل عمالة تقرب من الكنبه ببطء، أحمد عمال بيترعش، ياسين أخذ باله، وخط إيده على كتف أحمد وطبطب عليه، أحمد فضل يقول لنفسه "لازم أخذ موقف، لازم، دي فرصتك، كفاية جبن، خليك راجل" وطلع تليفونه من جيبه ووقف فجأة وهو عامل نفسه بيكلم حد: خلاص يا معلم لقيته .. كان واقع تحت الكنبه.

بص أحمد علي الراجل وقال بذهول: د عصام!!

د عصام ارتبك جدا وقال: أحمد! انت بتعمل إيه هنا؟

أحمد طلع قدام الكنبه وقال بارتباك وابتسامه مصطنعة: أصل تليفوني وقع وخليت محمود يرني عشان أعرف مكانه، حضرتك بتعمل إيه هنا؟!

د عصام: لالا ... أنا في الحقيقة... محمود كان كلمني وقالي ان
انتم شغالين لسة علي المشروع بتاعكم، وطلب مني أعدي عليكم
أشوفكم لو محتاجين أي مساعدة، الباقيين فين ومحمود فين؟

أحمد: كلهم تحت في البدروم، حضرتك إنزلهم وأنا بس رايح
اجيب كام حاجة من برا وراجع على طول.

د عصام: رايح تجيب إيه؟! ما انتوا كل حاجة بتيجي لحد
عندكم.

أحمد بص باستغراب للدكتور عصام؛ هو عرف منين ان كل
حاجة بتجيلنا، ود عصام حس بالغلطة اللي عملها وراح قايل بصوت
عالي: يا حسييين!

وظهر اتنين رجالة من الدور الثاني ونزلولهم.

د عصام أخذ نفس عميق وبمنتهى الهدوء والحزم قال: أحمد يا
إبني، إنزل قدامي تحت بهدوء ومن غير شوشرة عشان محدش يتأذي.

أحمد عمال يفكر يعمل إيه، إيده عمالة تترعش، مواقف كتير من
حياته عدت قدام عينه، وصراعات جوا نفسه، وفي الآخر قرر يضحى
بنفسه عشان زمايله يقدرُوا يهربوا، ومن ورا الكنبة ياسين بيحاول
يقف عشان يكون مع صاحبه؛ سارة مسكت فيه وشاورتله على لينا،
وشاف ياسين إنها بتصور من تحت الكنبة، وبلغه الإشارة منها فهم
فكرتها، فقرر انهم لازم يخرجوا عشان يقدرُوا يحموا أحمد ويرجعوا
كريم.

أحمد مشي باستسلام مع د عصام والرجالة ونزلوا البدروم ...
بمجرد ما الباب اتقفل؛ قاموا جري بدون صوت من ورا الكنبة وفتحوا
باب الثيلا بالراحة، وخذوها جري لحد عربية والد سارة وكلهم ركبوا.
سارة بنفس عالي وعين مدمعة: إطلع يا بابا بسرعة.

والد سارة بمنتهى الرعب والقلق: مالكم يا ولاد فيه إيه؟!
ياسين وهو ببليس حزام الأمان بسرعة بعد ما ركب قدام: إطلع
بس يا عمو على أقرب قسم شرطة وإحنا هنفهمك كل حاجة في السكة.

العيرة

سارة وأبوها ولينا في طريقهم لقسم الشرطة، عشان يحكوا اللي حصل ولينا معاها الفيديو، أما ياسين نزل في نص السكة ومعاها الخوذة والهارد وركب مواصلة لحد بيته، في السكة ياسين فتح تليفونه، ولقى مامته بترن عليه: أيوه يا ماما ... معلش يا حبيبتي كنت عامله وضع الطيران ... لما اجي هحكليك ... والله جاي على طول أهو ... مع السلامة.

ياسين وصل الشارع بتاع بيته، وطول ما هو ماشي عمال بيتلفت وراه، ياسين قلقان، أكيد د عصام نزل لقي محمود وحكاله على كل حاجة، وأكد قاله على الهارد والخوذة اللي معاها، وبديهي انهم يبجوا وراه على البيت، طيب يعمل ايه ... فضل يفكر لحد ما شاف البلاي ستيشن بتاع حسن صاحبه فاتح، دخل قعد عنده عشر دقائق وبعدين طلع بالخوذة والهارد معاها على بيته.

دخل ياسين البيت، ونادية أول ما شافته جريت عليه وحضنته وقالت بقلق شديد: إيه يا بني اللي حصل؟ إنت كويس؟

ياسين انهار في حضن أمه وعينه دمعت وفضل يتنفض من الخوف والقلق، أصله بيحاول يكون متماسك بقالوا كتير وما صدق لقي حضن أمه،

ياسين: مش عارف والله يا ماما، انا حاسس ان احنا في فيلم
وأخرته وحشة.

نادية: كفا الله الشر يا حبيبي.

ياسين: محمود يا ماما باعنا للدكتور عصام، ويحاولوا يسرقوا
تعبنا، وكريم من امبارح مختفي ويا عالم حصله إيه، كنتي خايفة
عليا من السفر لأمريكا؛ أديني أهو في بلدي، وولادها هما اللي
بيطاردونني.

نادية: لا يابني متخافش، ربنا معانا، انا هفهمك، بس الأول قولي
إيه اللي حصل لكريم؟!

وحكالها ياسين على اللي حصل، وعلى الرسالة اللي جاتله من
كريم.

فجأة سمعوا خبط عالباب، ياسين اترعب، نادية قالت: اثبت
يابني وخليك راجل، أنا هقوم أشوف مين.

ياسين قام من مكانه وقال: لا يا أمي انا اللي هشوف مين.

وراحوا هما الإثنين عند الباب وبص ياسين من العين السحرية
وكانت المفاجأة ... كريم اللي عالباب، ومعاه عزام المعيد في كلية العلوم.

فتح ياسين؛ كريم وعزام دخلوا بسرعة وقفل كريم الباب
وعلامات الرعب كلها على وشه.

نادية: إيه اللي حصلك يا كريم يابني!!

عزام: كريم اتكتبله عمر جديد.

ياسين ونادية عينهم برقت وعلامات استفهام كثير ظهرت على وشهم ... قعدوا كلهم في الأتريه، وكريم ابتدى يحكي اللي حصل معاه: لما سبتكوا ورجعت عشان اجيب الموبايل من عند محمود، شوفت نور البدروم منور من الشباك اللي على الأرض، واتفاجأت ان هو ومعاه عصام وناس غريبة موجودين في البدروم، وفضلوا يفحصوا شغلنا وسمعتهم بيتفقوا انهم يخلصوا مننا بمجرد المشروع ما يشتغل.

نادية استغربت جدا من كلام كريم.

ياسين عقد حواجبه وقال بمنتهى الغضب: للأسف عرفنا إنه

جبان وخاين، وبعدين؟

كريم مفهمش قصد ياسين بس كامل وقال: وانا بسمع اللي هما بيخططوله من شبك البدروم؛ واحد منهم شافني، طلعت أجري بسرعة عشان ألحقكم، لكن طبعا ملقتكمش ده غير انهم كانوا بييجروا ورايا، والحمد لله قدرت أزوغ منهم.

ياسين وقف وحضن كريم -اللي وقف بدوره- حضن جامد وبابتسامة قال: الحمد لله انك بخير يا صاحبي، انت لا تتخيل انا كنت قلقان عليك قد إيه، المهم عملت إيه بعد كدة؟

كريم: بعد ما بعثك الرسالة؛ كلمت الدكتور عزام الله يباركله، وقضيت الليلة عنده.

ياسين بص لعزام وهز راسه بعلامة شكر، ورجع بص لكريم وقال: طيب مكنتش بترد علينا ليه؟ وبعدين انت عرفت ازاي اني وصلت؟

كريم ارتبك ولسة هيرد؛ عزام راح مقاطعه وقال: أول ما شوفنا العلامة الزرقا؛ عرفنا انك استلمت رسالة كريم، فتحركنا على هنا على طول.

وبعدين بص لياسين وقال: فين الهارد والخوذة؟ جبتهم مش كدة؟

ياسين بارتياب: أه جبتهم معايا.

كريم: متقلقش يا ياسين، د عزام عارف الحوار من بدري، وبصراحة لولاه؛ كان زمني ضعت.

نادية باهتمام: لكن يا كريم مقولتليش؛ انت ازاي جبت الموبايل وانت مدخلتش البيت من أساسه.

كريم اتصدم من السؤال وراح قايل بارتباك وابتسامة: أه يا طنط ماهو أنا طلع الموبايل معايا في جيبي بس مكنتش واخذ بالي.

نادية علامات وشها كلها كانت بتقول انها مش مصدقة كريم هي وياسين، وعزام أخذ باله من كدة، وفي حركة فجائية، عزام راح مطلع مسدس من جيبه وقال بصوت حازم وقوي: كفايا هري لحد كدة.

"محمود! محمود!" د عصام فضل يسقف على وش محمود لحد ما فاق.

محمود فتح عينيه وبص حواليه وقال: هو إيه اللي حصل؟! وبعدين مسك بطنه وهو بيتألم وبص للدكتور عصام وأحمد وعينه برقت لما ابتدت الذاكرة ترجعه.

د عصام: إيه اللي حصل ومين اللي عمل فيك كدة؟!

محمود وهو مذعور: سارة فاجأتني بالصاعق بتاعها، لكن أنا كنت واقف في وشهم ومنعتهم بكل قوتي عشان محدش منهم يطلع من هنا ومياخدوش الحاجة، صدقني يا خالي والله ده اللي حصل. أحمد بمنتهى الاستغراب: خالي!!

د عصام: طيب وهما كانوا عايزين ياخدوا الحاجة ليه!!

محمود: عشان كريم بيقولوا انه اختفى من امبارح؛ فخافوا وقالوا ياخدوا الحاجة.

د عصام: كريم إختفى!! إزاي الكلام ده؟

أحمد رفع حواجبه وبص باستغراب لدكتور عصام وقال بتهكم: "إختفى إزاي؟" يعني محدش منكم خطفه مثلاً؟ زي ما انتوا عاوزين تعملوا معانا.

د عصام ضحك بعصبية وقال: نخطفكم إيه يابني؟ إنتوا مش فاهمين حاجة.

وراح مطلع تليفونه وطلب حد عليه: أيوا يا دكتورة نادية، ياسين أخذ الحاجة وهرب من هنا ... هحكلك بعدين، أهم حاجة حاولي توصليله لأن الموضوع فيه خطورة عليه، وخصوصاً إن كريم صاحبهم بيقولوا انه إختفى من إمبراح ماشي، وانتي كمان لو فيه أي جديد بلغيني على طول، مع السلامة.

أحمد مش فاهم أي حاجة وواقف في حيرة كبيرة.

د عصام بص للراجل اللي كان موجود معاه وقال: انت عارف هتعمل إيه.

الراجل اتحرك على طول ومشي، د عصام بص لأحمد وقال: يابني أنتوا هنا كنتوا شغالين تحت عينينا وده كان عشان مصلحتكم وعشان نقدر نحميكم وفي نفس الوقت نساعدكم.

أحمد: إزاي يعني؟

د عصام: بالرغم من نكائكم الشديد؛ إلا إنكم ساذجين، مسألتيوش نفسكم الضيافة اللي بتلاقوها كل يوم هنا جاية منين، ولا الأجهزة "المتكهنة" اللي كان أبوك بيحبها؛ إزاي كان فيها حاجات حديثة وحاجات معملية خاصة ببحثكم بالذات؟ أكيد كل ده مش صدفة ... ده غير وغير وغير.

أحمد مبلم وفي نفس الوقت كلام د عصام مقنع وحقيقي؛ إزاي مخدوش بالهم من التفاصيل دي قبل كدة.

د عصام كمل: ومحمود ابن أختي كان هو عينينا وسطيكم، وكنا منبهين عليه ميجيبلكمش أي سيرة وإلا حياتكم هتكون في خطر، حتى موضوع إني خاله محدش في الكلية خالص يعرفه - وده من ساعة ما دخل الكلية - لأسباب تخص أمنه وأمني، وسبحان الله جت مصلحة.

سكت شوية وكمل: طبعا مكانش ينفع نركب كاميرات هنا عشان محدش فيكم يرتاب من حاجة، واكتفيننا بس اننا نكون دايمًا في الدور اللي فوق بنراقب من بعيد لبعيد.

وأثناء النقاش؛ سمعوا صوت سرينة برا الثيللا، وراجل نازل من فوق بسرعة وبيقول بقلق: في عربيتين شرطة برا.

أحمد ضرب بصوابع إيده على قورته وقال: أخ.

د عصام: "أخ" إيه؟

أحمد حكى للدكتور اللي حصل، وإن لينا صورته من تحت الكنبه، وأكد هما اللي بلغوا.

د عصام وأحمد ومحمود كلهم طلوعوا من البدروم عشان يقابلوا الطابيط، ود عصام أكد عليهم محدش يجيب سيرة أي حاجة ويتصرفوا طبيعي.

سارة أول ما شافت د عصام فضلت تشاور عليه وتقول: هو ده
يا حضرة الطابط، هو ده.

وأول ما شافت أحمد جريت عليه هي ولينا ووقفوا معاه وفضلوا
يتطمنون عليه، ووالد سارة فضل يطبطب على كتفه ويشيد بشجاعته،
ويعبر عن إمتنانه الشديد لأنه أنقذ بنته. وبعدين فضلوا يتابعوا اللي
بيحصل بين الطابط و د عصام اللي عمل تليفون وقفل من هنا، كان
تليفون الطابط رانن من هنا، والموقف اتغير مائة وتمانين درجة بعد
التليفون، نبرة الطابط اللي اتغيرت، والإبتسامة اللي من الودن للودن،
لدرجة ان الطابط فجأة اتعدل في وقفته وانحنا بضره سيكة وهو
بيكلم الدكتور عصام، مكانش ناقص غير إنه يديله التحية، والموضوع
خلص والشرطة مشيت، ومعها مخ البنات طار.

دخلوا كلهم الثيلا، وأحمد فهمهم كل حاجة، ومحمود قالهم إن
أبوه شغال في منصب حساس، وإن الدكتور عصام يبقى خاله واللي
بدوره شغال لصالح أبو محمود، وإعتذر للينا على إنه وقعها في
الأرض، فراحت بصاله بابتسامة خبيثة وهي شايفاه لسة ماسك بطنه
وقالت: متحطش في بالك، أنا باخد حقي أول بأول، أmaal انت فاك
بطنك وجعاك ليه. وكلهم فضلوا يضحكوا ولأول مرة محمود يضحك
من قلبه من وقت طويل.

وأثناء تبادل أطراف الحديث د عصام جاتله رسالة من د نادية،
الرسالة خلته يقف فجأة ووشه كله قلق وفزع، وقال: أستر يارب.

عمل تليفون سريع: إبعث حد على بيت د نادية وياسين دلوقتى
حالا، الموقف فيه خطورة على حياتهم، أنا طالع على هناك حالا.
ومع الكلمة دي، الولاد بطنهم وجعتهم جدا وقلبهم وقع في
رجليهم.



تعويذة (الوش)...مفيهاش معلش

صمت رهيب بيخيم على المكان، السلاح ليه هيبة برضو، ياسين
قاعد هو ونادية جنب بعض وإيديهم في إيد بعض، كريم قاعد على
كرسي وعزام على كرسي تاني في وشهم كلهم ومسدسه بكاتم الصوت
متصوب ناحية الكل.

كريم مش فاهم حاجة ومصدوم من اللي عمله عزام، وعزام شاف
ده في عينيه.

كريم بارتباك: إيه يا كبير، إنت أكيد مش هتأذي حد بالمسدس
ده.

عزام ببرود: أتمنى إن محدش يتأذي، بس أنا شاكك فيهم يكونوا
مع د عصام وبيستغفلوك.

كريم بص بريية لنادية وياسين اللي مش فاهم أي حاجة.
عزام بحزم قبل أي حد ما يقول حاجة تاني: فين الهارد والخوذة
يا ياسين؟

ياسين بخنقة: في الأوضة.

عزام شاور لكريم براسه عشان يقوم يجيبهم، ولما رجع بيهم،
عزام عينه لمعت ومسكهم منه بعد تأكيد من كريم إنهم مضبوطين.

نادية بمنتهى الاشمئزاز: ليه الإنسان يكون دنيء وخاين للناس
محسوس ناحيته غير بكل الحب!!

كريم: مش عارفين ليه!! لإن مش من ...

نادية حطت إيدها على بقها وكتمت صوت صرختها وعينها
برقت ودموعها نزلت زي المطر، وبأيدها الثانية بتعصر في إيد ياسين
الي بدوره فضل يترعش ويتنفض زي الي درجة حرارته 41، كل ده
من منظر الرصاصة الي رشقت في راس كريم من الجنب وفجرتها
تماما لأن المسافة كانت قريبة جداً، والدم والأشلاء تناثروا في كل حته
وعليهم كلهم، وزجاج النيش اتكسر لما الرصاصة عدت وضربت فيه
ومن وراه خرمت الحيطه.

عزام بصلهم ببرود وقال بأسلوب مسرحي وهو بيمسح الدم من
على وشه بمنديل من علبة كانت محطوبة على الترابيزة الي في النص:
معلش، أصله كان لسه هيقول خطبة ولا كإنه هو بطل الفيلم، في حين
إن هو شخصية ثانوية، دورها ابتدى لما جالي وهو مخنوق وبيحكيلي
ازاي انتوا رفضتوا عرض المنحة، وإنك يا ياسين حرمتهم من العالمية،
وإن ده مش من حقه، وبما إنك كنت طالع بإسمهم؛ مكانش ينفع
تاخذ قرار الرفض لوحك، وإنه لو الفرصة دي كانت جاتله هو؛ كان
وافق على طول، وانا استغلّيت الفرصة وسألته سؤال "إيه رأيك؛ أنا
أقدر اطلعك مكان ياسين"، وهو سمع الجملة دي من هنا؛ وعينه
لمعت، ومكانش مني غير إنني قفلت العرض بشرط "لازم تاخذ

المشروع وتطلع بيه تقدمه هناك"، ومن ساعتها وهو زي الخاتم في صباعي.

سكت شوية وكمل: بس لو الموضوع فيه أي عزاء ليكم؛ كريم كان بيبرر لنفسه إنه كدة بيساعدكم، وكان ناوي يقول إن انتم كنتم معاه في كل صغيرة وكبيرة، ده كمان كان بيقول إنه هيسمي النظرية بإسك يا ياسين، طبعا حاولت كذا مرة أخليه يقولي أي حاجة عن شغلكم، كان دايمًا يقولي إنكم متعاهدين محدش يحكي حاجة لأي حد مهما كان، ودي كانت حاجة مدايقاني جدا، لكن الصبر في شغلتنا هيجيبلي المشروع كله لحد عندي، وده الي حصل.

ياسين دموعه نازلة زي المطر، مشاعره مختلطة ومتلخبطة، مخنوق من صاحبه الي كان زي أخوه، لكنه ظهر على حقيقته لما مصالحهم تعارضت، وحزين عليه وعالي جراه بسبب الطمع. نادية قالت بخنقة ودموع مكتومة: ياريت تعفينا من الخطب عشان مجبهاش.

عزام ضحك باستهزاء وقال: أنا بطل الفيلم، يعني أخطب زي ما انا عايز؛ وانتوا تسمعوا وانتوا ساكتين ... وفي الآخر تسقفوا. ياسين بعد ما خرج من الصدمة وتمالك نفسه شويه قال بغضب: مش هتفلت من الي انت عملته.

عزام ضحك باستهزاء وقال: الكلام ده تقوله لحد غيري، وبعدين انتوا أصلكم متعرفوش أنا مين؛ أنا واحد من مئات موجودين في كل

جامعاتكم، موجودين عشان نسطاد اللي زيك يا ياسين، ونطلعهم برا، عشان ناخذ خيرهم ويبقوا ملكنا، لكن لما انت مطلعتش كان لازم عيني تفضل عليك ومعديش أي مشكلة إني اتكشف في سبيل إن مشروعك يبقى معايا وأرجع بيه تل أبيب ويكون ملكنا هناك ومحدث في العالم يعرف عنه أي حاجة.

ياسين اتصدم، لكن نادية كانت متوقعة ده، عزام كمل: عشان كدة، محدش فيكم هيطلع من هنا حي، ولا حتى باقي أصحابك، هخلص عليهم كلهم وأطبيييييير.

وفضل يضحك بهستيريا، وياسين ونادية الرعب كان ماليهم.

عزام بص حواليه شاف صور العلماء المصريين اللي تم اغتيالهم متعلقة على الحيطه جنب النيش وقال وهو بيضحك باستهزاء: ياااااااا، احنا عندنا حيطه زي دي بالظبط، بس عدد الصور عليها أضعاف أضعاف اللي هنا، لأن أجهزتك معرفتش أو مقالتش غير دول.

وبالرغم من صعوبة الموقف وبشاعة اللي حصل لكريم، والرعب اللي كان ماليهم؛ إلا إن في مشاعر تانية هي اللي بقت مسيطرة دلوقتي، مشاعر دايمًا تنتابنا أول ما بنعرف إن طرف الحكاية واحد منهم؛ المعتدين، المحتلين، فاقدى الدين، والغير آدميين.

نادية قالت بقوة: إنتم أحقر ناس على وجه الأرض.

عزام بمنتهى العنف: إحنأ أسفاد الأرض؁ وانتم كلكم عبفء؁ وهففبب البوم الفف الأرض هفننصف منكم؁ أءلنا قرب الست شهرور بنءك غزة وموتنا من أهلفها آلافا؁ ءء عرف فوقفنا؟ لا؁ عارفة لفه؟ عشان العالم كله ملكنا؁ والكلمة الفف بنقولها؛ هف بس الفف صءاها هفءوف "إسرائفل لها ءق الءفاع عن نفسها" ومءءش هفسمع بفرها؁ مهما طلعنوا ففءفوهاء لأطفال بتموآ ومسءشففاآ بءنضرب وأبراء بفموآ؁ لكن اءنا بنطلع واءء بس ماآ؁ ف الءنفا كلها تقوم مءءءءش بفر لما ناءء قصاءه آلاف اناففن.

فاسفن ءمه بفف وقال: واءء مفن فآ أبو واءء؁ رءالنا الأبطال فف "فلسطفن" آءءوا منكم كءفر المراءف؁ وفف أبطال اناففن - بس لأسباب سفاسفة مش هفنقول هما منفن - ضربوا إفلاآ "للمرة اناففة" فف انارفءهم⁽¹⁾؁ ورفقوا ءاملة طفارات أمرفكفة بالفف علفها⁽²⁾؁ ءه بفر إفشال مءططكم الءنفء لمءاولة آهبفر أصحاب الأرض؁ وفف الآخر اننوا اءفنولنا هءفة على طبق من ءهب؛ الإءماع على مقاطعة مننءاءكم وازءهار الصناعة المءلفة والعرففة.

ناءفة بآهكم: معلق فآ فاسفن أصلنا كنا مءبفن علفه فمفعرفش الكلام ءه كله.²

عزام ابءسم بفبظ ورفع المسءس لفوق وقال: شاففن المسءس ءه؛ ءه اسمه "Desert eagle" صناعة إسرائفلفة؁ عارففن أنا اشءرففه

⁽²⁾⁽¹⁾ قاءر على كل شفة²

منين؟ من عندكم هنا، مع إن في إسرائيل نفسها مش بيتباع هناك لإنه مسدس زباله، عشان كده بنبيعهولكم، لإننا دايمًا بنديكم زبالتنا، وكده كده الصناعات اللي انتوا فرحانين بيها متفرقش معنا، وكده كده هنغير أسماء منتجاتنا ونبيعهالكم على إنها مصرية، مش حوار يعني، وهتفضلوا تحت رحمتنا لحد ما نقضي عليكم.

ياسين دمه فار وحاول يقوم لكن المسدس سبقه وكان متوجه ناحية نادية، ياسين مسك نفسه عشان خايف على أمه.

نادية قالت لياسين بابتسامه هادية لما شافته بيتراجع: قل لن يصيبنا إلا ما كتب الله لنا يا ياسين يا حبيبي.

ياسين عينه دمعت.

عزام قال بصوت غاضب: خلاص خلصنا.

وهدى نفسه بنفس عميق وقال: طبعا المفروض ان انا كنت هموتكم كلكم بسكاكين، وأمَّسك ياسين السكينة اللي مات بيها كريم والعكس، بس بصراحة كريم لما رجع البيت عند محمود - وده كان الاتفاق بيني وبينه - عشان يسرق الهارد والخوذة؛ شاف محمود هناك ومعاه د عصام وكام راجل كده، طبعا خليته يصورهم وييعتلي، وعرفت ان الرجالة دي من عناصر الأمن المصرية، وأدركت إنهم في اللعبة، والمشكلة ان كريم الغبي لما شاف المنظر قاللي "د عصام ممكن يكون عايز يسرق المشروع ويكتبه بإسمه، أو أخطر؛ ده ممكن يكون تبع مخابرات أجنبية" وكان قرفان ومتدايق جدًا ولولا إني بعرف

أتحكم في نفسي؛ أنا كنت فطست على روعي من الضحك قدامه، لكن
طبعًا عملت متدابق أنا كمان ووصفت د عصام إنه خاين وإزاي يعمل
كده، وعومت على عوم كريم لحد ما صدق.

وفضل يضحك زي المجنون.

كمل بعد ما خلص ضحك: المهم إني لما عرفت بوجود المخبرات
المصرية في اللعبة؛ قررت إني هسيبلهم جواب جمب جثثكم، عشان
أعرّفهم إننا علمنا عليكم، وأنا كدة كدة هكون خرجت برا البلد.

نادية بصت في الساعة "ياترى إيه اللي أخرهم كدة"

عزام صوب مسدسه ناحية ياسين وقال: هبقى أحطلك صورة
على الحيطه متقلقش.

وفي اللحظة اللي بيدوس فيها على الزناد عشان يقتل ياسين
الأول؛ باب الشقة اتفتح بصوت كسر، عناصر الأمن اقتحمت المكان،
عزام ضرب الرصاصة وجري على البلكونة جوا خالص ونط منها،
ونادية حطت جسمها بين ياسين والرصاصة اللي للأسف اخترقت
جسمها وبالتالي دخلت جوا جسم ياسين، والعناصر جريت وراه في
محاولة للإمساك بيه ... د عصام دخل شاف المنظر، كل اللي في الشقة
كانوا غرقانين في دمهم، وعلى الترابيزة ظرف مقفول ومكتوب عليه
"شكرًا لحسن تعاونكم معنا".

لسة فالكه

"والله شوف حضرتك ممكن تقولهم إيه لكن إبني هيفضل في بلده ووسط أهله..... مع السلامة" ناديه قفلت السكه مع د عصام، وإدت ياسين تليفونه، وسابته ودخلت أوضتها وقفلت على نفسها وفضلت تعيط ... حزينه انها حرمت ابنها الوحيد من فرصة فعلاً مبتجيش غير واحد في ال 10 مليون، يا ترى هي كده ظلمت ياسين؟ ولا صح اللي عملته؟ يا ترى إبنها حاسس بإيه دلوقتي؟ وأستله تانيه كتير عماله تدور جوا نفسها؛ لحد ما سمعت صوت ياسين وهو بيقولها إنه نازل يشم شويه هوا، وفتح باب الشقه وخرج، ناديه فضلت تؤنب في نفسها، لحد ما قررت تكلم د عصام.

- أيوه يا عصام.
- إزيك يا ناديه.
- أرجوك سامحني واعذرني بس أنا حقيقي خايفه على ياسين، وهو اللي طلعت بيه من الدنيا، وهو دنيتي كلها.
- طيب هدي نفسك بس وقوليلي إيه اللي مخوفك؟
- المشروع اللي هو بيتكلم عليه ده لو حقيقي ويمكن تطبيقه؛ مش هيسيبوه، بالعكس هيمسكوا فيه بإيديهم وسنانهم ولو رفض يعمل اللي هما عايزينه؛ مش هيرجعوه سليم أبداً.
- طيب ولو قولتلك ان مفيش حاجه من دي هتحصل.

- ازاي يعني؟ ساحر حضرتك.
- ههههههه، لسة زي مانتى متغيرتيش من أيام الكلية، أنا لحد دلوقتي مش مصدق الصدفة العجيبة دي، معقول؟ أروح أزور طالب عندي؛ أتفاجئ إن أمه هي الست اللي عمري ما حبيت غيرها.
- اتفاجئت برضو؟!!
- بصراحة لا، أنا كنت عارف من ساعة ما كلام الناس على عبقرية ياسين ابدى ينتشر؛ عملت تحرياتى وعرفت كل حاجة عنكم ... أقولك على حاجة؛ انا قصدت انى أطب عليكم فى البيت عشان أشوفك.
- يا عصام إحنا فى إيه ولا فى إيه دلوقتي.
- لا يا نادية بقى، ده وقته، أنا من ساعة ما كنت عندكم فى البيت وانتي كلمتيني بعدها تستفسري عن المنحة، ولما حاولت ألكمك اتهربتني مني ... من حقي أعرف؛ إنتي ليه بعثيني لما أبوكي رفضني؟ انا من ساعتها وأنا عايش فى عذاب، وإيه؛ رفضني عشان بشرتي غامقة، أديكي إتجوزتي شق اللفت؛ عملتي إيه؟!!
- نادية بصوت عالي وقوي: عصام! إنت شمتان فيا؟!!
- عصام بصوت هادي مليان حزن: أنا اشمتم فيكي! لا عشت ولا كنت، إنتي لو عرفتي حالي من بعدك والله هصعب عليكى، يكفى بس إنك تعرفي إنى متجوزتش لحد دلوقتي، ولحد دلوقتي مـ....
- نادية وهي بتجز على سنانها قاطعته وقالت: عصام! أنا حضرت فرحك أنا وصبري وياسين عنده سنة.

عصام بارتباك: إيه ده؟ والله؟ آآ .. ولو برضو، ده كان جواز تقضية واجب.

نادية باستعطاف: عصام أرجوك، أوعدك اننا نتكلم في اللي فات زي مانت عايز، بس دلوقتي أنا عايزة أشوف حل في موضوع ياسين.
- حاضر يا ستي، بس اللي هقولهولك ده يفضل بيني وبينك، عشان لو أي حد عرف بما فيهم ياسين؛ حياة إبنك هتكون في خطر.
- أوعدك محدش هيعرف.

- تمام، مبدأياً كدة وبعيداً عن أي حاجة كانت بتربط بينا في الماضي؛ موضوع السفر ده كان صوري.

- يعني إيه؟!!!

- يعني أنا كنت هاخذ ياسين المطار ومن هناك كان هيروح مكان فيه كل التسهيلات والتأمين الشامل له لحد ما يخلص المشروع بتاعه، والحركة دي كانت عشان البيه ياسين لامم حواليه خمسة من أصدقاءه وحاكيلهم على كل حاجة، والله أعلم ممكن مين فيهم يكون حاكي لمين، فكان لازم الكل يقتنع إنه سافر.

- يعني كنت هتخطف الواد؟!!

- لا طبعاً، أكيد كنت هخيره، بس كنت هفهمه اللي هيحصل لو سافر ولو مشروع زي ده وقع في إيد الناس اللي برا واللي بيكرهولنا أي خير، وأنا واثق إنه كان هيوافق بيجي معايا.
- الله يريح بالك يا شيخ، يعني اللي انا عملته ده كان صح.

- ده كان عين العقل كمان، المهم؛ بما ان السفرية اتلغت وزمان ياسين حكى لاصحابه؛ هنضطر نمشي بالخطة البديلة.
- إيه هي؟
- هستفزه يشتغل على المشروع بتاعه، تحت عيني طبعًا وواحد من زميله أنا أقدر أخليه يكون عينينا معاهم، كدة كدة أبوه حبيبي، ومن الناس اللي اشتغلت معاهم كذا مرة قبل كدة.
- هو انت شغال إيه بالضبط يا عصام؟!
- ضحك عصام وقال: دكتور في كلية العلوم، وأفتخر بخدمة بلدي.

- صوت أجهزة قياس النبض والأوكسجين شغاله بانتظام، الضوء شديد، عينه عمالة تفتح وتقفل.
- د عصام وأحمد قاموا بسرعة عند السرير، أحمد بلهفة: ياسين! إنت كويس يا صاحبي؟ حاسس بيايه؟
- د عصام مسك إيد ياسين وطبطب عليها: الحمد لله على سلامتكم يا بطل.
- المرضة دخلت ومعها الدكتور، وطمنوهم على حالة ياسين ووصفوها بالمستقرة،
- ياسين بضعف قال: إيه اللي حصل؟
- أحمد بص للدكتور عصام وقال: كل خير يا حبيبي، قدر ولطف.

ياسين فجأة انتبه وابتدى يتحرك بعنف وبيتلَّفْت حواليه
 وبيحاول يقوم من عالسريير وعمال يصرخ: أمي فييين؟ أمي
 فييين؟

المرضة والدكتور وأحمد مسكوا ياسين كتفوه، وحاولوا يهدوه،
 والمرضة ادتله حقنه مهدئة بسرعة، د عصام قال وعينه شبه مدمعة:
 إهدى يا ياسين، ماما كويسة الحمد لله، بس هي إصابتها كانت قوية
 شوية، وحاليا هي في العناية، وان شاء الله هتقوم بالسلامة.
 بصوت ضعيف من أثر المهدئ ياسين قال: عايز أشوفها، عايز
 اتطمئن عليها.

وفجأة رجع يصرخ تاني بمنتهى الغضب وكأن المهدئ أثره
 تلاشى: هو فييين، عزام الحقيق، هو فييين فييين.
 د عصام بصوت حازم مليان بالغضب قال: متقلقش يا ياسين،
 الكلب ده مش هيفلت من إيدينا، ومش هيطلع من البلد لا هو ولا
 الحاجة اللي خدها.

في اللحظة دي ياسين غاب عن الوعي تاني.
 تاني يوم ياسين فاق وبص حواليه لقي سارة ولينا مع أهاليهم
 ود عصام واقفين مع الدكتور وبيتكلموا.
 سارة بلهفة وفرحة: ياسين! الحمد لله على السلامة.
 لينا: الحمد لله على السلامة يا بطل.
 ياسين: الله يسلمكم، ممكن حد يفهمني إيه اللي حصل.

د عصام: ياسين يا حبيبي، د نادية بعنتلي رسالة بتقول ان عزام وكريم موجودين عندكم في البيت وفيهم حاجة مش مضبوطة، ولما وصلنا - ومع المعاينة - لقينا د نادية واقعة فوقك وواحدة رصاصة في ظهرها، اظاهر كدة كانت بتحاول تفديك بنفسها، لكن الرصاصة عدت وطالتك انت كمان في صدرك تحت عظمة الترقوة اليمين، ودي إصابة سهلة ان شاء الله، لكن د نادية الرصاصة عدت من فوق القلب مباشرة، وده احتاج تدخل جراحي والدكاترة قالوا انها هتكون كويسة ان شاء الله، بس آآ..

ياسين: بس إيه؟!

سارة: طنط في غيبوبة ملهاش أي سبب، ودي مشكلتها انهم ميعرفوش ممكن تفوق إيمته.

ياسين عينه دمعت ومكان الجرح ألمه، وابتدى يهم عشان يقوم، والدة لينا حطت إيديها على كتف ياسين وقالت بحنية: ياسين يا حبيبي، انت محتاج ترتاح عشان تخف وتبقى زي الفل، وعشان لما ماما تفوق؛ تلاقك واقف جمبها.

الكل هز راسه تأييدًا للكلام، ياسين انتبه فجأة وقال: يا د عصام! الناس الي هنا دي كلها في خطر، طول مالي اسمه عزام ده هربان. في اللحظة دي محمود والعقيد محمد الصاوي والده كانوا داخلين الأوضة وسامعين السؤال، محمود جري على ياسين وحضنه بحرص، ع الصاوي قال: يا ياسين يا حبيبي إنت واصحابك أمانة في

رقبتنا، وتم استضافة الكل بأسرهم في أحد فنادق القوات المسلحة،
وتعيين حراسة ليهم بتوديمهم وتجيبهم من مشاويرهم.
محمود بابتسامة: وخلي بالك الخدمة هناك خمس نجوم، الحمد
لله على سلامتك يا صديقي.

ع الصاوي قال: ياسين! إنت والدك عرف الي حصل؟
ياسين ابتسم بسخرية وقال: للأسف أبويا مش بيكلمنا غير أول
كل شهر عشان يشوف الفلوس وصلت ولا لا.

ياسين كمل بحزن وقال: مامة كريم عاملة إيه؟
الكل سكت من كتر حزنهم بسبب صاحبهم الي الطمع عمى قلبه
ومحسش إنه كان بيساعد أكبر عدوّ ليه وليهم - ولي بيافهم؛ عدوّ
للعالم كله - لحد ما راح ومخدش معاه أي حاجة، وساب من وراه
الحزن والألم للي كانوا عايشين حواليه، وحرقة قلب أمه وأبوه.
د عصام قام وقف وقال: طيب يا ياسين نسيك عشان ترتاح
شوية، ومتقلقش أنا بايت معاك بس هظبط كام حاجة وأجيلك، مش
هتأخر عليك.

ياسين: متتعيش نفسك يا د عصام والله انا الحمد لله كويس.
د عصام: متتعيش انت نفسك، وبعدين إمسك صحيح.
وراح مطلع موبايل ياسين من جيبه وكمل: أنا جبتك الموبايل
بتاعك وبتاع الدكتور بروض احتياطي والشواحن.
ياسين شكر دعصام وابتسم وبعدين بص بجانب عينه في الأرض
وقال: قبل ما تمشوا من فضلکم؛ عايزکم تسامحوني.

الكل بص لياسين باستغراب وتساؤل، ياسين كامل: سامحوني
اني حطتكم في الموقف ده وعرضت حياتكم للخطر.
سارة قالت: يا ياسين احنا كلنا بخير والحمد لله، المهم بس تقوم
بالسلامة.

محمود: يعني هو ده اللي مزعلك؛ لكن مش زعلان على المشروع
اللي اتسرق؟!

ياسين بارتباك قال: آه طبعًا والمشروع الي راح من إيدينا.
سارة زغرت لمحمود وقالت: فداك أي حاجة يا ياسين، وان شاء
الله لما تقوم بالسلامة تعمل مشروع واثنين وعشرة.
د عصام حط إيده على كتف ياسين وقال: وبعدين مين قالك إنه
راح من إيدينا؛ إن شاء الله عينينا مش هتغفل ولا هيهدالنا بال غير لما
الحاجة ترجع ومعها الكلب اللي عمل عملته وهرب.
والكل سلم على ياسين ومشوا، وفضيت الأوضة عليه ... والباب
فضل عليه حارس.

البيض

ياسين صحي من النوم، الدنيا كانت ليل، بص حواليه شاف د عصام نايم على الكرسي، الدنيا رايقة في المستشفى، فضل ياسين باصص للسقف عمال بيفكر، لازم يخرج من المستشفى لوحده، أولاً عشان محدش يتأذي بسببه، ثانياً لأنه دلوقتي مش واثق في حد، وشوية راح معدول على السرير في وضع الجلوس، شال خرطوم المحلول اللي خلص من الكانيولا اللي في إيده وقفلها كويس، وشال مستشعر المعدلات الحيوية من صباعه، قام ولبس الكروكس الأبيض ومشي بالراحة لحد ما وصل جمب د عصام اللي كان نايم في سابع نومة، ياسين شاف الجاكيث بتاع د عصام متعلق على ظهر الكرسي اللي هو نايم عليه، مد إيده ناحية الجيب عشان يجيب المحفظة من غير ما يحس، وطبعاً في المواقف اللي زي دي في الأفلام؛ لازم يحصل حاجة تخلي د عصام يتقلّب ويحسس ياسين إنه هيصحى فيتخض ويفضل عايش في جو سسبنس لحد ما ياخذ المحفظة، لكن ولأن ده مش فيلم؛ محصلش أي حاجة من دي، وياسين أخذ المحفظة عادي، فتحها لقي فيها فلوس، فسحب منها أربع ورقات ب 200 ج، ورجع المحفظة مكانها تاني ... راح عند باب الأوضة وبص من الشّراة الإزاز؛ فضل متابع الحارس شوية لحد ما قام، ياسين أول ما شاف الدنيا سالكة، فتح وطلع بالراحة وقفل الباب وراه.

ماشي ياسين في الطرقة، الممرضات عاملين يبصوا عليه
باستغراب، لحد ما واحدة منهم استوقفته: حضرتك أوضة كام؟
ورايح فين؟

ياسين ارتبك وبعدين مسك نفسه وقال بثقة وحزم: أنا ملازم
حسام الدين ونازل أولع سيجارة، فيه عندك مشكلة؟
المرضة: لا يا فندم مفيش عندي مشكلة طبعًا، بس برا الدنيا
برد ومتآخذنيش يعني؛ سعادتك لابس مريلة وممكن تستهوى.
ياسين: استهوى! أه.

وبص على ال ID بتاعها وكمل: طيب بصي ياااا أمل، إنتي شكك
بنت حلال، أنا لبسي كله في المغسلة، ممكن تساعديني.
أمل: بص سعادتك أنا ممكن أديك أي أقرول من اللي بيلبسوه
الدكاترة والممرضين.

ياسين طبعًا مكانش معاه فكة، فراح مديها ورقة ب 200
وخلص وقالها: طيب ظبطيني.
أمل بصت للفلوس وقالت بابتسامة: عيب يا باشا، والله ما آخذ
حاجة.

ياسين: عشان أنا ظابط وكدة؟ متخافيش.
أمل: لا يا باشا فيه ناس بتاخذ من رتب أعلى منك عادي، بس أنا
محببش كدة.

ياسين باستغراب: غريبة أول مرة أشوف حد يرفض "شاي"،
إشمعنا؟!

أمل: يا باشا أبويا علمني إن زمان كان اللي بياخد "الشاي" بياخده على حاجة زيادة عن شغله عملها، وممكن ميرضاش لو حس انها حاجة مش مستاهلة، انهاردة "الشاي" بقت الناس تطلبه عشان تعمل شغلها الأساسي واللي أصلا بتاخذ عليه مرتب، طيب ده يرضي ربنا؟

ياسين أوماً براسه وقال: والله كلامك صح، وللأسف بقوا كثير جدًا، وفاضحينا جوا وبر مصر.

أمل: لا يا باشا ولا كثير ولا حاجة، بس فيه مَثَل كانت دايمًا جدتي تقوله "لو عندنا 100 بيضة حطيناهم في جردل مياه، تلاقي السليم كله في القعر والكام واحدة البايطين هما اللي بيعوموا عالوش، فاللي يبص من برا مش هيشوف غير البايظ".

ياسين ابتسم لفطنة المرضة ونَفَسَهَا العفيفة، وراح معاها عند أوضة فيها ملابس مخصصة للدكاترة، دخل غَيْرَ فيها وطلع، شكر المرضة ومشي.

ياسين فضل ماشي لحد ما وصل للعناية المركزة، كان بيحاول يشوف أمه ... لبس الكمامة ودخل، فضل يدور لحد ما لقاها، نايمة ومتوصلة بأنابيب وأسلاك كثير، ياسين عينه دمعت غصب عنه، مسك إيديها بعد ما عقم إيده بكحول موجود في الأوضة، وفضل يدعيها ويبوس في إيديها.

عدت خمس دقائق وبعدها ياسين وقف ونشف دموعه وبدأ رحلة الخروج من المستشفى.

ياسين لبس كمامة وخرج برا مبنى المستشفى بسهولة، لكن الأمن على البوابة برا مشددين جامد، فضل يبص يمين وشمال بيحاول يلاقي طريقة، لحد ما لقي ناس طالعين من مبنى المستشفى ومعاهم حالة شايلنها على نقالة، وعربية الإسعاف داخله من برا عشان تنقلها، ياسين مكلمش ثواني وكان واخذ وضع التنفيذ.

جري استقبل المريض من على باب المبنى ومع المسعفين ياسين عمل نفسه بيشيل النقالة وحطوها في العربية، ياسين مرتبك وخايف يركب يتقفش لحد ما واحد من المسعفين قال: انت جاي مع الحالة يا دكتور ولا مش جاي؟ ياسين رد: آه.
ركب ياسين والعربية خرجت من المستشفى بسلام.

ياسين في إشارة مرور راح فاتح الباب الخلفي ونزل من العربية وجري على خفيف بسبب الجرح لحد ما اختفى عن أنظار المسعفين والمرافق اللي كان قاعد معاه ورا.

ياسين فضل بعدها ماشي شريد، بيحاول يستوعب اللي حصل لحد دلوقتي، وفي ذهنه ذكريات قديمة زارته، كريم وأول تعارف بينهم، وقد إيه هو كان أكثر حد في الشلة أقرب لقلبه، طول عمره كان نفسه في أخ، أو أب في حياته يسنده، أبوه اتخلى عنه في أكثر سن هو كان محتاجه فيه، أبوه اللي كان مالي عليه دنيته وهو صغير، إفتكر ياسين هو قد إيه كان بيحب يخرج مع أبوه ويسافروا، ذكريات كلها خلت ياسين يجري على أقرب كشك ويحول رصيد عشان يكلم أبوه.

- بابا! إزيك يا بابا.
 - خير يا ياسين في إيه؟!
 - معلىش أنا صحيتك من النوم؟ مخدتش بالي من فرق التوقيت.

- طيب قول فيه إيه قلققتني.
 - فاكرا يا بابا زمان لما كنا بنخرج وكنت بحب استخبى منك؛ وراح واحد من الولاد الكبار في الحته عندنا فضل يرزل عليا وانت جيت ضربته بالقلم، والولد جري؟
 - انت أكيد بتهرج ... لا يا حبيبتى مفيش حاجة، نامي انتي؛ انا هقفل دلوقتي.

- حضرتك بتكلمني أنا؟
 - عاجبك كدة! أديك صحيت الكل، قول واخلص عايز إيه مني.
 ياسين صوته ابتدئ يتعرش من كتر ما هو بيحاول يحبس دموعه ويكتم مشاعره وقال:
 معلىش حقك عليا واعتذرلهم، أنا بس كنت عايز أقولك إني فعلا محتاجلك، أكثر من أي وقت فات.

- لو اتصالك ده عشان أزود الفلوس اللي ببعتهالكم؛ أحب أقولك إن ده مش هيحصل.

- فلوس!! هو ده مفهوم احتياج الابن لأبوه عند حضرتك!! لا يا بابا أنا مش متصل عشان فلوس، بالعكس؛ شكل حضرتك كدة هتوفر الفلوس اللي ببعتهالنا كل شهر قريب.

- ياسين انت عارف ان الحياة هنا غالية، واخواتك هنا واخدين اللي ورايا واللي قدامي، وان شاء الله كلها شهرين تلاته وتخرج، يعني بقيت راجل أهو وتقدر تعتمد على نفسك، يعني اللي هوفره هيكون لآخواتك.

- إخواني اللي ميعرفونيش ولا انا أعرفهم؟! ربنا ما يجعل حظهم في أبوهم زي حظي، وآسف اني اتصلت بحضرتك، حقيقي آسف.

وقفل ياسين السكة وانهار من العياط، ووسط ما هو بيعيط لقي إيد بتططب على كتفه، راجل عجوز باصص لياسين وعلى وشه ابتسامة جميلة وقال: مالك يابني بس صلي ع النبي، صلى الله عليه وسلم.

ياسين حس براحة للراجل ده وقال في نفسه، أكيد ده الراجل الحكيم اللي بيظهر لبطل الفيلم واللي هيديله الزيتون. ياسين: الحمد لله على كل حال، انا بس في ضيقة. العجوز: معلش يابني ربنا يفكها عليك، ألاقيش معاك 10 جنيه؟

ياسين اتصدم بس في نفس الوقت ضحك، وفضل يضحك ومش عارف يوقف، لحد الراجل ما بصله باستغراب وملامحه ابتدت يبان عليها الغضب. ياسين راح مطلع عشرة جنيه وادهاله وهو لسة بيضحك، الراجل أخذ الفلوس ومشي من سكات وهو لسة بيصله

باستغراب. ياسين بيضحك من غلبه وهمه، ومن موقف الزيتونة اللي كان مستنيها من الراجل؛ أتاري الراجل هو اللي عايز زيتونة.

ياسين هدي من الضحك، وفضل يفكر، ليه يفضل مستني الناس تدليه، سواءً وقفة أبوه جمبه، أو الحكمة من راجل عجوز، في حين إن ربنا إداله نعمة كبيرة؛ نعمة العلم، وحسن التصرف، ووقفله ناس تساعده زي أصحابه ود عصام ووالدته اللي مقصرتش معاه لحظة ... فكر في موقف الممرضة أمل وكلامها؛ وان فيه ناس كتير كويسين مش مستنيين حاجة من حد ... كل ده خلاه يخرج من حالة الحزن والاكتئاب اللي كان داخل عليها، وفكر نفسه بكلام أمه ليه وهو صغير " حرب المخ أقوى بكثير من حرب العضلات، بسم الله توكلت على الله " وطلع تليفونه ورن على حسن صاحبه، واتفق معاه إنه رايحله المحل.

تيجي تصيره ... يصيرك

ياسين وصل عند حسن، وأمَّن إن مفيش حد خالص شايفه،
سلموا علي بعض الاتنين وحسن اتظمن على صحة ياسين وصحة
والدته.

حسن: يا صاحبي والله أنا كنت جايلك بكرة أنا وكام واحد من
الحتة عشان نتظمن عليكم في المستشفى، بس انت سبقت.

ياسين: حبيبي يا أبو علي كلك واجب، بس انا كان لازم أطلع
الليلة دي، الأمانة فين يا معلم؟

حسن: في مكانها من يوم الحادثة.
وقام جاب الهارد وسلمه لياسين.

حسن: هي الأمانة دي ليها علاقة بالي حصل، مش كدة؟

ياسين: مش هكدب عليك؛ دي كانت أساس الي حصل، يومها أنا
كنت داخل عندك عشان اتظمن إن مفيش حد كان جاي ورايا، وبعدين
جاتي فكرة إنني أبديل الهارد عندك - زيادة تأمين - بأي هارد قديم
من الأجهزة الي مش شغالة، وسبحان الله إنه هداني للفكرة دي.

حسن: طيب ماتأخذنيش في السؤال؛ هو إيه الي حصل اليوم ده؟
واحد من الي قاعدين بيلعبوا بلاي ستيشن قام وراح ناحية
المكتب بتاع حسن وماسك تليفونه وعليه مكالمة من حد ثاني على اللاود

سبيكر واللي قال: اللي حصل اليوم ده ميتحكيش، ومش عايزينه يتكرر، ولا إيه يا ياسو.

ياسين بص لمصدر الصوت واتسمر مكانه، ووشه اصفّر، أصل الصوت اللي بيكلمه هو عزام.

حسن شاف الخوف والرعب على وش ياسين ... حسن راح فاتح درج المكتب وساب إيده جواه ماسكة المطوة استعدادًا لأي حاجة وقال للشخص اللي قدامه: مالك ياااااا، ابلع ريقك واتكل من هنا عشان م... ياسين مسك إيد حسن وعصر عليها جامد عشان يسكت، وفي نفس الوقت كان فيه تلاته تانيين بيلعبوا، فجأة وقفوا لعب ولفوا كلهم بجسمهم وفي أيديهم مسدسات.

عزام بتهكم من على التلفون: بالراحة يا معلم حسن إحنا مش قدك، وبعدين أمك وأبوك وأخواتك اللي نايمين دلوقتي في البيت اللي جمب المخبز في الحوتية؛ جمبكم في العجوزة، ليه نصحيهم على خبر وفاتك.

حسن مكانش بيهمه حد، وخصوصا لما بيكون على حق، لكن ياسين فرمله وقال لعزام: اللي انت جاي علشانه أهو.

وراح مادد إيده بالهارد للشخص اللي واقف قدامه عزام: لا يا حلو، الكلام ده كان في البيت عندكم، وخلي بالك أنا مش زعلان منك، العيب عالكلب اللي أكدي إن الهارد تمام. ياسين اتخفق ان صاحبه بيتشتم وهو ميت بس كتم غيظه لَحَسَن الموقف يتطور وَحَسَن يتأذي.

عزام من على التليفون: بس متقلقش أنا لما لقيت الهارد فاضي أدركت إنك ممكن تكون بدلته في الوقت اللي انت دخلت فيه هنا قبل ما تطلع البيت، وكان ممكن أجيب عليها واطيها والهارد كان هيبقى معايا، لكن أنا جاتلي فكرة تانية خالص، وكدة كدة كنت عارف انك هترجع عشان الهارد، ومكالمتك لحسن صاحبك أكدتلي المعلومة، عشان كدة أنا هعمل معاك ديل حلو يا ياسين، تحب تجيلي مع الرجالة اللي عندك دلوقتي من غير شوشرة؟ ولا تحب انت وصاحبك وأهل صاحبك تروحوا تودسوا كريبيم؟ بالحق صحيح؛ دنادية لحقوها زيك كدة في المستشفى ولا نقول البقية في حياتك؟

ياسين حواجه اتعقدت وقال: أمي و حسن برا الحوار اللي بيننا ده، وانا هجيلك مع رجالتك.

حسن حاول يمنع ياسين ويتصدرله واللي يحصل يحصل، لكن ياسين قال: يا حسن مش هسامح نفسي لو حصلك أي حاجة بسببي، لو سمحت اقل المحل وروح بيتك وانا كدة كدة هروح معاهم.

بالعافية حسن اقتنع، وياسين طلع مع رجالة عزام، ركبوا عربية SUV واتحركوا.

واحد من رجالة عزام قال لياسين: تسمحي بتليفونك يا بروفيسور.

ياسين طلع تليفونه ... الراجل راح مطوحه من العربية وهي ماشية، وراح حاطط كيس قماش أسود على راس ياسين.

العربية فضلت ماشية حوالي ساعتين وصوت الزحمة عمال يقل، لحد ما راح الصوت خالص، ونص ساعة تاني مشيوا في طريق مددق ومش مستوي لحد ما وقفوا، وصوت باب حديد اتفتح، والعربية كملت مشي خمس دقائق تاني وبعدين وقفت، رجالة عزام نزلوا وسحبوا ياسين اللي مش شايف حاجة وطلعوا كام سلمة وبعدين صوت باب اتفتح، دخلوا من الباب ومشيوا شوية وبعدين صوت باب تاني اتفتح، والمرادي نزلوا سلاّم كثير شوية، والباب من وراهم اتقفّل. عزام شال الكيس من على راس ياسين، ياسين الضوء خلاه يغمض عينه بسرعة، وشوية شوية الرؤية ابتدت توضح، وشاف نفسه في بدروم كبير مليون مكاتب وأجهزة.

عزام: أهلاً بيك في المقر المتواضع بتاعنا.

ياسين: أديني جيتك أهو؛ ممكن أعرف انت جاييني هنا ليه؟
عزام: بص يا معلم، بصراحة بقى انا جاتي فكرة ... ليه آخذ الاختراع بتاعك وأقول إنني خدته منك لما ممكن أقول إنه بتاعي من الأساس، لكن عشان ده يحصل؛ لازم الأول أفهم هو عن إيه واتعمل ازاي.

وراح ماسك أكتاف ياسين وبابتسامه كمل: انا بقى جيتك هنا

عشان تعلمني، يلا يا عبقري ابتي.

ياسين: وبعد كدة؟

عزام ابتدئ يمشي رايح جاي قدام ياسين وقال: سؤال جميل ...
قدامك حل من اتنين؛ الأول انك تحصل كريمة، انت وكل الي كان ليهم
علاقة بالمشروع وطبعًا مقدرش أنسى نادية.

سكت شوية وهو بيتفرج على مشاعر الرعب الي ظاهرة على وش
ياسين وبعدين كمل: والتاني انك تيجي معايا تل أبيب وهناك هقول
انك كنت المساعد بتاعي وتاخذ مزايا عمرك ما كنت تحلم بيها وفلوس
ملهاش أول من آخر، والجنسية الي مش أي حد بياخذها، وأصحابك
ووالدتك ساعتها هيعيشوا.

وراح عزام على جهاز كمبيوتر ركب الهارد ووصل الخوذة
بفيشة الكهرباء وبالجهاز من خلال الوصلة ال Type-C.

ياسين بص للجهاز وشاف البرنامج وهو بيتسطب وبعدين
بيتعرف على الخوذة، تعب ياسين وشقاه هو وأصحابه بيروح قدام
عينه، مش بس كدة؛ ده كمان حياتهم كلهم على المحك.

عزام: قولت إيه يا بروفييسور؟

ياسين مش عارف يرد يقول إيه؛ يوافق ويخون بلده وأهله
وناسه؟ ولا يرفض ويخسر أهله وناسه؟ "قل لن يصيبنا إلا ما كتب
الله لنا" ياسين افتكر آخر كلمات نادية ليه، عينه ابتدت تدمع وبص
لفوق وهو بيترعش وبيقول "يارب".

عزام بحواجب معقودة: معتقدش إن حد هيلحقك المرادي.

ياسين بصوت خافت: قل لن يصيبنا إلا ما كتب الله لنا.

وصوته ابتدئ يعلى شوية بشوية لحد ما بقى زعيق لعزام: قل
 لن يصيبنا إلا ما كتب الله لنا.
 وفضل ياسين يكررها بمنتهى القوة بعد ما كان بيتعش
 ومرعوب، وفضل يقرب من عزام اللي فضل ياخذ خطوات لورا،
 وابتدى يظهر عليه علامات الخوف، أصل عزام من جواه اتهز وراح
 مطلع مسدسه ووجهه ناحية ياسين وقال بعصبية: كفاية .. كفاية.
 وصوت رصاصة من مسدس عزام كان بيدوي في المكان، وياسين
 اترمى في الأرض من غير ولا حركة، ومن بعدها صمت رهيبينيب.

ياسين شاف الدنيا سالكة، فتح وطلع بالراحة وقفل الباب وراه.
 د عصام فتح عينه وقام بص على ياسين من الشَّرَاعَة الزجاج
 وراح مكلم الحارس اللي كان واقف على أوضة ياسين - بس راح يدخل
 الحمام - ونبه عليه يتابع ياسين من بعيد لبعيد بدون ما يتعرضله ...
 ورن على رئيس حرس المستشفى - اللي واخذ تعليمات إنه ينفذ أي
 تعليمات ياخذها من د عصام - أكد عليه نفس الموضوع، وطلب منه
 بيعت أي ممرضة لياسين عشان تساعد، لحد ياسين ما خرج من
 المستشفى.

- أيوا يا صاوي، الممرضة إدت ياسين لبس وبعد ما دخل شوية
 عند مامته؛ خرج من المستشفى في عربية اسعاف، ووصيت أمن البوابة
 يعملوا مش واخدين بالهم، وانا ماشي وراهم أهو أنا والحارس اللي
 كان موجود.

- إليه اللي بيعمله ياسين ده، هو مش عارف ان فيه خطورة عليه.
- يا صاوي متقلقش؛ انا سيبته عشان أشوف هو عاوز يعمل إيه، وفي نفس الوقت انا وراه من غير ما يحس.
- طيب لو فيه حاجة بلغني أول بأول، هو تليفونه معاه؟
- آه بس تقريبا عامل شفرة عشان حاولت ارن عليه واعمل اني اتفاجئت بعدم وجوده في الأوضة؛ تليفونه مجمعش.
- مفيش مشكلة، أنا هتاج عشان لو عمل أي تليفون نعرف.
- إيه ده بيعمل إيه المجنون ده؟!!
- خير؟!!
- الواد نزل من العربية في نص الشارع وخدها جري في الجهة المعاكسة، انا كدة مش هلحقه، بص يا صاوي اقفل وهكلمك تاني.
- أول الإشارة ما فتحت د عصام ركن على جنب ونزل عشان يلحق ياسين، لكن ياسين كان اختفى، راح راكب العربية تاني وخد أول لفة ورجع يدور بالعربية الناحية الثانية من الطريق، وفي الأثناء دي الصاوي كان بيرن
- ياسين زاغ مني يا صاوي.
- متقلقش، هو بيكلم باباه دلوقتي، أنا بعثك اللوكيشن بتاعه.
- آه تمام انا رايح دلوقتي، بس انا مش مرتاح للموضوع ده.

- بالعكس، الي انت عملته ده عين العقل، خلينا نشوف هو مخبي إيه، ده غير إنه ممكن يوصلنا لعزام، انا هخلي قوة جاهزة لأي تحرك.

- طيب بقولك إيه، ابعثلي حد دلوقتي يكون معايا برضو احتياطي، وابعت معاهم الدرون.

- من غير ماتقول، انا بالفعل بعثك فريق، ربعاية وهتلاقهم عندك.

وبالفعل عصام قابل الفريق بعيد عن نظر ياسين،

عصام قال لقائد الفريق: عملت إيه؟

قائد الفريق: الراجل بتاعنا عمل نفسه بيشتت والحمد لله قدر

يزرع المايك على هدوم ياسين.

عصام: تمام جدًا، كدة الي معاه جهاز استقبال الصوت يركب

معايا، وانت والباقيين ورانا، بس خلي الدرون يلقط إشارة موبايل

ياسين عشان يتتبعه، واحنا نتابع الدرون من بعيد.

القائد: تمام يا فندم.

اتحركت العربيات وراحوا عند محل البلاي ستيشن بتاع حسن

صاحب ياسين، وكانوا عاملين حسابهم في فرقة من ضمنها قناص

تكون مستتية هناك، تحسبا لظهور عزام أو حد من رجالته، وبالفعل

إكتشفوا ان رجالة عزام موجودين مع الولاد جوا.

عصام بلهفة قال من على اللاسلكي: إيه الوضع يا حضرة

الظابط؟

الظابط: متقلقش يا فندم، الهدف واضح قدامي، وأي حركة من رجالة عزام هصفيهم في ساعتها ورجالتنا هتقتحم المكان.
عصام: طيب لو مفيش إقدام على غدر من الهدف؛ يبقى الوضع على ما هو عليه، عزام لو كان عايز يخلص منه؛ كانت الفرصة قدامه من بدري.

وفضل يسمع الحديث اللي داير بين ياسين وعزام وحسن، لحد لحظة خروج رجالة عزام بصحبة ياسين.
عصام عبر اللاسلكي: جهز الدرون انه يلقط إشارة موبايل أي حد من رجالة عزام؛ لأنهم في الغالب هيتخلصوا من تليفون ياسين.
الظابط: عُلم وينفذ يا فندم.

عصام طلع تليفونه: يا صاوي القوة وصلت فين؟
الصاوي: بينهم وبينكم عشر دقائق.
عصام: انت سمعت اللي دار؟
الصاوي: آه والقوة اللي بعتهالك كبيرة عشان لو حصل أي اشتباك، المهم؛ إحنا عايزين عزام حي يا عصام ... بقدر الإمكان.
عصام ابتسم وقال: بقدر الإمكان.

فضل الدرون متابع العربية بتاعة رجالة عزام - من ارتفاع عالي بحيث ميتكشفش - لحد ما وصلت قبلا متطرفة في طريق مصر اسكندرية الصحراوي.

عشر دقائق وكانت القوات كلها متجمعة، وبناءً على مسح المكان
اللي عمله الدرون؛ كانوا راسمين خطة الاقتحام وحطوها موضع
التنفيذ.

واحد من الضباط قال لعصام بقلق: يا فندم ياسين شكله فقد
أعصابه وعزام كمان على وشك.

عصام اللي سامع ياسين عمال يزعق وبيقول "قل لن يصيبنا إلا
ما كتب الله لنا" وحس ان عزام هيفقد أعصابه فعلاً ... وبالفعل
سمعوا صوت رصاصة بتضرب جوا، وصوت جسم وقع على الأرض.
عصام قال بلهفة من على اللاسلكي: كل القوات تقتحم حالاً.

عزام واقف بياخد نَفْسُهُ عشان يهدى ... ياسين منبطح على
الأرض ... وفجأة باب البدروم اتكسر ودخلت القوات وضرب
الرصاص في الهوا منهم اشتغل، وفي ساعتها عزام فضل يصرخ زي
المجنون: محدش يضرب، محدش يضرب.

ورمى المسدس بعيد وراح نازل على الأرض ونام على بطنه.
عصام: هو فيه إيه بالضبط؟! كل ما ندخل على حد منكم يفضل
يصوت؟ اللي يشفكم في التليفزيون ويسمعكم بتتكلّموا على "السيوف
الحديدية" والاجتياح البري وانتوا عاملين رجالة؛ ميشفكمش دلوقتي
وانتو زي النتي.

وميل على ياسين ومدله إيده يقومه وابتسم في وشه وقال: قوم يا
بطل.

ياسين قام وبص حواليه، وراح ناطط في حزن عصام وفضل
بيكي بشدة ويقول: الحمد لله، الحمد لله.

عصام داس جامد وهو بيحزن ياسين، وحس بفرحة من رد
فعل ياسين، يمكن عشان عصام معندوش عيال، أو لأن ياسين ابن
حب عمره، ولا يمكن فرحة ياسين اتنقلت ليه، المهم انه إحساس جديد
على عصام.

عصام مسك راس ياسين بإيديه الاتنين وقال وهو بيغمزله: قل
لن يصيبنا إلا ما كتب الله لنا.

ياسين ابتسم وعينه دمعت تاني.

عزام وهو نايم على بطنه وإيده ورا ظهره متكبشة بيصرخ:
مش وقت أحضان دلوقتي؛ أبوس إيديكم لازم نخرج من هنا حالياً،
المكان هينفجر بعد أقل من دقيقة.

الضابط بقلق: وايه اللي هيخليه ينفجر؟!

عزام بمنتهى الرعب: عشان المكان هنا متلغم، وفي حالة وقوعه
في إيدين السلطات المصرية، بيتم تشغيل التدمير الذاتي عن بعد، ولو
مش مصدقني؛ واحدة من القنابل موجوده عند العمود اللي هناك ده.
واحد من عناصر الأمن راح بص وقال بقلق: كلامه صح يا فندم.
عصام بتوتر في اللاسلكي: كله يخلي المكان بسرعة.

ياسين بص لعصام وابتسم ابتسامة حزينة، أصله عارف إنه
مش هيلحق يخرج، ومش هيلحق يجرب الجهاز.

عصام شاف اليأس في عين ياسين وقال: إجري يا ياسين هنلحق
ان شاء الله.
لكن ياسين جري على جهاز الكمبيوتر الي كان فاتح عليه عزام
البرنامج، مسك الخوذة ولبسها وداس على زرار البدء ... وكل حاجة
حوالين ياسين اختفت.

أبيض في أبيض

- ألو ... أيوة يا لينا ... إصحي وإبسي حالا.
- فيه إيه بس يا سارة ... الساعة قربت على أربعة الفجر.
- يا بنتي عايزنا دلوقتي حالا، وأحمد لسة قافل معايا وبيقول ان محمود مستنينا في عربية تحت.
- سارة انتي بتعيطي!؟
- شكل فيه مصيبة يا لينا ومحدث قايلنا.
- مصيبة إيه بس ربنا يستر؟
- أحمد بيقولي عمو محمد الصاوي كلم محمود وطلب منه نتجمع كلنا ونروحله، ولما محمود سأله، قاللو بخصوص ياسين، وكان صوته متضايق عالآخر.
- طيب انا هقول لبابا وهلبس وانزل على طول.
- تمام؛ نتقابل في اللوبي.

أحمد بقلق: هما هيفضلوا سايبنا هنا كتير؛ الساعة بقت سبعة.
محمود: والله يابني ماعرف حاجة المرادي، زيي زيكم.
د عصام دخل الأوضة ومعاها العقيد الصاوي والد محمود، الولاد كلهم باصينلهم وعينهم كلها تساؤلات وقلق.

د عصام: يا ولاد انا هدخل في الموضوع على طول ومش هخبي عليكم؛ في الساعات الأخيرة من امبارح، ياسين اتخطف، لكن احنا كنا على علم بده ووصلنا في الوقت المناسب، المشكلة اننا بعد ما قبضنا على عزام؛ فضل يصرخ ويقول ان المكان هينفجر خلال ثواني، من النظرة اللي شفتها على وش ياسين أعتقد إنه حسبها لقي إنه مش هيلحق يخرج من المكان حي، ولذلك جري قعد على كرسي ولبس الخوذة وفجأة؛ ياسين دخل في حالة غريبة، لا هي إغماء ولا هي صحيان.

أحمد: أيوة دي المفروض الحالة اللي الجهاز بيدخلك فيها.

د عصام: المهم، كلنا اتشاهدنا وقولنا خلاص المكان هينفجر؛ اللي جري، واللي حط راسه وسط دراعاته وقرفص على الأرض، دقيقة في الثانية محصلش حاجة، وفي الآخر نكتشف ان عزام لما كان عايز يسرق المشروع وينسبه لنفسه؛ راح فاصل النت عن المنشأة كلها لحسن البرنامج يتعمله تحميل أوتوماتيك على الكلاود، وبالتالي الكاميرات وكل أدوات إتصالحهم بالخارج مكانتش شغالة، يعني لولا طمع عزام؛ كان زماننا في خبر كان.

عقيد الصاوي: وطبعًا والله الحمد قدرنا نكشف أماكن كل المتفجرات وأبطلنا مفعولها.

د عصام: المشكلة اني لما روحت ولاقيت ياسين في الحالة دي؛ قولت أصحيه عشان أبشره ان احنا نجحنا، كان فيه زرار في البرنامج مكتوب عليه wake me up روحت دايس عليه واداني safe to remove helmet، شيلت الخوذة بالفعل، وأول ما ده حصل؛ لقيت

ياسين وقع في الأرض وفضل يتنفض زي الي عنده نوبة صرع وحاجات غريبة نزلت من بقه، رocht مرجع الخوذة تاني على راسه؛ لقيته هدي.

أحمد: كان المفروض يقوم عادي! طيب مفيش أي رسايل طلعت على الشاشة؟

د عصام: ولا أي حاجة، إضطريت انقله بالجهاز وده لوحده كان حوار عشان أجيبله مصدر كهربية متنقل لحد ما وصلنا هنا.

محمود: طيب وياسين حالته إيه دلوقتي؟
الصاوي: إحنا عملنا أوضة طبية مجهزة بالكامل هنا، ووصلنا له محاليل واسترة وكل اللازم.

سارة: طيب إحنا لازم نشوف البرنامج ماله.
الصاوي: عشان كدة إحنا جبناكم هنا، لازم نلاقي العطل فين وإلا ياسين حياته هتكون في خطر.

ياسين فتح عينه شاف الدنيا أبيض في أبيض، بص حواليه مش شايف غير الأبيض، آخر حاجة هو فاكرها القنبلة الي كانت هتتفجر، وفجأة لقي إيد بتتمد من وراه وصاحبها بيقول: قوم يا بطل.
ياسين اتخض وبص يشوف مين ده والمفاجأة خلته يتسمر مكانه وعينه برّقت وفتح بقه.

- إيه يا عم انت شوفت شبح ولا إيه؟

- إز زاي ده! إنت إيه؟

- أنا ياسين.
- ياسين ازاي!! أنا ياسين.
- طيب إيه المشكلة، مانا عارف إنك ياسين، إهدى بس وانا هفهمك كل حاجة، أنا وانت نفس الشخص بس من عالمين مختلفين.
- إيه الجو الفاكس ده، أظن هتقولي كون موازي؟
- مفيش حاجة اسمها كون موازي.
- آمال إيه؟ عالم أرواح وكدة؟
- برضو لاء، الموضوع بمنتهى البساطة، لو جبت قلم وحطيته فوق ورقة؛ مش هياخد حيز من الورقة دي؟
- تمام.
- أهو انت القلم وانا الحيز، لو انت مش موجود أنا مش هبقى موجود، بس الفرق بين الواقع والمثال ده؛ إن احنا الإثنين موجودين وكل واحد فينا مرتبط بالتاني، لكن كل واحد فينا بيتحرك بحرية.
- طيب انا جيت هنا زاي؟
- الخوذة طبعًا.
- إيه ده انت تعرف عن الموضوع ده؟!
- ده الفرق التاني؛ أنا أعرف كل حاجة عنك، لكن انت متعرفش عني أي حاجة، غير اللي بتفتكره بس لما بتقوم من نومك.
- ياسين فكر شوية وقال: بس تمام انت كدة، أنا فهمت كل حاجة، أنا بكلم مخي؛ ومخي فاكر إنه شخص.

- إيه هو ده، فين مخك اللي بتكلمه؟!
- بص يا معلم "مخي" ركز معايا أبوس إيدك، شوف انت عاوز تتخيل نفسك إيه وعيش، أنا طول عمري بحب مخي يكون خياله واسع.
- آآآه ده طلع عبيط.
- ولاااا، بلاش هلفطة في الكلام "إيه اللي انا بعمله ده! يعني انا بتخيل وكمان بتخانق مع اللي بتخيله، ما برضو هو اللي غلطان، ليه يشتم" ههههههههه، أنا اتجننت رسمي.
- طيب مش كفاية كدة وندخل على المهم.
- مفيش حد بيتكلم ... أنا بتخيل ... أنا بتخيل.
- إنت جاي هنا ليه؟
- أنا مش هرد عليك، انت بتكلم إيدي على فكرة.
- طيب يا "إيده" بما ان انا خيال؛ ياترى لو لويتك كده؛ مش هتتلوي ومش هتحسي؟
- وفي حركة فجائية ياسين لوى إيد ياسين اللي فضل يصرخ ويقول: خلاص خلاص انت بجد انت بجد... آآآآآه.. إيه الغباوة دي ياعم.
- نتكلم جد بقى؟
- قول يا حبيب قلبي أنا سامعك.
- قال الجملة دي وفجأة وقع على الأرض ودخل في حالة تشنج وفضل يتلوى في الأرض لحد ما أغمى عليه.

ياسين صحي من النوم بص حواليه شاف د عصام نايم على كرسي، الدنيا رايقة في المستشفى، فضل ياسين باصص للسقف عمال بييفكر... وفجأة إنتبه وقام قعد في حركة فجائية لدرجة ان الدكتور عصام قام مخضوض: فيه إيه يا ياسين!!؟

ياسين مش فاهم حاجة وقال: هو إيه اللي حصل؟ أنا فين؟
د عصام: انت في غيبوبة بقالك يومين.

باب الأوضة انفتح عليهم فجأة، أمل دخلت بسرعة وقالت:
ياسين! انت لازم تخرج من هنا حالياً؛ عزام هنا ويبدور عليك عشان يقتلك.

ياسين بص علي د عصام؛ ملقهوش، طلع من الباب وجري لقي عزام في وشه، لف وجري الناحية الثانية لكنه حاسس ان فيه حاجة مربوطة في رجله مخلياه بطيء، عزام طلع المسدس وضرب لكن أمل نطت وخذت الرصاصة مكانه، فجأة ياسين شاف باب على جنب؛ فتحه بسرعة ودخل، لقي نفسه في الأوضة بتاعة مامته في المستشفى، الأوضة منورة بنور الشمس، نادية كانت قاعدة عالسرير بتقرأ قرآن، ياسين جري عليها وقال: ماما حبيبتي وحشتيني، الحمد لله انك فوقتي.

وفضل يبوس في إيديها وهي حاطة إيدها على راسه وبتحرك صوابعها من خلال شعره رايح جاي وقالت: مالك يا حبيبي تايه ليه؟
أنا قاعدة مستنيك من بدري.

ياسين بصلها والدموع مليا عينيه،
نادية كملت: فاكرا يا ياسين زماان لما سألتني على الصور؟
ساعتها لما حكيتك انت قولت انك لما تكبر هتنقذهم؛ آدي الفرصة
جتك، هما دلوقتي فعلاً محتاجنك، وافتكرا "عدوك الحقيقي؛ مش
الي انت شايفه".

وابتدت تتعدل على السرير وخذت وضع النوم.

ياسين: هتنامي يا حبيبتني؟

نادية: انا مستنياك من بدري وخايفة انام ملحقكش، بس الحمد
لله انت متأخرتش.

ياسين باس إيد أمه وغطاها، ومن حوالها ظهر ضباب كثيف
بلعها جواه لحد ما اختفت ... الدنيا بقت ليل فجأة والإضاءة خافتة،
طلع البلكونة لقي العربيات تحت رايحة جاية ومن بعيد كريم جاي
مشي وبينده على ياسين، ياسين انتابته موجة فرح وغضب في نفس
الوقت. ياسين لقي نفسه في الشارع وخذ كريم بالحضن وبعدين راح
ضاربه بوكس في وشه، كريم شاف الهارد في إيد ياسين حاول يشده
منه ونزلوا في بعض هما الاتنين ضرب لحد كريم ما قدر انه ياخذ
الهارد وجري وياسين وراه، دخلوا عمارة هما الاتنين، وكريم اختفى.
دخل ياسين شقة ضلمة جواها نور شمعة، ومامة كريم قاعدة
لابسة اسود وعمالة تعيط،

فضل ياسين يحاول يواسيها، بس هي مكانتش شايفاه ولا سمعاه، وقف ياسين عشان يمشي وبيلف لقي كريم واقف في وشه ودماغه منفجرة، ياسين اتخض ووقع على الأرض.

كريم: الهارد أهو يا صاحبي، بس مين عمل فيا كدة؟! وليه؟!
ياسين وقف وحط إيده على كتفه وقال وهو بيعيط: حقك هيرجعك وانا مسامحك يا كريم.

كريم بصله بامتنان وحط جسمه على السرير، وحوالين السرير ظهر ضباب غريب، ياسين كان عاوز يقوله حاجة بسرعة، جري على كريم وحط إيده على صدره وهو بيصرخ وبيقول: منتقش في عزام يا كريم، "عزام خاين".

لكن السرير بكريم إختفوا تمامًا.

قعد ياسين على كرسي وفضل يفكر "مين العدو الحقيقي؟" وبص في المرآة شاف واحدة زي القمر قاعده على الكنبة ورا، ركن التاكسي ونزل منه معاها ودخلوا الأوضة و.....(مشهد محذوف).

ياسين متدايق جدًا من نفسه، بسبب اللي عمله، شاف سارة جاية عليه والغضب واضح على ملامحها، ياسين مكسوف ومش عارف يودي وشه منها فين، سارة مشيت وياسين مشي وراها وقال: يا سارة أرجوكي خليكي معايا، أنا محتاجك.

لكن سارة مردتش عليه ونامت على سريرها، ونفس الضباب
ظهر برضو، ياسين جري على سارة وفضل يقول: يا سارة
متسيبييييييييش.

لكن الضباب بلع السرير بسارة، بص وراه لقي أصحابه قاعدين
كلهم ماعدا سارة في البرجولة بيذاكروا،
ياسين: إيه يعني محدش فيكم قاللي انكم هتقعوا هنا؟
الكل ساكت، ياسين قال بدهشة: محدش بيرد عليا ليه؟
كلهم بصوا لبعض وبصوله وراحوا ماشيين وسايبينه،
ياسين: يا جدعان طيب انا عملتكم ايه؟ متمشوش وتسيبوني
كدة، مبحبش أكون لوحدي، مش عايز أكون لوحدي.
وقعد على الأرض وفضل يبكي.

- إيه الأخبار يا جدعان؟ فيه جديد؟
أحمد: والله لسة يا محمود أدينا بنراجع كل الأكواد، بس المشكلة
ان حاجات كتير كان ياسين هو اللي مكوّدها بنفسه، انا يا دوب كنت
بساعد ... يارب افتكر اللي هو كان عامله.
سارة: أنا صعبان عليا قوي طنط؛ سبحان الله تفوق بعد ياسين
ما يدخل في الغيبوبة بساعة.
لينا: من ساعتها مش بتتحرك من الأوضة عنده وعماله تقراله
قرآن.

سارة وعينيها شبه مدمعة: ربنا يقومه بالسلامة.

- بالظبط كدة.
- طيب انا ايه اللي بيحصلي دلوقتي في العالم بتاعي؟
- للأسف معرفتي بالعالم بتاعك انتهت لحد ما انت دخلت هنا،
واللي بعد كدة انا معنديش بيه أي علم.
- طيب واللي حصلي وانا بحلم؟ واصحابي اللي مكانوش
راضين يكلموني؟
- بص يا ياسين؛ العالم بتاعنا حقيقي زي العالم بتاعكم
بالظبط، يعني مش زي ما انتم متخيلين؛ إنه مجرد أحداث وهمية
مخك بيصورها لك، وبرضو مش زي نظريتك؛ انك تدخل تتفرج على
حياتك أو اننا دلوقتي قاعدين جوا عقلك الباطن؛ إنما عقلك هو الرابط
ما بين العالمين.
- معنى كلامك ده ان انا عقل ياسين ومحبوس هنا؟
- الله ينور عليك، ولما ياسين بيدخل في حلم؛ انا وانت بنتحد،
لأن انا تذكرتك للعالم بتاعي.
- ياسين "أو عقل ياسين" سكت شوية وهو مذهول بالي سمعه
واستنتجه.
- طيب ممكن تحكي لي عن العالم بتاعك؟
- لازم طبعاً احكيك؛ بس أرجوك متحاولش تستخدم وش
الاستغراب عالي هقوله؛ عشان اللي هقوله كثير وغريب.
- هو بعد اللي انا فيه دلوقتي وفكرة اني بكلم نفسي اللي هي
"انت"؛ أعتقد اني عدت مرحلة الاستغراب.

- تمام ... العالم بتاعي مفيهوش حدود، ممكن تعمل فيه أي حاجة، ممكن تقابل ناس وتكلم ناس وتؤثر عليهم كمان.
- طيب ممكن اتصل بالعالم الخارجي؟
- بيحصل، بس اللي انت هتحاول تتواصل معاه مش هيفهمك، لأن احنا سير الزمن عندنا مختلف عن عندكم، الاتنين نوعًا ما عكس بعض، زي بالظبط لما انت حاولت تكلم كريم وسارة قبل ما يختفوا في الضباب.
- ممم، طيب ممكن نساfer في الزمن؟
- هنا مفيش الزمن بالمعنى المفهوم عندكم، لكن هنا تقدر تقابل أي حد من أي زمن "بالنسبالك"، وتقدر تتكلم معاه كمان، بس بشرط، ان الحد ده يكون من الماضي بتاعك.
- حتى لو كان ميت؟!!
- هو مات عندكم، لكن النسخ بتاعته الي نتجت عن كل حلم هو حلمه هتفضل موجودة هنا.
- أي حد أي حد؟!!
- فيه أشخاص مينفعش تحاول تشوفهم، إلا لو هما عايزين يوصلوك، زي الأنبياء مثلاً.
- إيه ده؟ انتوا عندكم مؤمنين وكده.
- انت اهبل يلا؟ هو مش ربنا خالق كل شيء، وخلي بالك لو..
- وفجأة ياسين "عقل ياسين" وقع في الأرض وفضل يتشنج لحد ما أغم عليه تاني.

شنة المياه

عصام: يا نادية لازم تروحي ترتاحي شوية، بقالك يومين هنا.
نادية: إبنى يا عصام بيضيع منى ومحدث عارف يخرج من
اللي هو فيه.

عصام: الولاد شغالين على قدمٍ وساق ومش ساكتين، المشكلة
كلها ان الأكواد بتاعة البرنامج حصل فيها مشكلة وأحمد بيصلحها
كلها من أول وجديد، عشان كدة الموضوع هياخد شوية وقت.

نادية ودموعها مش مبطة: ربنا يرجعك ليا يا ياسين بالسلامة.
الولاد من ورا الزجاج شايفين د عصام ود نادية.
محمود باهتمام: يا جدعان! تفتكروا الموضوع يكون نجح
وياسين دلوقتي عمال رايح جاي في الزمن؟

سارة بغضب وصوت واطي: ده وقته يا محمود!
أحمد: على فكرة المؤشرات اللي بيقرأها الكمبيوتر من الخوذة
بتقول ان فيه حاجة بتحصل.

لينا: بس بسبب الأكواد البايطة؛ المعلومات كلها مشفرة؟
سارة: في داهية المعلومات والمشروع.
وراحت باصة على ياسين من الإزاز وحطت إيديها عليه وقالت
وهي مدعمة: المهم ياسين يقوم بالسلامة.

لينا حطت إيديها على كتف سارة وقالت: إن شاء الله هيقوم
بالسلامة، متقلقيش كلها مسألة وقت.

ياسين فاق وشاف نفسه متعلق بإيده على حافة جبل طويييل،
وتحت خالص أرض صخرية، ياسين فضل يصرخ وحاول يطلع مرة
واتنين مش قادر، بص على رجله لقاها مربوطة بحجارة هي اللي
منقلاه، بص بعينه فوق شاف أبوه واقف، بس عامل مش شافه،
ياسين فضل ينده عليه: بابا! بابا! إلحقني يا بابا.

لكن صبري بصله وقاله: أنا مش بيعتلك فلوس؟ مجبتش بيها
حبل ليه للظروف اللي زي دي؟

ياسين اتصدم من الرد، وإيده فلتت ووقع.. فجأة؛ فيه إيد
اتمدتله ولحقتة، فرح وافتكر أبوه اللي انقذه؛ لكنه مكانش أبوه، ده
كان الرئيس الراحل أنور السادات.

ياسين: سيادة الرئيس، أ..أ.أنا متشكر جدا يا فندم.

رد السادات بنبرة صوته المعروفة بالحزم والقوة: ده واجبي يا
ياسين إنني أحملك انت واللي زيك، المهم دلوقتي إنت لازم تؤدي مهمتك.
ياسين باستغراب: مهمة إيه يا ريس؟!

السادات: لازم تجمعهم كلهم عشان تعرف الحقيقة، حلقات
كلها شاردة، محتاجة الي يربطها، وانت حلقة الوصل يا ياسين.

ياسين: طيب ابتدي منين؟

السادات: مش مهم البداية؛ المهم هتنتهي على إيه، وهما نهايتين
مالهمش تالت، المهم؛ لازم تفتكر ... ومتخليهوش يضحك عليك
وينسِّك.

ياسين سمع حد بينده عليه من وراه، لف يشوف مين؛ ملقاش
حد، رجع بص قدامه؛ السادات كان اختفى، لكن الصور حواليه كتير
في البرايز بتاعتها ... متعلقة على الحيطه في البيت عند ياسين، ياسين
افتكر، لازم يوصل لأصحاب الصور، عشان يعرف الحقيقه، هو عارف
هيبتدي بمين ... وعند باب الأوضة بتاعته صوت جميل بينادي عليه
بمنتهى الرِّقّة: ياسيييييييين!

بص ياسين وقال: سارة! إحنا محتاجين نوصل ل...

سارة بصوت ناعم: ياسين انت وحشتني قوي.

ياسين حس بفرحة غريبة ونسي هو كان عايز يقول إيه لما شافها
فاردة ذراعاتها وبتندهله، ياسين فضل يقرب منها و...التليفون بيرن
... ياسين مش سامع ... تليفون تاني رن ... ياسين لسه بيقرب من
سارة ... خمس تليفونات من تليفونات الخمسينات رنوا ... ياسين
انزعج من صوتهم وبص شاف تليفون منهم قدامه.

ياسين بغضب: ألو!

- ركز في اللي انت جاي عشانه، وخلي بالك؛ هو هنا.

وصوت رصاصه دوى في التليفون والغريبة إنه سمع الصوت
جاي من الصالون برا، ياسين حط إيداه على صدره، أصله فيه ألم ...

- كويس انك عرفت توصل.
- يا دكتور زويل انا مش عارف اعمل ايه، وكل ما أوصل لحاجة؛ بتتسد في وشي، والجماعة هنا كل كلامهم أَلغاز وحكم مع ان الدنيا سهلة.
- الدنيا عمرها ما كانت سهلة يا ياسين، ولو المعلومة جتلك من غير تعب عمرها ما هتثبت، وعموما هو مش هيقدر يبجي هنا.
- مين هو؟!
- مش مهم مين؟ المهم هو عايز إيه.
- ياسين فضل يضرب كف على كف
- لا حول ولا قوة إلا بالله، حتى حضرتك يا دكتور، مفيش حد عاوز يريحني.
- متزعلش انا هديك المفيد، شايف الشنطة دي؟
- مالها يعني؟ دي ليا؟
- هي ليك ومش ليك، أهم حاجة خليها على ظهرك، ولما تتعب من الجري ورا السراب، هتكتشف ان الشنطة فيها الي انت محتاجه؛ والي هيغير حياتك كلها.
- لسة ياسين هيكمل أسئلة ... هوب الكهريا قطعت ثواني، الدنيا ضلمة كحل ... رجعت الكهريا ... ولقى ياسين نفسه في المكان الأبيض في أبيض تاني ... بس المرادي لما رجع؛ شاف ياسين مرمي على الأرض ... ومش بيتحرك.

اللحمة البيضاء واللايسير الأحمر

- ها يا عصام؛ مفيش جديد؟
- والله يا صاوي الولاد كل ما بيخلصوا أي تعديلات بيدخلوها على الجهاز على طول، وربنا يسهلها.
- طيب والحالة بتاعة ياسين؟
- ياسين كل شوية يدخل في حالة من الإثارة وده بيظهر على نشاط المخ الزيادة وبعدين ترجع تقفل تاني.
- طيب وده إيه سببه؟
- أحمد بيقول انها لما بتعل يبقى كدة ياسين بيحلم ولما بتقل يبقى هو كدة بطل يحلم.
- باب المكتب اللي د عصام والعقيد الصاوي قاعدين فيه خبّط.
- الصاوي: تعالى يا أحمد، إيه الأخبار؟
- أحمد: والله يا فندم ياسين حالته الصحية مستقرة، بس الفكرة ان البرنامج بيطلع قرائات وقيم حسابية بتدل إن الجهاز غالبًا شغال.
- عصام: ده خبر رائع، طيب مالك مكتتب ليه؟
- أحمد: ياسين الوحيد اللي يقدر يفك شفرة القرائات دي.
- الصاوي: مفيش أمل انك تقدر تترجم الكلام ده؟
- أحمد: من الآخر كدة ياسين لازم يقوم بالسلامة عشان نعرف ونحكم.

- ياسين! مالك يا ياسين؟!
- مالك يا عم انا كويس؛ متقلقش احنا هنا متعودين على كدة،
وبعدين صدقني مع نهاية حديثنا ده هتلاقيني رجعت سليم تاني.
- متعود ان صدرك يتخرم اشطة يعني؟! وبعدين ثانية
واحدة؛ ازاي انت حصلك حاجة محصلتليش؟!
- هههه... مين قالك انها محصلتلكش، انت بس مش فاكر
الحلم ده.
- يابني احنا مش بنكون مندمجين أو انت لابسني ولا أياً كان
المسمى إيه؟
- فعلاً، بس هنا مفيش زمن، يعني هتلاقي حاجات بتحصل
في نفس وقت حاجات ثانية أو بترتيب مختلف، بالرغم انهم في العالم
بتاعك محصولوش مع بعض أو ترتيبهم كان مختلف، وممكن كمان
يكون الفرق بينهم وقت طويل.
- يعني ممكن نكون انا وانت في أكثر من حلم في نفس الوقت؟!
- لو اعتبرنا ان فيه هنا وقت؛ يبقى كلامك صح.
- طيب ولو اتقابلنا؛ هنعمل قفلة والحلم يبوظ؟ ولا هتجنن أو
هيحصلني أي مصيبة؟

- يا عم فكك من شغل الأفلام اللي عندكم ده، هنا عادي ممكن الأحلام تتداخل وممكن يحصل مقابلة عادي، بس الفكرة ان في الغالب عمركم ما هتعرفوا ان انتوا قابلتوا نفسكم.

- ليه بقاااا؟

- هنا الوقت مختلف عن عندكم، فرق التوقيت ده عقل ياسين "الي هو انت" بيترجم وجود الآخر على إنه شخص مختلف، بمعنى؛ لو انت في حلم وشوفت نفسك من حلم تاني كل واحد فيكم هيشوف الثاني على إنه شخص غير ياسين، إلا لو حد فيكم استنتج إن الثاني ياسين.

- تمااااااام، طيب وانت بتعرف؟

- طبعًا، أمال انا كلمتك ازاى وحذرتك.

- انت الي كلمتني في التليفون؟

- انا خليتك انت الي تكلم نفسك من حلم تاني، بص بقولك

إيه؛ سيبك من ده كله أنا اللي بظبطه مش انت وركز معايا ... ياسين

انت أول واحد يبجي هنا، والخبر بدأ ينتشر، كل الي عليك دلوقتي انك

تجمع الناس وتاخذ منهم اللي عايزين يدوهوك.

- قصدك زي الشنطة اللي كان هيديهالي د زويل؟

- الله ينور عليك، لكن هو بالفعل ادهالك.

- محصلش، فين هي؟ مش معايا.

- حصل بس مش في الحلم الي انت كنت فيه، إنما في حلم ثاني،
أمال انت فاكر انك رجعت كلية العلوم وحالك اتشقلب واللي كنت
حاسس انه طلاس بقى سهل ازاي؟
ياسين افكر وقال ببطاء: لما شربت من المياه الي كانت في
الشنطة.

- بالظبط.

- طيب انت ازاي مضروب رصاصة وعاش؟!!

- النسخة الي اتضربت بالرصاصه ماتت وده الي بيخليك
تصحى من النوم على طول في أي حلم انت بتضرب فيه ضربة موت
... كل الفكرة بس ان بيحصلي إعادة بناء على حساب نسخة تانية ...
وبعدين احنا مش اتفقنا انك مش هتستغرب ثاني؟

- معاك حق، مش هيتكرر ثاني سعادتك.

- ماشي فخامتك ... المهم؛ لازم تبقى عارف هتعمل إيه، وكل
ما هتقرب؛ كل ما حاجات هتحصل عشان تشتتك، لازم تبعد عن
الحاجات دي وتكمل يا ياسين، لأنه هيحاول بقدر الإمكان يمنعك،
وأديك شفت هو عمل إيه.

وشاور على الجرح الي كان موجود في صدره واللي قفل ورجع
سليم ثاني.

لسة ياسين هيسأل هو يقصد مين بكلامه؛ كانت التشنجات
رجعت ثاني و... الحلم بدأ.

ياسين واقف في المطار ... الدنيا زحمة ... ومن بعيد شايف د
عصام وباقي الشلة واقفين مع شخص غريب ... ياسين حاسس إنه
فاكر الموقف ده ... يا ترى مين الشخص ده؟ الشخص ده سلم على
اللي كانوا معاه .. وطلع السلم وبص على ياسين بريبة، لكن ياسين
كان باصمله بابتسامة لأنه حس إن الشخص ده ممكن يكون ياسين
بس من حلم تاني .. وكمل مشي.

ياسين سمع صوت من وراه بيقول "أخيرا لقيتك" ... اتلفت
ياسين وراه؛ شاف عزام وماسك في إيده سكيانة ... بدون تفكير وفي
حركة فجائية؛ ياسين زاح عزام وجري لحد ما لقي نفسه فوق كوبري
روض الفرج ... الدنيا نهار والكوبري مش زحمة والعريبات ماشية
بسرعة على الجنبيين.

- مالك يابني خايف من ايه؟

راجل كبير بلحية بيضاء واقف بيضطرب على ياسين.

- في شخص عاوز يؤذيني يا حاج وبحاول اهرب منه.

- يابني وانت مين قالك انه عاوز يؤذيك؟ مش يمكن يكون

عاوزك في خير؟

- اللي زي ده عمر ماييجي خير من وراه يا حاج.

- طيب ولو قولتلك ان انا اللي جايبك الخير كله؟

- انت شكلك راجل كويس يا حاج بس انا معرفكش، وبعدين

خير ايه اللي انت جايبهولي؟!

- إيه رأيك في علم البشرية كلها موصلتلوش؟

ياسين عينه لمعت وقال: علم إيه ده؟!

- علم هيخليك أقوى واحد، وأذكى واحد، الناس حواليك تقدر تتحكم فيهم وفي مصايرهم؛ علم هيخليك عايش للأبد ولا بتمرض ولا بتتعب ولا بتعجز، علم هيخليك تشوف المستقبل، وفي الآخر؛ أنا ليك ناصح أمين.

ياسين مبهور باللي بيسمعه وسرحان فيه

الراجل كمل: كل الي عليك تشرب الإزازه دي.

وطلع إزازه صغيرة فيها سائل أحمر بيلمع أكنه مولع، ياسين مد إيداه اخدها ... فجأة لقي د يحيى المشد نط على الشيخ ووقعوا هما الاتنين على الطريق ... وشاب غريب دخل الخناقة وكتّف الشيخ ... وعربية نقل دهستهم هما التلاتة.

ياسين فضل متمسر مكانه مش فاهم إيه الي حصل وبعدين بص للإزازه في إيداه وسرح ... مخرجوش من الي هو فيه غير الطيارة الي كانت بتقع من السماء في منظر مهيب ... ياسين جري وسط الزرع والظلام الحالك لحد ما وصل لحطام الطيارة والنار المولعه فيها هي الي منورة الدنيا حوالياها ... وقريب منه شاف الشخص الي شافه من شوية بيركب الطيارة واقع على الأرض؛ وراجل مميل عليه ماسكه من كتافه ويقول "متسافر شش" وسط ضباب كثافته فضلت تزيد لحد الشخص ما اختفى.

الراجل وقف وعدل وشه على ياسين وقال: جيت في وقتك.

ياسين: د يحيى! انت كويس؟

- اه كويس بس مفيش وقت، لازم تجتمع بالكل في أقرب وقت.
 - طيب وحضرتك هتكون معنا؟
 - للأسف ممكن ملحقش، عشان كدة انا جهزتلك إزازة المياه
 دي عشان رحلتك.

- طيب وليه مش هتكون موجود؟
 - ياسين! انا بقالي كتير بحاربه لوحدي، وللأسف خسرت نسخ
 كتير مني، ومش باقي دلوقتي غيري.

ياسين بص بعدم فهم، ويحيى حس بده.
 د يحيى كمل: الواحد طول ما هو عايش عندكم ويحلم؛ كل ما
 بيكوّن نسخ كتير ليه في العالم بتاعنا، والنسخة اللي بتموت ببيجي
 مكانها مع كل حلم جديد، لكن أول الواحد ما ويموت عندكم؛ مفيش
 نسخ جديدة بتتكون، وهو بيفضل وانا بيحاول يموت في النسخ
 الباقية بتاعتنا لحد ما نختفي من العالم ده كمان.

- مين هو ده اللي بيقتلكم؟!
 وفجأة ياسين شاف نصل سيف كبير طلع من صدر د يحيى، د
 يحيى عينه جحظت ودموعه نزلت ووقع على الأرض ... من وراه ظهر
 عزام بابتسامة خبيثة على وشه وعينه على إزازة المياه وقال: الإزازة دي
 تخصني.

ياسين في حركة تلقائية حط إيده على الإزازة الثانية اللي في جيبه
 ... عزام لاحظ ده وخطف الإزازة الأولى من ياسين وقال: طلع اللي في
 جيبك.

ياسين عمال يبص حواليه في يأس نفسه يلاقي حد ينقذه ...
عزام سحب السيف من ظهر جثة د يحيى ورفعاه على ياسين اللي
غمض عينه وانكمش في نفسه.

الاختبار

فضل ياسين مغمض عينه مفيش حاجة حصلت ... راح مفتح
عين وعين لأ، شاف نفسه في الشارع بتاع بيته، ومفيش لا عزام ولا
حطام طيارة... ياسين استغرب، لأن قبل عزام ما يضره؛ ده المكان
اللي جه على باله ... ياسين غمض عينه تاني وفكر في الكلية ... ولما
فتح لقى نفسه في المكان الأبيض في أبيض، وياسين قاعد قدامه
باصصله ومبتسم.

- إيه رأيك في القدرات الجديدة؟
- إيه ده! هو انا عندي قدرات وكدة؟
- طبعاً أنت فاكر نفسك زينا كدة عادي.
- امال موضوع التشنجات بين هنا والحلم إيه؟
- لا دي كانت حركة جربتها وبصراحة عجبتني، قولت أخليها
لحد ما انت تعرف اللي فيها هههههه.
- انت بتضحك! يا سخي.
- الله يسامحك، المهم، ناوي تعمل إيه في الإزاة اللي في جيبك؟
- انت شايف إيه؟
- مش مهم انا اشوف، المهم انت اللي تشوف.
- وياسين راح مفرقع صوابع إيده وكل حاجد اختفت.

ياسين في الشارع والدنيا ليل وهدومه عليها طين، البيوت كلها
مضلّمة ما عدا شقة في عمارة في الدور الأول والشباك بتاعها قاعد وراه
حد باصص على الشارع ... ياسين دخل العمارة وطلع ... دخل
الأوضة شاف الكل متجمعين.

د سمير نجيب قال بحماس: دلوقتي ممكن نبدأ.

د سميرة بلهفة: هنبداً بالدور؟

د مُشرفة بهدوء: من الأقدم للأحدث.

تليفون عمال بيرن ومش مبطل.

د سعيد بدير اللي قاعد جنب الشباك قال بتوتر لياسين: التليفون

ده ليك.

ياسين بعصية: ألو... بتقول إيه؟ ... عرف مكانا ازاى!! .. حالاً،

حالا.

وفجأة ... "بِ بِ بِ بِ"، صوت هبد على الباب، كل اللي في

الأوضة بصوا لبعض وبصوا لياسين؛ لقوه اختفى تحت الترابيزة،

الباب اتكسر ودخل منه الشيخ أبو لحية بيضة، وجلييته عليها دم

وإيده بتترعش ومش قادر يصلب طوله ... ياسين طلع من تحت

الترابيزة؛ جاب كرسي بسرعة وقعد الراجل عليه.

ياسين بقلق: مالك يا حاج ايه اللي حصل؟!

الكل سكت على زعيق ياسين ... ياسين بص لدكتور سمير وقال:
د يحيى مات، ومعادش موجود منه أي نسخة، وبعدين عايزه ليه؟

د سمير بحزن شديد: حبيبي يا يحيى يا اخويا، لو كان موجود
مكانش الراجل الي عامل فيها شيخ ده قدر يخدمك.

ياسين بص للشيخ ... ملقاش شيخ ... شاف راجل عادي جداً
قاعد عالكرسي ومبتسم في هدوء شديد، الراجل ده؛ هو نفس الراجل
الي كان واقف بيراقد ياسين برا الكافيه لما كانوا عاملين حفلة هو
واصحابه وأهلهم.

الراجل: فعلاً يحيى بح خلاص، وانتوا من وراه وده وعد مني،
لكن انت يا ياسين! تفتكر هعوز اخدك ليه؟ بالعكس؛ انا عيني عليك
من زمان، واخترتك لنفسى، حتى البرنامج؛ انا الي أقنعت حسن
صاحبك إنه يشغل الهارد على جهازه الي مليون فيروسات، وهوب
البرنامج الأكواد بتاعته ضربت، بس كل ده انا عملته عشان تفضل
معايا هنا لحد ما اقابلك ... انا عاوز اساعدك يا ياسين.

د سعيد بدير: متصدقوش يا ياسين ده ميهموش غير نفسه.

الراجل: بالعكس؛ انا صاحب مبدأ والإزاة الي معاك يا ياسين
دي هتحررك من كل القيود؛ المرض والفقر والزمن ... حتى الموت
نفسه، مش انتم؛ جايبنله أرايز عاوزين تشربوه علوم ذرة ونووي
واتصالات.

سميرة موسى: يا ياسين هو كدة عايزك تتحدى ربنا.

الراجل: ياسين! انت قدامك الأزايد شوف انت هتشرب إيه وهتسيب إيه، بس افكر انا عرضت عليك مُلك لا يزول.

ياسين فضل باصص للكل وللأزايد ... الاختيار صعب ... يعمل إيه ... في الآخر مسك الإزاة أم سائل أحمر ... فتحها ... الكل على أعصابه

ياسين: أنتوا وثقتوا فيا وهتدوني علم كبير عشان استخدمه في الخير، لكن ليه أجري ورا نقطة مياه لما النهر كله ممكن يبقى بتاعي.... وراح شارب السائل الأحمر كله.

سميرة صرخت وسعيد وسمير ومُشرفة؛ فيهم الي حط إيداه على راسه والي زعق وقال "لاااااا" والي سأل "هو يحيى المشد مجاش ليه؟"

أما الراجل الي رجع لشكل عزام تاني فضل يضحك ويضحك ويضحك.

ياسين حط إيداه على بطنه وبص لعزام وقال بصوت متألم: انت بتضحك ليه!!

عزام: بضحك عليكم، انا مش عارف هو فَصْلُكم عليا ليه، لكن كل يوم بثبتله انكم متستاهلوش.

د سمير نجيب: يحيى أول ما عرف انك جيت يا ياسين؛ قرر إنه يحاول يحميك مهما كان التمن.

د سعيد: انت أول واحد ييجي هنا يا ياسين، كنت أملنا ان اللي
متنا عشانه عندكم؛ هيعيش من خلاك.

د سميرة: طول الرحلة واحنا بنحذرك يا ياسين؛ متخليهوش
يضحك عليك.

عزام بتهكم: بس اللي يسمع ويعقل بقى، لكن خلاص انت
هتفوق وهتلاقي نفسك فاقد الذاكرة، ومخك ضارب، وأعضائك
هتنتهار، وساعتها المشروع بتاعك هيترمي في الزبالة، لحد ما ييجي
الوقت والشخص المناسب عشان استخدمه لصالحى أو بمعنى آخر
"ضدكم".

ياسين فضل يتوجع من بطنه لحد ما فجأة وقع على وشه
ومنطقش، وسط حزن شديد من الكل، واستغراب أشد من عزام.

"يا جدع!!!!!! ان البرنامج اتظبا!!!!!! ط" أحمد بمنتهى السعادة
كان بيزعق.

سارة ونادية ود عصام قاموا جري.

نادية: طمني يا احمد يابني.

أحمد: اتطمني يا طنط، الحمد لله لقيت فيروس غريب كان هو
الي عامل كل ده، والحمد لله لما شيلته؛ الأكواد والخوارزمية ظبطوا
لوحدهم.

نادية: يا كريم يا رب.

سارة: طيب مستنينين إيه، يللا نصحي ياسين.

د عصام: انا اللي هدوس عالزرار انا بقولكم أهو.

د نادية: مش هيحصل ... سارة اللي هتدوس؛ انا حاسة ان ربنا

هيجعل فوقة ياسين على إيديها.

سارة وشها احمر وعينها دمعت ونادية حضنتها.

والكل وقف عند الجهاز وسارة بتحرك الماوس عشان تدوس على

زرار "wake me up"

عزام وقف قدام ياسين المرمي على الأرض وفضل يحركه برجله

... مفيش استجابة ... ميل عليه عشان يعدله ... وفجأة كان حبل زي

بتوع رعاة البقر مرمي على عزام وصوت بيقول "اربطوووه" والكل

نُفذ في سرعة البرق، بالرغم من الذهول اللي كان واضح على وشوشهم

ونظراتهم لبعض لما شافوا صاحب الصوت.

ياسين دخل من الباب المكسور ومعاه طرف الحبل، وعزام

باصصله ومش فاهم حاجة.

ياسين: طبعا انت فاكر ان اللي هناك ده ياسين بتاع بلاد براء،

أحب اقولك، انت غلطان، انا ياسين بتاع بلاد براء، واللي هناك ده واحد

من ياسين بتوع بلاد جوا، واتفقنا اننا نبدل أدوار وهو ياخذ الإزاة

معاه وانا عشان بقى عندي قدرات؛ اقدر اتنقل من مكان لمكان براحتي، وادينني جيت وسمعت كل الخطه، والحمد لله إنه جاب فكرة التبديل في دماغنا.

عزام بمنتهى الغضب: مش هسيبك يا ياسين؟

د مُشَرَّفَة باستهزاء: هو انت مش شايف ان احنا اللي رابطينك ومش هنسيبك ولا إيه.

د سميرة بابتسامه هادية: ياسين! لو انت اللي كنت موجود؛ كنت هتشرّب الإزازه بتاعة عزام؟

ياسين بص للسقف وبعدين لسميرة وقال: الإنسان قدام الإغراء ممكن يتغير ويُفَتَّن، وسؤال زي ده إجابته تخوف، لأنني حقيقي معرفش كنت هشرّبها ولا لأ.

د سميرة هزت راسها بابتسامه على وشها وقالت: يللا ... الأزايز بتاعتنا مستنيك هناك.

ياسين أخذ الأزايز وابتدى يشرب من كل واحدة وسط استحسان من كل اللي موجودين وغضب فظيع من عزام اللي عمال يصرخ في يأس وسط ضعفه اللي سببه ربطته بالحبل واللي طول عمرها نقطة ضعفه.

ياسين خلص شرب الأزايز وابتدى يحس بتخمه، فقعد على الكرسي وهو بيترنح.

ياسين قال: دلوقتي إيه بقى؟

سميرة بصتله وعينيها كلها رجاء: دلوقتي كله على الله ثم عليك

يا ياسين.

وبمجرد ما خلصت جملتها ... ياسين ظهر ضباب كثيف حواليه

و ... واختفى.

العدو الحقيقي

سارة داست الزرار ... وياسين فتح عينه وسط فرحة كبيرة
وأحضان كثيرة من أمه ومن أحمد ومحمود ود عصام، أما لينا وسارة؛
فضلوا يحضنوا بعض ويحضنوا في د نادية.

بس المفاجأة ان ياسين منطّش بكلمة ... ومتحركش أي
حركة... وعينه عمالة تدمع ... ياسين قام مشلول تمامًا.

ياسين اتنقل أحسن مستشفى في مصر ... الدكاترة هناك أجمعوا
انها حالة مش مفهومة وإن كل حاجة عنده سليمة وان اللي ياسين
فيه ده أكيد حاجة مؤقتة وهتعدي ... إمتة؟ ... الله أعلم.

ياسين الضباب حوالياه زاد لحد ما اختفى.

عزام وهو مربوط وصوته مليان غضب قال: اللعبة مبتمشيش
كدة يا علي؛ انتوا لعبتو بالنار.

مُشَرَّفَة: أولاً دي لعبتك انت، ثانيا انت اللي قتلت يحيى، وده
مكانش جزء من اللي اتفقت عليه معنا.

عزام: يحيى هو اللي حاول يخلص مني أكثر من مرة، وبعدين
انا مكنتش اعرف ان دي آخر نسخة ليه.

سميرة: عموما احنا مخالفناش قواعد "اللعبة"، إنما ياسين الي ضحك علينا كلنا، وخلي نسخة فاضية من حلم هو قام منه؛ كملت معانا على إنهم لسة مندمجين.

سمير نجيب: شكله عملها في اللحظة الي تخيلنا فيها انه كان مستخبي تحت الترابيزة.

عزام: طيب وبالنسبة للأزايز؟ الاتفاق كان إزازه قصاد إزازه، مش خمسة.

يحيى في مشهد فجائي مسرحي دخل عليهم الأوضة وقال بابتسامة: خمسة ازاي وانا إزازتي خدها عزام من ياسين ودلقها؟!

الكل فرح ان لسة في نسخة ليحيى موجودة، لكن مُشْرِفَة كان قلقان وبص لموسى وقال: انتي عملتي ايه يا سميرة؟!؟

سميرة موسى بتوتر وحماس في نفس الوقت قالت: كان لازم أجازف.

الكل وجهوا انظارهم للحديث الي داير بين موسى ومُشْرِفَة.

مُشْرِفَة: تقومي تديله إزازه العناصر الأولية! جسمه ممكن ميستوعبهاش.

سميرة: في البداية بس، وبعد كدة هيظبط.

مُشْرِفَة: ده غير إنه حتى مخاضش الاختبار، وهو نفسه قال إنه ميعرفش لو كان موجود كان هيختار إيه؟

سميرة: ده في حد ذاته بيقول إنه مش مغرور أو أعمى ... يا جماعة من فضلكم ... احنا عارفين مامة ياسين وعارفين قد إيه هي بتقدرنا ومحروقة من جواها عالي حصلنا، ومن كتر تفكيرها فينا وولاءها لقضيتنا؛ ياما شفناها واتكلمنا معاها هي وياسين ... وعارفين هي قد إيه ست مؤمنة ومربية ياسين وزرعت فيه الخير ... ومن أول معرفنا بوجود ياسين هنا؛ يحيى اقترح موضوع الأرايز، وكلنا كنا مؤمنين ان ياسين هو الشخص الوحيد اللي ينفع نأتمنه على علم كبيبيبيير زي ده، أولاً متدين، ثانياً هو على قدر من الذكاء يستوعب كم الي اديناهوله، ثالثاً هو الوحيد اللي قدر يدخل هنا ويكون بكامل وعيه، رابعاً وده الأهم؛ ياسين الوحيد من كل اللي حاولنا معاهم على مدار قرون الي نسبة انتقال علم الإزارة ليه واللي كان مصدرها زويل - في حلم عادي - كانت أكثر من 90%، أعلى نسبة وصلناها قبل كدة كانت 3%، وان شاء الله مش هيخيب ظننا فيه.

عزام قاطعهم وقال باستهتار: مش شرط على فكرة، إسألوني أنا.

وكمل عزام بتهكم: بس معلش؛ إنتي إديتوله العناصر الأولية فعلاً؟

وفضل عزام يضحك وكلهم باصينله، كمل عزام وعينه بتلمع: انتي متخيلة انتي عملتي إيه؟ إنتي إديتيله واحدة من أكبر الفتن؛ قوة

حصل ... ياسين مخنوق بس مش عارف يعبر ... ومن جواه حس
بغضب شديد واتمنى يسكتهم كلهم.

وفجأة ... اللي اتمناه حصل ... كل اللي في الأوضة أغم عليهم مرة
واحدة ... إلا نادية وسارة اللي اتسمروا مكانهم ومسكوا إيدين بعض
وبصوا بذهول لياسين اللي كانت عينه بتلمع ولأول مرة من ساعة
ياسين ما فاق؛ عضلة عنده تتحرك وظهر على وشه شبح ابتسامة
وملامح ارتياح.

ياسين فهم إن فيه حاجة عنده اتغيرت ... حس بإحساس ملوش
وصف غير إنه مُنعش.

ياسين رجع ومعاه ضوء عظيم... إما إنه يَكُونُ نور يهدي
الناس... أو نار هيحرق بيها نفسه..

ياترى لو إنت (ي) مكان ياسين؛ هتكون (ي) إيه؟؟؟

تمت

الفهرس

5	إهداء
6	مقدمة
7	العقدة الأزلية
12	يوم يُكْرَم المرءُ أو يُهَان
16	استفزاز
22	النواة
29	الفكرة
38	بخار
43	العبقرية
50	إستقطاب
61	اللي بيروح مبيرجعش
69	بداية جديدة
74	إختفاء
84	الذهب
90	العيرة
99	تعويرة الوش...مفيهاش معلش
106	لسة فاكر
114	البيض

- 121 تيجي تصيده ... يصيدك
- 133 أبيض في أبيض
- 145 شنطة المياها
- 150 اللحية البيضاء والإكسير الأحمر
- 158 الإختبار
- 167 العدو الحقيقي
- 171 تمّت
- 172 الفهرس